

NAMBAR

Hae ahmin loe Israel kaminawk milu kroekhaih to khet moe, sak ih ahmin ah oh. Hmaloe koek haih loe Sinai mae ah (1.2) milu to kroek o, vai hnetto haih loe saning qui palito thung praezaek ah avah o naah kroek o (26.2). Hae kroekhaih cabu loe Mosi mah tarik ih kholong caehhaih kawng hoi Israel kaminawk Sinai mae ah saning hnetto thung atai o pacoengah, to ahmuen hoiah tacawthaih kawng to thuih. Hae cabu thungah loe, Jordan tuipui ni angyae bang kaom lokkam ih Kanaan prae pha ai karoek to kangcoeng hmuen kawng to amtueng. Hae Cabu khet naah Sithaw mah lokkam ih kaminawk loe raihaih hoi palungboenghaih tongh o toepsoep pongah, Sithaw ah amha han kawkruk maw rai, tito amtuengsak. Toe Sithaw mah Israel hoiah sak atimhaih hmuen to akoepsak hanah, kalen parai Sithaw oep thohhaih doeh amtuengsak let bae vop. Sithaw angmah poekhaih baktih toengah, Sithaw mah angmah ih kami maeto ah ohsak hanah, Israel to amrosak ving han koeh ai. Kricaanawk mah doeh to tiah Sithaw khaeah amha han oh.

Kami kroekhaih

¹ Israel kaminawk Izip prae thung hoi tacawthaih saning hnet, khrah hnetto haih hmaloe koek niah, Sinai praezaek ih kaminawk amkhuenghaih kahni imthung ah, Angraeng mah Mosi khaeah hae tiah lokthuih pae,

² nawnto amkhueng Israel kaminawk thungah, angmacae acaeng hoi angmacae imthung takoh thung ih nongpanawk boih, ³ nang hoi Aaron mah saning pumphaeto pacoeng ranui bang kaom, misatuh thaih Israel kaminawk boih to milu kok hoih, tiah a naa. ⁴ Acaeng maeto thung ih acaeng zaehoikung lu koek kami maeto mah nang hnik to abom o tih. ⁵ Milu kroek naah nang hnik hoi nawnto angdoe han kami ahminnawk loe, Reuben acaeng thung hoiah Shedeur capa Elizur. ⁶ Simeon acaeng thung hoiah, Zurishaddai capa Shelumiel. ⁷ Judah acaeng thung hoiah, Amminadab capa Nahshon. ⁸ Issakar acaeng thung hoiah, Zuar capa Nathanel. ⁹ Zebulun acaeng thung hoiah, Helon capa Eliab. ¹⁰ Joseph ih caanawk; Ephraim acaeng thung hoiah, Ammihud capa Elishama; Manasseh acaeng thung hoiah, Pedahzur capa Gamaliel. ¹¹ Benjamin acaeng thung hoiah, Gideoni capa Abidan. ¹² Dan acaeng thung hoiah, Amishaddai capa Ahiezer. ¹³ Asher acaeng thung hoiah, Okran capa Pagiell. ¹⁴ Gad acaeng thung hoiah, Deuel capa Eliasaph. ¹⁵ Naphtali acaeng thung hoiah, Enan capa Ahira cae hae ni. ¹⁶ Hae kaminawk loe amkhueng kaminawk salakah ahmin kamthang, acaeng zaehoikung hoi Israel kaminawk lu koek ah oh o.

¹⁷ To tiah ahmin paek ih kaminawk to Mosi hoi Aaron mah kaww moe, ¹⁸ kaminawk to khrah hnetto haih, hmaloe koek niah amkhuengsak; kaminawk loe angmacae ih acaeng hoi imthung takoh ahmin to thuih o moe, saning pumphaeto hoi ranui bang kaminawk ih ahmin to pakoep o.

¹⁹ Angraeng mah Mosi khae paek ih lok baktih toengah, Israel kaminawkw to Sinai mae ah a kroek.

²⁰ Israel ih calu, Reuben ih caanawkw thungah, angmacae ih acaeng hoi imthung takoh caanawkw boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ²¹ Reuben acaengnawkw loe, sing pali, sang taruk, cumvai pangato oh o.

²² Simeon ih caanawkw thungah, angmacae ih acaeng hoi imthung takoh caanawkw boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ²³ Simeon acaengnawkw loe, sing panga, sang takawt, cumvai thumto oh o.

²⁴ Gad ih caanawkw thung hoiah, angmacae ih acaeng hoi imthung takoh caanawkw boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ²⁵ Gad acaengnawkw loe, sing pali, sang panga, cumvai taruk, qui pangato oh o.

²⁶ Judah ih caanawkw thung hoiah, angmacae ih acaeng hoi imthung takoh caanawkw boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ²⁷ Judah acaengnawkw loe, sing sarih, sang pali, cumvai tarukto oh o.

²⁸ Issakar ih caanawkw thung hoiah, angmacae ih acaeng hoi imthung takoh caanawkw boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ²⁹ Issakar acaengnawkw loe sing panga, sang pali, cumvai palito oh o.

³⁰ Zebulun ih caanawk thung hoiah, angmacae ih acaeng hoi imthung takoh caanawk boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ³¹ Zebulun acaengnawk loe sing panga, sang sarih, cumvai palito oh o.

³² Joseph ih capa hnik; Ephraim ih caanawk thung hoiah, angmacae ih acaeng hoi imthung takoh caanawk boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ³³ Ephraim acaengnawk loe sing pali, cumvai pangato oh o.

³⁴ Manasseh ih caanawk thungah, angmacae ih acaeng hoi imthung takoh caanawk boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ³⁵ Manasseh acaengnawk loe, sing thum, sang hnet, cumvai hnetto oh o.

³⁶ Benjamin ih caanawk thung hoiah, angmacae ih acaeng hoi imthung takoh caanawk boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ³⁷ Benjamin acaengnawk loe sing thum, sang panga, cumvai palito oh o. ³⁸ Dan ih caanawk thungah, angmacae ih acaeng hoi imthung takoh thung ih caanawk boih, saning pumphaeto pacoeng ranui bang kaom, misatuh thaih nongpa boih ahmin to kroek naah, ³⁹ Dan acaengnawk loe sing taruk, sang hnet, cumvai sarihto oh o.

⁴⁰ Asher ih caanawk thungah, angmacae ih acaeng hoi imthung takoh caanawk boih, saning pumphaeto pacoeng ranui bang kaom, misatuh

thaih nongpa boih ahmin to kroek naah, ⁴¹ Asher acaengnawkw loe, sing pali, sangto pacoeng, cumvai pangato oh o.

⁴² Naphtali ih caanawkw thung hoiah, angmacae ih acaeng hoi imthung takoh caanawkw boih, saning pumphae to pacoeng ranui bang kaom, misatuh thaih nongpa boih ahmin to kroek naah, ⁴³ Naphtali acaengnawkw loe, sing panga, sang thum, cumvai palito oh o.

⁴⁴ Hae kaminawkw loe Mosi hoi Aaron mah, angmacae imthung takoh maeto thung hoi kami maeto, Israel zaehoikung hatlai hnetto thung hoiah goih hoi ih kami ah oh o. ⁴⁵ Saning pumphae to pacoeng ranui bang kaom, misatuh thaih kaminawkw boih, Israel caanawkw thungah angmacae imthung takoh kaminawkw boih ahmin to kroek naah, ⁴⁶ Sangqum boih ah kami sang cumvai taruk, sang thum, cumvai panga, qui pangato oh o.

⁴⁷ Toe Levi acaeng hoi nihcae imthung takohnawkw loe, nihcae hoi nawnto kroek o ai. ⁴⁸ Angraeng mah Mosi khaeah, ⁴⁹ Levi acaeng loe kroek hmah loe, Israel kaminawkw thungah doeh athumsak hmah. ⁵⁰ Toe Levi kaminawkw loe hnukung lokthuihaih kahni im khenzawnkung, laom sabaenawkw boih hoi to imthung ah kaom hmuennawkw boih toepkung ah suem ah; nihcae loe kahni im hoi laom sabaenawkw boih to apu o tih; nihcae mah kahni im thung ih sak han koi tok to sah o ueloe, ataihaih ahmuen phak o naah, kahni im taengah om o tih. ⁵¹ Kahni im puenhaih tue phak naah, Levi kaminawkw mah pakuem o ueloe, kahni im sakhaih tue phak

naah doeh, Levi kaminawkw mah sah o tih; kahni im taengah kacaeh kalah kami loe paduek han oh. ⁵² Israel kaminawkw mah angmacae ih im sak o naah, misatuh kami boih mah, angmacae ataihah ahmuen to angmacae hoi karaem ah sah o tih. ⁵³ Toe amkhueng Israel kaminawkw nuiah palungphuihah phak han ai ah, Levi kaminawkw loe hnukung lokthuihah kahni im taengah atai o ueloe, hnukung lokthuihah kahni im to kenzawn o tih, tiah a naa. ⁵⁴ Angraeng mah Mosi khaeah thuih ih lok baktih toengah, Israel kaminawkw mah sak o.

2

Acaeng kaminawkw ohhah ahmuen taqawthah

¹ Angraeng mah Mosi hoi Aaron khaeah,
² Israel kaminawkw boih mah, angmah ih khosakhah dan baktih toengah im to sak moe, imthung takoh angmathah kahni payanghah taengah, rangpui amkhuenghah kahni im to sahsak ah, tiah a naa. ³ Ni tacawthah ni angyae bangah, Judah acaeng misatuh kaminawkw loe angmacae angmathah kahni payang ih baktih toengah ohhah im to sah o tih; Amminadab capa Nashon loe, Judah kaminawkw zaehoikung ah om tih. ⁴ Kroek naah anih ih misatuh kaminawkw loe sing sarah, sang qui pali, cumvai tarukto oh o. ⁵ Nihcae taengah Issakar acaengnawkw ohhah im to sah o tih; Zuar capa Nathanel loe Issakar kaminawkw zaehoikung ah om tih. ⁶ Kroek naah anih ih misatuh kaminawkw loe sing panga, sang pali, cumvai palito oh o. ⁷ Zebulun acaengnawkw loe nihcae taengah om o tih; Helon capa Eliab

loe Zebulun kaminawk zaehoikung ah om tih. ⁸ Kroek naah anih ih misatuh kaminawk loe sing panga, sang sarih, cumvai palito oh o. ⁹ Judah kaminawk ohhaih ahmuen ah kaom, angmacae ih misatuh kaminawk to kroek naah sangqum boih ah, sing cumvai, sang qui tazet, sang taruk, cumvai palito oh o. Hae kaminawk loe hmaloe koek ah caeh o tih.

¹⁰ Reuben ih misatuh kaminawk loe angmacae angmathaih kahni payang ih baktih toengah, aloih bangah ohhaih im to sah o tih; Shedeur capa Elizur loe Reuben kaminawk zaehoikung ah om tih. ¹¹ Kroek naah anih ih misatuh kaminawk loe sing pali, sang taruk, cumvai pangato oh o.

¹² Simeon acaengnawk loe nihcae taengah om o tih; Zurishaddai capa Shelumiel loe Simeon kaminawk zaehoikung ah om tih. ¹³ Kroek naah anih ih misatuh kaminawk loe sing panga,

sang takawt, cumvai thumto oh o. ¹⁴ Nihcae taengah Gad acaengnawk to om o tih; Reuel capa Elisaph loe Gad kaminawk zaehoikung ah om tih.

¹⁵ Kroek naah anih ih misatuh kaminawk loe sing pali, sang panga, cumvai taruk, qui pangato oh o.

¹⁶ Reuben acaengnawk ohhaih ahmuen ah kaom angmacae ih misatuh kaminawk to kroek naah sangqum boih ah, sing cumvai, sing panga, sang ha, cumvai pali qui pangato oh o.

¹⁷ To pacoengah misatuh kaminawk um li ah rangpui amkhuenghah kahni im hoi nawnto Levi kaminawk ohhaih ahmuen to om tih; angmacae angmathaih kahni payang ih baktih toengah, angmacae ohhaih im to sah o tih.

¹⁸ Ephraim acaeng misatuh kaminawk loe

angmacae angmathaih kahni payang ih baktih toengah, ohhaih im to sah o tih; Ammihud capa Elishama loe Ephraim acaeng zaehoikung ah om tih. ¹⁹ Kroek naah anih ih misatuh kaminawkw loe sing pali, cumvai pangato oh o. ²⁰ Nihcae taengah Manasseh acaengnawkw to om o tih; Pedahzur capa Gamaliel loe Manasseh kaminawkw zaehoikung ah om tih. ²¹ Kroek naah anih ih misatuh kaminawkw loe sing thum, sang pumphae hnetto oh o. ²² Nihcae taengah Benjamin acaengnawkw om o tih; Gideoni capa Abidan loe Benjamin kaminawkw zaehoikung ah om tih. ²³ Kroek naah anih ih misatuh kaminawkw loe sing thum, sang panga, cumvai palito oh o. ²⁴ Ephraim acaengnawkw ohhaih ahmuen ah kaom angmacae ih misatuh kaminawkw to kroek naah sangqum boih ah, sing cumvai, sang tazet, cumvaito oh o.

²⁵ Aluek bangah Judah acaeng misatuh kaminawkw loe angmacae angmathaih kahni payang ih baktih toengah, ohhaih im to sah o tih; Ammishaddai capa Ahierzer loe Dan kaminawkw zaehoikung ah om tih. ²⁶ Kroek naah anih ih misatuh kaminawkw loe sing taruk, sang hnet, cumvai sarihto oh o. ²⁷ Nihcae taengah Asher acaengnawkw om o tih; Okran capa Pagiell loe Asher kaminawkw zaehoikung ah om tih. ²⁸ Kroek naah anih ih misatuh kaminawkw loe sing pali, sang cumvai pangato oh o. ²⁹ Nihcae pacoengah Naphtali acaengnawkw om o tih; Enan capa Abira loe Naphtali acaeng zaehoikung ah om tih. ³⁰ Kroek naah anih ih misatuh kaminawkw loe sing panga, sang thum, cumvai palito oh

o. ³¹ Dan acaengnawk ataihah ahmuen ah kaom kaminawk to kroek naah sangqum boih ah, sing cumvai, sang qui panga, sang sarih, cumvai tarukto oh o. Angmacae angmathaih kahni payang ih baktih toengah, nihcae loe hnukkhuem koek ah caeh o tih.

³² Angmacae ih acaengnawk boih thung ih kami hoi angmacae ataihah ahmuen ih misatuh kaminawk to kroek naah, Israel misatuh kaminawk loe sangqum boih ah, sang cumvai taruk, sang thum, cumvai pangato pacoeng, qui pangato oh o. ³³ Angraeng mah Mosi khaeah thuih ih lok baktih toengah, Levinawk loe Israel kaminawk thungah kroek o ai.

³⁴ Angraeng mah Mosi khaeah thuih ih lok baktih toengah, Israel kaminawk mah sak o boih; angmacae khosakhah dan hoi angmacae imthung takoh boih nawnto ataihah ahmuen to a sak o.

3

Aaron capanawk

¹ Sinai mae ah Angraeng mah Mosi khaeah lokthuih naah, hae ih kaminawk loe Aaron hoi Mosi ih caanawk ah oh o. ² Aaron caanawk ih ahmin loe calu ah Nadab, Abihu, Eleazar hoi Ithamar. ³ Hae kaminawk loe qaima toksak hanah ampa mah situi bawh moe, pahoe ih Aaron caanawk ih ahmin ah oh. ⁴ Nadab hoi Abihu loe, Sinai praezaek ah sak koi ai kalah hmai hoi angbawnhah a sak hoi pongah, Angraeng hmaa ah duek hoi hmaek; nihnik loe

caa tawn hoi ai; to pongah Eleazar hoi Ithamar to ampa Aaron hmaa ah qaima tok a sak hoi.

Kahni imthung ah toksah Levinawk

⁵ Angraeng mah Mosi khaeah, ⁶ Levi acaengnawk to kawkw loe, Aaron ih toksak hanah, anih hmaa ah caeh haih ah. ⁷ Nihcae loe Aaron hoi kahni im ah amkhueng kaminawk ih kangaih tok to, amkhuenghaih kahni im hmaa ah sah o tih. ⁸ Nihcae loe kaminawk amkhuenghaih kahni im ih hmuenmaenawk boih khen o ueloe, Israel kaminawk mah sak han koi tok to sah o tih. ⁹ Levi kaminawk to Aaron hoi a caanawk khaeah paek ah; Israel caanawk thung hoi qoi ah loe anih khaeah paek boih ah. ¹⁰ Aaron hoi anih ih caanawk doeh qaima toksak hanah paek ah; hmuenciim taengah kacaeh minawk kalah loe dueksak han oh, tiah a naa.

¹¹ Angraeng mah Mosi khaeah, ¹² khenah, Israel kaminawk thung hoi tapen calu boih zuengah, Israel kaminawk thung hoi Levi kaminawk to ka qoih boeh pongah, Levi kaminawk loe kai ih ni; ¹³ tapen tangsuek hmuen boih loe kai ih ni; Izip prae thungah tapen tangsuek ka hum boih naah, Israel prae thungah loe tapen tangsuek to kai hanah pahoe o pongah, to hmuennawk loe kai ih hmuen ah oh o; Kai loe Angraeng ah ka oh, tiah a naa.

Levi acaengnawk kroek han thuihaih

¹⁴ ¹⁴ Angraeng mah Sinai praezaek ah Mosi khaeah, ¹⁵ Levi acaengnawk boih to kroek ah, khrah to pacoeng ranui bang kaom nihcae thung

ih nongpanawkw to kroek boih hanah a thuih pae. ¹⁶ To pongah Angraeng mah thuih ih lok baktih toengah, Mosi mah nihcae to kroek. ¹⁷ Levi kaminawkw ih ahmin loe Gershon, Kohath hoi Merari. ¹⁸ Gershon kaminawkw ih ahmin loe Libni hoi Shimei. ¹⁹ Kohath acaengnawkw ih ahmin loe Amram, Izehar, Hebron hoi Uzziel. ²⁰ Merari acaengnawkw ih ahmin loe Mahli hoi Mushi. Hae kaminawkw loe angmaceae acaeng thung hoiah kroek ih Levi acaeng ah oh hoi.

²¹ Gershon khae hoi tacawt, Libni hoi Shimei ih caanawkw loe Gershon ih acaeng ah oh o. ²² Khrah to pacoeng ranui bang kaom nongpa to kroek boih naah, sangqum boih ah, sang sarih, cumvai pangato oh o. ²³ Gershon ih caanawkw loe niduem bang kahni im hnukah om o tih. ²⁴ Lael capa Eliasaph loe Gershon imthung takoh zaehoikung ah oh. ²⁵ Gershon kaminawkw mah sak han koi tok loe, kaminawkw amkhuenghah kahni im, im hoi anui padihhah ahmuen, kaminawkw amkhuenghah kahni im akunhah thok taengah payang ih kahninawkw, ²⁶ longhma ah payang ih kahninawkw, kahni im hoi hmaicam longhma taengah payang ih kahninawkw, longhma akunhah thok taengah payang ih kahninawkw, zaenghah quinawkw boih loe nihcae mah khen o tih.

²⁷ Kohath hoi tacawt Amram caanawkw, Izehar caanawkw, Hebron caanawkw hoi Uzziel caanawkw loe, Kohath ih acaeng ah oh o. ²⁸ Khrah to pacoeng ranui bang kaom nongpanawkw to kroek boih naah, sang tazetto pacoeng, cumvai tarukto oh o; nihcae loe hmuenciim kenzawnkung ah

oh o. ²⁹ Kohath imthung takoh ih caanawk loe kahni im aloih bangah om o tih. ³⁰ Uzziel capa Elizaphan loe Kohath imthung takoh zae-hoikung ah oh. ³¹ Nihcae loe Sithaw lokkamhaih thingkhong, caboi, hmaithawk, hmaicamnawk, angmacae toksakhaih hmuenciim thung ih laom sabaenawk, payang ih kahninawk hoi hmuennawk boih khenzawnkung ah oh o. ³² Aaron capa qaima Eleazar loe Levi kaminawk zae-hoikung ah oh; anih loe hmuenciim toep kaminawk khenzawnkung ah oh.

³³ Merari khae hoiah tacawt; Mahli hoi Mushi caanawk loe, Merari ih acaeng ah oh o. ³⁴ Khrah to pacoeng ranuih bang kaom nongpa to kroek boih naah, sang tarukto pacoeng, cumvai palito oh o. ³⁵ Abihail capa Zureil loe Merari imthung takoh zae-hoikung ah oh; nihcae loe kahni im aluek bangah om o tih. ³⁶ Merari ih caanawk mah sak o han koi toknawk loe, kahni im sakhaih thingnawk, pakhang ih thingnawk, tungnawk, tung padoethaih hmuennawk, laom sabaenawk hoi kalah patoh ih hmuennawk boih, ³⁷ imthung longhma taeng ih tungnawk, tung angdoethaih ahmuennawk, kahni im komhaih quinawk hoi takhuekhaih sumnawk khenzawnkung ah om o tih.

³⁸ Mosi hoi Aaron ih caanawk loe ni angyae bang ih kahni im ahma hoi rangpui amkhuenghaih kahni im hma ah om o tih; nihcae loe Israel kaminawk zuengah hmuenciim khenzawnkung ah oh o; hmuenciim taengah angzo kalah kami loe paduek han oh. ³⁹ Angraeng mah paek ih lok baktih toengah, Mosi hoi Aaron mah khrah

to pacoeng ranuih bang kaom nihcae imthung takoh ih, nongpanawkw to kroek boih naah, Levi acaengnawkw loe sangqum boih ah, sing hnet, sang hnetto oh o.

Tapen hmaloe zuengah Levinawkw to paek o

⁴⁰ Angraeng mah Mosi khaeah, Israel caanawkw thungah khrah to pacoeng ranuih bang kaom nongpa to kroek o boih ah loe, nihcae ih ahmin to tarik ah. ⁴¹ Israel kaminawkw ih calu boih zuengah, Levi kaminawkw to la ah loe, Israel kaminawkw ih tapen tangsuek moinawkw zuengah, Levi kaminawkw ih maitaw to kai hanah la ah; Kai loe Angraeng ah ka oh, tiah a naa. ⁴² To pongah Angraeng mah paek ih lok baktih toengah, Mosi mah sak moe, Israel ih calu to kroek boih. ⁴³ Khrah to pacoeng ranuih bang kaom, calu to kroek boih moe, nihcae ih ahmin to lak naah, sing hnet, sang hnet qui sarikh, thumto oh o.

⁴⁴ Angraeng mah Mosi khaeah, ⁴⁵ Israel calunawkw boih zuengah, Levi kaminawkw to la ah loe, nihcae ih maitaw zuengah, Levinawkw ih maitaw to la ah; Levinawkw loe kai ih kami ah ni oh o; Kai loe Angraeng ah ka oh. ⁴⁶ Levi kaminawkw pong pop, Israel calu cumvai hnet, qui sarikh, thumto akrang ah, tiah a naa. ⁴⁷ Gerah pumphae to kazit, hmaicam ah patoh ih tahhah shekel baktih toengah, kami maeto khaeah shekel pangato la ah; ⁴⁸ kamtlai Israel kaminawkw akranghah phoisa to Aaron hoi a caanawkw khaeah paek ah. ⁴⁹ To pongah Levinawkw mah kamtlai Israel calunawkw akranghah phoisa to Mosi mah cong; ⁵⁰ Israel calunawkw khaeah cong ih phoisanawkw

loe, hmuenciim ih shekel tahhah hoi tah naah, shekel sang hatlai thum, qui taruk, pangato oh. ⁵¹ Angraeng mah thuih ih lok baktih toengah, Mosi mah to akranghah phoisa to Aaron hoi a caanaww khaeah paek.

4

Kohath ih kaminaww

¹ Angraeng mah Mosi hoi Aaron khaeah, ² Angmacae acaeng hoi imthung takoh ah kaom kami baktih toengah, Levi acaeng ah kaom Kohath ih caanaww to kroek ah, ³ amkhuenghah kahni imthung ah toksak hanah, saning qui thumto hoi saning qui pangato kaom nongpanaww to kroek boih ah. ⁴ Kohath caanaww mah khetzawn ih kaminaww amkhuenghah kahni im loe, ciimcai koek ahmuen ah oh. ⁵ Ohhah ahmuen angpuen o naah, Aaron hoi a caanaww to angzo o tih, nihcae mah a nuiah khuk ih kahni to khring o ueloe, hnukung ah kaom thingkhong to khuk o tih. ⁶ To pacoengah tuipei caham ih ahin hoiah khuk o tih; to hmuen ih a nuiah rong kamiing kahni to khuk o ueloe, cung to angmah ih ahmuen ah suem o tih. ⁷ Caboi nui ih takaw to kahni kamiing hoiah kraeng o tih, to ah sabaenaww, kathuk sabaenaww, naek han koi tui lawnhah boengloengnaww, takawnaww to apet ai ah suem o tih; ⁸ to ih hmuen nuiah kamling kahni to baih o tih; a nuiah tuipei caham ih ahin hoiah khuk o ueloe, cung to angmah ahmuen ah suem o tih. ⁹ Kahni kamiing to la o ueloe, hmaithaww, hmaiim, hmai ataephah taitaehaww, hmai cenhah boengloeng, hmaitu

suekhaih boengloengnawk boih to khuk o tih; to tiah nihcae mah toksah o tih. ¹⁰ To pacoengah to ih laom sabaenawk boih to tuipui caham ih ahin hoiah ayaw o hmoek pacoengah, aputhaih to sah o tih. ¹¹ Sui hmaicam nuiah kahni kamiing to baih o ueloe, tuipui caham ih ahin hoiah khuk o tih; aputhaih cung to angmah ohhaih ahmuen ah suem o tih. ¹² Hmuenciim thungah toksak naah hmuenmaenawk to la o boih ueloe, kahni kamiing hoiah ayaw o tih; tuipui caham hin hoi khuk o pacoengah, aputhaih to sah o tih. ¹³ Nihcae mah hmaicam pong ih maiphunawk to takhoek o ueloe, a nuiah kahni kamling hup to khuk o tih. ¹⁴ To hmaicam ah toksak naah kangaih hmuennawk, laom sabaenawk, moi banghaih sumnawk, moi thunhaih sumnawk, hmai kamngaeh sohhaiah sum kangphaeknawk, tui bawhhaih boengloengnawk hoi hmaicam ih laom sabaenawk to a nuiah suem o boih tih; to hmuen to tuipui caham hin hoiah khuk o ueloe, aputhaih cung to a ohhaih ahmuen ah suem o tih. ¹⁵ Ataihah ahmuen angpuen han oh naah, Aaron hoi a caanawk loe, hmuenciim hoi hmuenciim ih laom sabaenawk to khuk o pacoengah, to hmuennawk to aput hanah, Kohath ih caanawk angzo o tih; toe nihcae loe kaciim hmuen to sui o mak ai; sui o nahaeloe dueh o tih. Hae hmuennawk loe kaminawk amkhuenghah kahni im ah Kohath ih caanawk mah sak han koi tok ah oh. ¹⁶ Qaima Aaron capa Eleazar mah sak han koi tok loe hmaitui, hmai thlaek koi hmuihoih, ni thokkruek paek ih cang hoi lu bawhhaih situi, kahni im hoi

a thung ih hmuennawkw boih, hmaicam hoi a thung ih laom sabaenawkw boih to khenzawn tih, tiah a naa. ¹⁷ Angraeng mah Mosi hoi Aaron khaeah, ¹⁸ Kohath imthung takoh to Levi acaeng thung hoiah takhoe ving hmah; ¹⁹ to pongah kaciim koek ahmuen ah caeh hoi naah, duekhaih thung hoiah loih moe, hing thai hanah, hae tiah nihcae han sah paeh; Aaron hoi a caanawkw to hmuenciim thungah akun o hmaloe ueloe, kaminawkw boih mah sak han koi hmuen hoi tok to tapraek pae tih: ²⁰ toe ciimcai hmuennawkw kraeng nathuem ah, to hmuennawkw khet hanah Kohath ih caanawkw a thungah caehsak hmah; to tih ai nahaeloe dueh o moeng tih, tiah a naa.

Gershon ih caanawkw

²¹ Angraeng mah Mosi khaeah, ²² Gershon caanawkw doeh angmacae ih acaeng hoi imthung takoh ah kami ih ahmin to la ah; ²³ amkhuenghah kahni imthung ah kaom kaminawkw angaihah toksak hanah, saning qui thumto hoi saning qui pangato kaom nongpanawkw to kroek boih ah. ²⁴ Gershon imthung takoh mah sak moe, aput han koi hmuennawkw loe hae tiah oh; ²⁵ kahni im ah payang ih kahni, rangpui amkhuenghah kahni im, a nui khuk ih kahninawkw, a nui khukhah tuipei caham ahinnawkw, kaminawkw amkhuenghah kahni im, amkhuenghah kahni im thok taengah payang ih kahninawkw, ²⁶ kahni im hoi hmaicam taeng ih longhmaa ah payang ih kahni, longhma thok taengah payang ih kahni, toksak naah patoh ih quinawkw hoi kangaih hmuennawkw loe Gershon ih caanawkw mah sah

o boih tih. ²⁷ Gershon acaengnawkw mah sak ih hmuennawkw hoi aput han koi hmuennawkw boih loe, Aaron hoi a caanawkw mah thuih ih lok baktih toengah sah o tih; nihcae mah aput han koi hmuennawkw boih to thui pae o tih. ²⁸ Hae hmuennawkw loe Gershon imthung takoh mah, kami amkhuenghah kahni imthung ah sak han koi tok ah oh; nihcae toksakhah loe Aaron capa qaima Ithamar mah khenzawn tih.

Merari ih caanawkw

²⁹ Merari ih caanawkw doeh angmacae ih acaeng hoi imthung takoh ah kaom kaminawkw baktih toengah kroek ah; ³⁰ kaminawkw amkhuenghah kahni imthung ah toksak han kangzo, saning qui thumto hoi saning qui pangato kaom nongpa to kroek boih ah. ³¹ Nihcae mah kaminawkw amkhuenghah kahni im to sak moe, aput o han koi tok loe, kahni im sakhah thingnawkw, pakhang ih thingnawkw, tungnawkw hoi tung padoethah hmuennawkw, ³² longhma taeng boih ah kaom tungnawkw, tung padoethah hmuennawkw, sunnawkw, quinawkw, toksak naah patoh ih hmuennawkw to sah o boih tih; nihcae mah aput ih hmuennawkw to pakuem moe, kroek boih han oh. ³³ Hae hmuennawkw loe Aaron capa qaima Ithamar mah khethah tlim ah, kaminawkw amkhuenghah kahni im ah Merari ih caanawkw mah sak han koi tok ah oh, tiah a naa.

Milu kroekhah

³⁴ Mosi, Aaron hoi amkhueng kaminawkw zaehoikung kacoeh koek mah, angmacae acaeng hoi imthung takoh khosakhah baktih toengah,

Kohath ih caanawkw to kroek o. ³⁵ Kaminawkw amkhuenghah kahni im ah toksak han kangzo, saning qui thumto hoi saning qui pangato kaom nongpa boih, ³⁶ angmacae imthung takoh ih kami to kroek o boih naah, sang hnet, cumvai sarih, qui pangato oh o. ³⁷ Hae kaminawkw loe Angraeng mah Mosi khaeah thuih ih lok baktih toengah, Mosi hoi Aaron mah amkhuenghah kahni im ah toksak hanah kaom Kohath ih caa ah oh o. ³⁸ Gershon ih caanawkw loe angmacae acaeng hoi imthung takoh to kroek o boih. ³⁹ Amkhuenghah kahni im ah toksak han kangzo, saning qui thumto hoi saning qui pangato kaom nongpa boih, ⁴⁰ angmacae ih acaeng hoi imthung takoh to kroek o boih naah, sang hnet, cumvai taruk, qui thumto oh o. ⁴¹ Hae kaminawkw loe Angraeng mah thuih ih lok baktih toengah, Mosi hoi Aaron mah kroek ih, kahni im ah toksah koi kami ah oh o. ⁴² Merari ih caanawkw mah angmacae acaeng hoi imthung takoh to kroek o boih. ⁴³ Kaminawkw amkhuenghah im ah toksak han kangzo kami saning qui thumto hoi saning qui pangato kaom nongpa boih, ⁴⁴ angmacae acaeng hoi imthung takoh to kroek o boih naah, kami sang thum, cumvai hnetto oh o. ⁴⁵ Hae kaminawkw loe Angraeng mah Mosi khaeah thuih ih lok baktih toengah, Mosi hoi Aaron mah kroek ih Merari ih caa ah oh o. ⁴⁶ Levi caanawkw loe Mosi, Aaron hoi Israel zaehoikungnawkw mah, angmacae acaeng hoi imthung takoh to kroek pae boih. ⁴⁷ Kaminawkw amkhuenghah kahni im ah toksak moe, aput han angzo saning qui thumto hoi saning qui pangato kaom nongpa

boih, ⁴⁸ nihcae to kroek o boih naah, sang tazet, cumvai panga, qui tazetto oh o. ⁴⁹ Angraeng mah Mosi khaeah paek ih lok baktih toengah, kami boih mah sak o ih tok hoi apud koi tok to khet moe, nihcae ih milu to a kroek.

5

Ohhaih hmuenciim sakhaih

¹ Angraeng mah Mosi khaeah, ² Ngansae man kami, kahoih thai ai takpum nathaih tawn kami hoi kaciim ai kadueh qok sui Israel kaminawkw loe ataihah ahmuen tasa bangah suem ah; ³ ka ohhaih ahmuen amhnongsak han ai ah, to baktih nathaih tawn kami loe nongpa maw, nongpata maw ohhaih im tasa bangah suem ah, tiah a naa. ⁴ Angraeng mah Mosi khaeah thuih ih lok baktih toengah, Israel kaminawkw mah sak o; to baktih nathaih tawn kami loe ohhaih ahmuen tasa bangah a suek o.

Zu sava nuiah zaehaih

⁵ Angraeng mah Mosi khaeah, ⁶ Israel kaminawkw khaeah hae tiah thui paeh; kaminawkw mah sak o ih zaehaih to nongpa mah maw, nongpata mah maw, Angraeng hmaa ah oep om ai ah sak o pazae pongah, to kami to zaehaih tawn nahaeloe, ⁷ to kaminawkw mah sak o ih zaehaih to taphong han oh; a sakpazae o pongah, a sakpazae o ih kami khaeah ahmuen pangato thungah ahmuen maeto thap ueloe, rong pae boih tih. ⁸ Toe kami maeto mah a sakpazae ih hmuen pongah, rong ih hmuen talawkkung om ai nahaeloe, to

rong ih hmuen to Angraeng ih hmuen ah suek moe, qaima khaeah paek han oh; to pacoengah anih zaehaih loih thai hanah angbawnhah sak hanah tuu tae to paek han oh. ⁹ Israel kaminawkw mah qaima han sin ih ciimcai hmuennawkw boih loe anih ih hmuen ah om tih. ¹⁰ Kami boih mah kaciim ah sin ih hmuennawkw loe, anih ih hmuen ah om tih; kami mah qaima han paek ih tangqumawkw doeh anih ih hmuen ah om tih, tiah thuih paeh, tiah a naa. ¹¹ To pacoengah Angraeng mah Mosi khaeah,

Oep om ai zunawkw kawng

¹² Israel kaminawkw han hae tiah lokthui paeh; kami maeto ih zu loe oep om ai pongah, loklam amkhraeng ving moe, a sava nuiah zaehaih a sak; ¹³ kami maeto mah to nongpata to iih haih, toe a sava khaeah thui ai ah angphat; to nongpata loe ciim ai boeh, toe anih hnukung om ai pongah, mi mah doeh a sak ih zaehaih to naeh thai ai, ¹⁴ toe sava mah a zu loe ciim ai boeh, tiah oep vawthaih to tawnh maw, to tih ai boeh loe a zu nuiah palunghaenghaih a tawnh, toe anih ih zu loe amhnonghaih tidoeh om ai to mah a sava mah anih nuiah palunghaenghaih tawn nahaeloe, ¹⁵ a sava mah a zu to qaima khaeah caeh haih ueloe, barli takaw dip ephah hatu thungah maeto a zu ih zae angbawnhah sak hanah sin tih; takaw dip nuiah situi bawh mak ai, a nuiah hmuihoih doeh thlaek mak ai; to baktih angbawnhah loe zu nuiah palunghaeng pongah, sak ih angbawnhah ah oh moe, zaehaih panoek hanah sak ih angbawnhah ah doeh oh.

¹⁶ Qaima mah to nongpata to caeh haih ueloe, Angraeng hmaa ah angdoesak tih; ¹⁷ to naah qaima mah kaciim tui to long laom thungah lawn ueloe, anih mah kahni imthung ih maiphu to lak pacoengah, tui thungah phuih tih. ¹⁸ Qaima mah nongpata to Angraeng hmaa ah angdoesak ueloe, nongpata ih lu to khuk pae hmoek tih; nongpata nuiah palunghaeng pongah zaehaih panoek hanah sak ih angbawnhaih takaw dip to a ban ah pasumsak tih; qaima mah tangoenghaih kaomsak thaih tui kakhaa to a ban ah sin tih. ¹⁹ Qaima mah nongpata to, Kaw baktih nongpa hoiah doeh na iip ai, oep om ai loklam ah doeh nam khraeng ai moe, na sava laep ah kalah nongpa hoiah takpum amhnonghaih to na sah ai nahaeloe, hae ih tangoenghaih kaomsak thaih tui kakhaa hae na nuiah pha hmah nasoe, tiah thui tih. ²⁰ Toe na sava nuiah oep thok ai ah na oh moe, kalah nongpa hoiah loklam nam khraeng ving; na sava nuiah kalah nongpa hoiah na iih moe, na takpum to amhnong boeh nahaeloe, ²¹ qaima mah nang loe nangmah ih kaminawk salakah, Angraeng mah na phaih to zaeksak ueloe, na zok doeh bawksak tih, to tiah nang loe tangoenghaih zok kami ah na om tih, tiah nongpata khaeah thuih pae pacoengah, nongpata to tangoenghaih lok akamsak tih; ²² tangoenghaih kaomsak hae tui kakhaa hae na zok thungah akun naah, na phaih to zaeksak ueloe, na zok doeh baawk tih, tiah thui pae tih. To naah nongpata mah, Amen, to tiah om nasoe, tiah thui tih.

²³ Hae tangoenghaih lok loe qaima mah cabu

thungah tarik ueloe, kakhaa tui hoiah phrae let tih; ²⁴ qaima mah tangoenghah kaomsak kakhaa tui to nongpata hanah naesak tih; nongpata ih zok thungah tangoenghah kaomsak tui kakhaa akun naah, paroeai khaa pae tih. ²⁵ To pacoengah qaima mah to nongpata ban ah sinsak ih palunghaeng pongah sak ih angbawnhah takaw dip to la ueloe, Angraeng hmaa ah ahaek pacoengah, hmaicam nuiah suem tih. ²⁶ Qaima mah zaehaih panoek han sak ih angbawnhah takaw dip to ban tangsum maeto la ueloe, hmaicam nuiah hmai hoiah thlaek tih; to pacoengah to tui to nongpata hanah naesak tih. ²⁷ To nongpata mah angmah ih sava nuiah zaehaih to sah moe, ciim ai boeh nahaeloe, tangoenghah lokkam ih baktih toengah omsakkung tui kakhaa to naek naah, zok thungah tui to paroeai khaa tih; to naah a phaih to zaek ueloe, a zok doeh baawk tih; to naah to nongpata loe angmah ih kaminawk salakah tangoenghah zok kami ah om tih. ²⁸ Toe nongpata loe ciimcai moe, amhnonghah tidoeh om ai nahaeloe, anih loe zaehaih tawn ai pongah, caa sah let tih.

²⁹ Hae loe zu mah oep kaom ai ah, kalah nongpa hoi loklam amkhraeng ving moe, sava nuiah ciimcai ai ah khosak naah maw, palunghaenghah tawnh naah maw, ³⁰ to tih ai boeh loe nongpa mah a zu nuiah palunghaenghah tawnh naah maw, patoh ih kaalok ah oh; sava mah a zu nuiah palunghaenghah tawnh naah, qaima mah nongpata to Angraeng hmaa ah angdoesak ueloe, hae ih kaalok baktih toengah nongpata to lokcaek tih. ³¹ To tiah sava loe

zaehaih ciim ueloe, nongpata loe a zaehaih pongah danpaekhah to zok tih, tiah thui paeh, tiah a naa.

6

Nazaret kaminawk ih atawk

¹ Angraeng mah Mosi khaeah, ² Israel kaminawk khaeah hae tiah thui paeh; nongpamaw, nongpata maw, angmah hoi angmah to Angraeng han ih ni ka oh, tiah thuih moe, Nazaret kami ah oh hanah amhoe pacoengah, lokkamhah to a sak naah, ³ mu hoi paqui thaih kalah mu maw, misurtui hoiah sak ih misurtui kathaw maw, kalah paqui thaih misurtui hoiah sak ih kathaw tui maw, misurtui hoiah sak ih munawk to naek han om ai; misurthaih doeh caa mak ai, misurthaih kazaek doeh caak han om ai. ⁴ A hing thung misurthing hoi tacawt hmuen roe caak han om ai; amu caak hanah ahin doeh et han om ai.

⁵ Kamhoe ah oh hanah lokkamhah sak nathung, a lu nui ih sam roe aat mak ai; Angraeng khaeah lokkamhah sak baktih toengah, amhoehaih tue akoep ai karoek to, anih loe kaciim ah om ueloe, a lu nui ih sam to kasawk ah pathlung tih. ⁶ Angraeng khaeah amhoehaih atue thung, kadueh kami qok taengah caeh mak ai. ⁷ Angmah ih Angraeng hanah a lu to pahoe pongah, anih loe ampa maw, amno maw, amnawk maw, to tih ai boeh loe a tanu maw dueh cadoeh caeh mak ai. ⁸ Angraeng khaeah pahoe ih kami ah oh nathung, anih loe ciimcai kami ah om tih.

⁹ Poek ai pui hoiah anih taengah kami dueh moeng nahaeloe, pahoe ah kaom a lu nui ih sam to amhnong boeh pongah, ciimcaihaih ni, ni sarihto naah a lu sam to aat tih. ¹⁰ Ni tazetto naah loe pahu, to tih ai boeh loe im ah pacah ih pahu hnetto amkhuenghah kahni im thok taengah, qaima khaeah sin tih. ¹¹ Anih loe kadueh kami mah zaesak boeh pongah, a zaehaih to loihsak hanah, qaima mah pahu maeto zae angbawnhah ah bop ueloe, kalah maeto hmai angbawnhah sah pae tih; to na ni roe ah anih ih lu to kaciim ah suem let tih. ¹² Pahoe ih atue thungah Angraeng khaeah angpaek ueloe, saningto kaom tuucah hoiah zae angbawnhah to sah tih; canghni ah pahoe ih atue thungah ciim ai boeh pongah, hmaloe ih atue to kroek mak ai boeh.

¹³ Nazaret kami ah oh han pahoeahaih atue to boeng naah loe, kaminawk amkhuenghah kahni im akunhah thok taengah anih to caeh hah tih; ¹⁴ to ah anih mah Angraeng khaeah anih han angbawnhah to sah pae tih; coek koi kaom ai saningto kaom tuucah tae maeto, hmai angbawnhah ah paek ueloe, coek koi kaom ai saningto kaom tuucah tala maeto zae angbawnhah ah paek tih; coek koi kaom ai tuu tae maeto doeh angdaeh angbawnhah ah paek tih; ¹⁵ taeh thuh ai ih takaw benthang maeto, situi atok ih takaw kangphaek, situi atok ih takaw kaenaw, cang hoi naek koi tuinaw to nawnto paek tih. ¹⁶ To hmuennaw to qaima mah Angraeng khaeah sin ueloe, zae angbawnhah hoi hmai

angbawnhaih to sah tih. ¹⁷ Qaima mah angdaeh angbawnhaih ah, taeh thuh ai ih takaw benthang maeto hoi tuu tae maeto Angraeng khaeah paek pacoengah, cang hoi naek koi tuinawk doeh paek tih. ¹⁸ To pacoengah kaminawk amkhuenghah kahni im akunhah thok taengah, Nazaret kami mah pahoe ih a lu nui ih sam to aat tih; a sam to angdaeh angbawnhaih hmai thungah va tih. ¹⁹ Pahoe ih sam to aah pacoengah, tui hoi bueh ih tuu palaeng maeto, benthang pong ih taeh thuh ai ih takaw kae hoi taeh thuh ai ih takaw karoem to la ueloe, Nazaret kami ih ban ah suem pae tih; ²⁰ to pacoengah qaima mah to hmuennawk to Angraeng hmaa ah ahaek ih angbawnhaih ah paek tih; to tiah ahaek ih saeok hoi palaeng loe caiimcai moe, qaima han paek ih hmuen ah oh; to pacoengah loe Nazaret kami mah misurtui to nae tih boeh.

²¹ Hae loe amhoehaih atue thungah, Angraeng han hmuen paek moe, lokkamhah sah Nazaret kami ih atawk ah oh; hae hmuen pacoengah angpaekhah kaalok baktiah anih mah sak moe, a lokkamhah baktih toengah akoepsak han oh, tiah thuih paeh, tiah a naa.

Aaron tahamhoih paekhah

²² Angraeng mah Mosi khaeah, ²³ Aaron hoi a caanawk khaeah, Israel kaminawk to hae tiah tahamhoihah paek oh, nihcae khaeah, ²⁴ Angraeng mah tahamhoihah paek nasoe loe, nihcae to toep nasoe; ²⁵ Angraeng mah nangcae nuiah a mikhmai aangsak nasoe loe, tahmen nasoe; ²⁶ Angraeng loe nangcae khaeah angqoi

nasoe loe, monghaih paek nasoe, tiah thui ah.
²⁷ Nihcae mah Israel kaminawk nuihah ka hmin
 to suem o tih, to naah nihcae to tahamhoihaih
 ka paek han, tiah a naa.

7

Kahni im ah paek ih hmuennawk

¹ Mosi mah kahni im sak pacoengah, kahni
 imthung ah kaom hmuennawk, hmaicam
 hoi laom sabaenawk boih to, situi bawh moe, a
 ciimsak. ² To pacoengah kroek ih kami thungah
 kaom, Israel kaminawk ukkung, imthung takoh
 zaehoikung hoi acaeng zaehoikung lu koeknawk
 mah hmuennawk paekhan to sak o. ³ Nihcae mah
 Angraeng paek hanah sin o ih hmuennawk loe,
 ukkung maeto mah maitaw tae maeto, ukkung
 hnetto hanah maitaw mah ruet ih maitaw leeng
 maeto, imphu kaom maitaw leeng tarukto hoi
 maitaw tae hatlai hnetto, kahni imthung ah a
 sin o. ⁴ Angraeng mah Mosi khaeah, ⁵ kaminawk
 amkhuenghah kahni im ah patoh hanah, nih-
 cae mah paek ih hmuennawk to la ah; kami
 boih mah toksak angaihah baktih toengah, to
 hmuennawk to Levi kaminawk han paek ah, tiah
 a naa. ⁶ To pongah Mosi mah maitaw leeng
 hoi maitaw taenawk to lak moe, Levi kaminawk
 hanah paek. ⁷ Toksak angaihah baktih toengah
 anih mah Gershon ih caanawk hanah, maitaw
 leeng hnetto hoi maitaw tae palito paek pae;
⁸ toksak angaihah baktih toengah anih mah
 Merari ih caanawk hanah, maitaw leeng palito
 hoi maitaw tae tazetto paek pae; nihcae loe
 qaima Aaron capa Itharma ukhah tlim ah oh

o. ⁹ Hmuenciim ah toksah Kohath ih caanawkw loe, angmacae palaeng hoi aput koi tok to a sak o pongah, nihcae han maitaw leeng hoi maitaw taenawkw to paek o ai. ¹⁰ Hmaicam situi bawh na niah, ukkungnawkw mah hmaicam tathlanghah hmuennawkw to hmaicam hmaa ah paek o. ¹¹ Angraeng mah Mosi khaeah, Hmaicam tathlang hanah ukkung maeto boih mah ni thokkruek hmuen to paek o tih, tiah a naa.

¹² Hmaloe koek niah Judah acaeng Amminadab capa Nashon mah, tathlang ih hmuen to sinh; ¹³ anih mah paek ih hmuennawkw loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih tui pathaek naah patoh ih sabae kathuk maeto, cang hoi angbawnhah sak hanah suek ih sabae hnetto kakoi situi hoi atok tangcae takaw dip; ¹⁴ shekel hatu kazit hmuihoih koimong ah suek ih sui sabae maeto, ¹⁵ angbawnhah paek hanah maitaw tae maeto, tuu tae maeto hoi saningto kaom tuuca maeto; ¹⁶ zae angbawnhah hanah maeh caa maeto, ¹⁷ to pacoengah angdaeh angbawnhah sak hanah, maitaw tae hnetto, tuu tae pangato, maeh tae pangato, saningto kaom tuuca pangato a sinh; hae loe Amminadab capa Nashon mah paek ih hmuennawkw ah oh. ¹⁸ Ni hnetto na naah Issakar ih acaeng ukkung, Zuar capa Nethanel mah tathlang ih hmuen to sinh; ¹⁹ anih mah sin ih hmuennawkw loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui

sarihto kazit sum kanglung hoiah sak ih sabae kathuk maeto, cang hoi angbawnhah sak hanah suek ih sabae hnetto kakoi situi hoi atok tangcae ih takaw dip; ²⁰ shekel hatu kazit, hmuihoih koimong ah suek ih sui sabae maeto, ²¹ hmai angbawnhah sak hanah, saning kanawk maitaw maeto, tuu tae maeto hoi saningto kaom tuucaa maeto, ²² zae angbawnhah sak hanah maeh caa maeto, ²³ angdaeh angbawnhah sak hanah paek ih maitaw tae hnetto, tuu tae pangato, maeh tae pangato hoi saningto kaom tuucaa pangato a sinh; hae loe Zuar capa Nethanel mah paek ih hmuennawk ah oh.

²⁴ Ni thumto naah, Zebulun caanawk zae-hoikung, Helon capa Eliab mah tathlang ih hmuen to sinh; ²⁵ anih mah paek ih hmuennawk loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhah sak han suek ih sabae hnetto koiah situi hoi atok tangcae ih takaw dip; ²⁶ shekel hatu kazit hmuihoih koimong ah suek ih sui sabae maeto, ²⁷ hmai hoi angbawnhah sak hanah, saning kanawk maitaw tae maeto, tuu tae maeto hoi saningto kaom tuucaa maeto, ²⁸ zae angbawnhah sak hanah, maeh caa maeto, ²⁹ angdaeh angbawnhah sak hanah paek ih maitaw tae hnetto, tuu tae pangato, maeh tae pangato hoi saningto kaom tuucaa pangato a sinh; hae loe Helon capa Eliab mah paek ih hmuen ah oh. ³⁰ Ni palito naah loe Reuben caanawk zaehoikung, Sheudeur capa Elizur mah

tathlang ih hmuennawk to sinh; ³¹ anih mah paek ih hmuennawk loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhah sak hanah suek ih sabae hnetto kakoi situi hoi atok tangcae ih takaw dip; ³² Shekel hatu kazit hmuihoih koimongah suek ih sui sabae maeto, ³³ hmai hoi angbawnhah sak hanah, saning kanawk maitaw tae maeto, tuu tae maeto hoi saningto kaom tuuca maeto, ³⁴ zae angbawnhah sak hanah maeh caa maeto, ³⁵ angdaeh angbawnhah sak hanah maitaw tae hnetto, tuu tae pangato, maeh tae pangato hoi saningto kaom tuuca pangato a sinh; hae loe Shedeur capa Elizur mah paek ihhmuennawk ah oh.

³⁶ Ni pangato naah loe Simeon caanawk zae-hoikung, Zurishaddai capa Shelumiel mah tathlang ih hmuennawk to sinh. ³⁷ Anih mah paek ih hmuennawk loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhah sak hanah suek ih sabae hnetto kakoi situi hoi atok tangcae ih takaw dip; ³⁸ shekel hatu kazit hmuihoih koiah suek ih sui sabae maeto, ³⁹ hmai hoi angbawnhah sak hanah, saning kanawk maitaw tae maeto, tuu tae maeto hoi saningto kaom tuuca maeto, ⁴⁰ zae angbawnhah sak hanah maeh caa maeto, ⁴¹ to pacoengah angdaeh angbawnhah sak hanah maitaw tae hnetto, tuu

tae pangato, maeh tae pangato hoi saningto kaom tuuca a sinh; hae loe Zurishaddai capa Shelumiel mah paek ih hmuennawkw ah oh. ⁴² Ni tarukto naah Gad caanawkw zaehoikung, Deuel capa Eliasaph mah tathlang ih hmuenu to sinh. ⁴³ Anih mah paek ih hmuennawkw loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhah sak han suek ih sabae hnetto kakoi situi hoi atok tangcae ih takaw dip; ⁴⁴ shekel hatu kazit hmuihoih koimong ah suek ih sui sabae maeto, ⁴⁵ hmai hoi angbawnhah sak hanah saning kanawkw maitaw tae maeto, tuu tae maeto hoi saningto kaom tuuca maeto; ⁴⁶ zae angbawnhah sak hanah, maeh caa maeto, ⁴⁷ angdaeh angbawnhah sak hanah maitaw tae hnetto, tuu tae pangato, maeh tae pangato hoi saningto kaom tuuca pangato a sinh; hae loe Deuel capa Eliasaph mak paek ih hmuennawkw ah oh.

⁴⁸ Ni sarihto naah Ephraim caanawkw zaehoikung, Ammihud capa Elishama mah tathlang ih hmuenu to sinh. ⁴⁹ Anih mah paek ih hmuenu loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhah sak hanah suek ih sabae hnetto kakoi situi hoi atok tangcae ih takaw dip; ⁵⁰ shekel hatu kazit hmuihoih koimong ah suek ih sui sabae maeto, ⁵¹ hmai hoi angbawnhah

sak hanah saning kanawkw maitaw tae maeto, tuu tae maeto hoi saningto kaom tuuca maeto, ⁵² zae angbawnhaih sak hanah maeh caa maeto, ⁵³ angdaeh angbawnhaih sak hanah maitaw tae hnetto, tuu tae pangato, maeh tae pangato hoi saningto kaom tuuca pangato a sinh; hae loe Ammihud capa Elishama mah paek ih hmuen ah oh.

⁵⁴ Ni tazetto naah Manasseh ih caanawkw za-ehoiukung, Pedahzur capa Gamaliel mah tathlang ih hmuen to sinh. ⁵⁵ Anih mah paek ih hmuennawkw loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhaih sak hanah suek ih sabae hnetto kakoi situi hoi atok tangcae ih takaw dip; ⁵⁶ shekel hatu kazit hmuihoih koimong ah suek ih sui sabae maeto, ⁵⁷ hmai angbawnhaih sak hanah saning kanawkw maitaw tae maeto, tuu tae maeto hoi saningto kaom tuuca maeto, ⁵⁸ zae angbawnhaih hmuen paek hanah maeh caa maeto, ⁵⁹ angdaeh angbawnhaih hmuen paek hanah maitaw tae hnetto, tuu tae pangato, maeh tae pangato hoi saningto kaom tuuca pangato a sinh; hae loe Pedahzur capa Gamaliel mah paek ih hmuen ah oh.

⁶⁰ Ni takawtto naah, Benjamin kaminawkw za-ehoiukung, Gideoni capa Abidan mah tathlang ih hmuen to sinh. ⁶¹ Anih mah paek ih hmuennawkw loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit

sum kanglung hoiah sak ih sabae kathuk maeto, cang hoi angbawnhah sak hanah suek ih sabae hnetto kakoi situi hoi atok tangcae ih takaw dip; ⁶² shekel hato kazit hmuihoih koimong ah suek ih sui sabae maeto, ⁶³ hmai hoi angbawnhah sak hanah saning kanawk maitaw tae maeto, tuu tae maeto hoi saningto kaom tuuca maeto; ⁶⁴ zae angbawnhah sak hanah maeh caa maeto, ⁶⁵ angdaeh angbawnhah sak hanah maitaw tae hnetto, tuu tae pangato, maeh tae pangato hoi saningto kaom tuuca pangato a sinh; hae hmuennawk loe Gideoni capa Abidan mah sinh.

⁶⁶ Ni hato naah Dan ih caanawk zaehoikung, Ammishaddai capa Ahiezer mah tathlang ih hmuen to sinh. ⁶⁷ Anih mah paek ih hmuennawk loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhah sak hanah suek ih sabae hnetto kakoi situi hoi atok tangcae ih takaw dip; ⁶⁸ shekel hato kaom hmuihoih koimong ah suek ih sui sabae maeto, ⁶⁹ angdaeh angbawnhah sak hanah saning kanawk maitaw tae maeto, tuu tae maeto hoi saningto kaom tuuca maeto, ⁷⁰ zae angbawnhah sak hanah maeh caa maeto, ⁷¹ angdaeh angbawnhah sak hanah maitaw tae hnetto, tuu tae pangato, maeh tae pangato, saningto kaom tuuca pangato a sinh; hae loe Ammishaddai capa Ahiezer mah paek ih hmuen ah oh.

⁷² Khrah hatlaito niah loe Asher ih caanawk zaehoikung, Okran capa Pagiel mah tathlang ih

hmuen to sinh. ⁷³ Anih mah paek ih hmuennawk loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhah sak han suek ih sabae hnetto kakoi situi hoi atok tangcae ih takaw dip; ⁷⁴ shekel hato kazit hmuihoih koimong ah suek ih sui sabae maeto, ⁷⁵ angdaeh angbawnhah sak hanah saning kanawk maitaw tae maeto, tuu tae maeto hoi saningto kaom tuuca maeto, ⁷⁶ zae angbawnhah sak hanah maeh caa maeto, ⁷⁷ angdaeh angbawnhah sak hanah paek ih maitaw tae hnetto, tuu tae pangato, maeh tae pangato hoi saningto kaom tuu caa pangato a sinh; hae loe Okran capa Pagi el mah paek ih hmuen ah oh.

⁷⁸ Hatlai hnetto niah Naphtali zaehoikung, Enan capa Ahira mah tathlang ih hmuen to sinh. ⁷⁹ Anih mah paek ih hmuennawk loe, hmuenciim ih shekel baktih toengah, shekel cumvai, qui thumto kazit sum kanglung hoiah sak ih sabae maeto, shekel qui sarihto kazit sum kanglung hoiah sak ih sabae kathuk maeto, cang hoi angbawnhah sak han suek ih sabae hnetto kakoi situi hoi atok tangcae ih takaw dip; ⁸⁰ shekel hato kazit hmuihoih suek haih sui sabae maeto, ⁸¹ hmai angbawnhah sak hanah saning kanawk maitaw tae maeto, tuu tae maeto hoi saningto kaom tuuca maeto, ⁸² zae angbawnhah sak hanah maeh caa maeto, ⁸³ angdaeh angbawnhah sak hanah maitaw tae hnetto, tuu tae pangato, maeh tae pangato hoi saningto kaom

tuucaa pangato a sinh; hae loe Enan capa Ahira mah paek ih hmuen ah oh.

⁸⁴ Israel zaehoikungnawkw mah, situi bawh moe, hmaicam tathlanghah niah paek o ih hmuennawkw loe, sum kanglung hoiah sak ih sabae hatlai hnetto, sum kanglung hoiah sak ih sui sabae kathuk hatlai hnetto hoi sui kathlah hatlai hnetto oh; ⁸⁵ sum kanglung sabae maeto naah shekel cumvai, qui thumto azit; sum kanglung hoiah sak ih sabae kathuk loe shekel qui sarihto azit; hmuenciim ih shekel baktih toengah, sum kanglung hoiah sak ih laom sabaenawkw loe sangqum boih ah shekel sang hnetto pacoeng, cumvai palito azit. ⁸⁶ Hmuenciim ah suek ih shekel baktih toengah, hmuihoih koimong ah suek ih sui kathlah hatlai hnetto loe shekel hato azit; sui kathlahnawkw loe sangqum boih ah shekel cumvai, pumphae to azit. ⁸⁷ Hmai angbawnhah sak hanah, cang hoi nawnto a sin o ih moinawkw boih loe, maitaw tae hatlai hnetto, tuu tae hatlai hnetto hoi saningto kaom tuucaa tae hatlai hnetto oh moe, zae angbawnhah sak hanah maeh caa hatlai hnetto a sin o. ⁸⁸ Angdah angbawnhah sak hanah sin o ih moinawkw boih loe, saning kanawkw maitaw tae pumphae palito, tuu tae qui tarukto, maeh tae qui tarukto hoi saningto kaom tuucaa qui tarukto oh. Hae tiah paek ih hmuennawkw loe situi bawh moe, hmaicam tathlanghah niah a paek o.

⁸⁹ Mosi loe Angraeng hoi lokpaeh hanah kaminawkw amkhuenghah kahni imthung ah akun naah, cherubim hnetto salak, hnukung thingkhong suekhah ranuih ah kaom palung-

nathaih ahmuen hoiah thuih ih lok to a thaih;
to tiah Angraeng mah Mosi khaeah lokthuih pae.

8

Hmaithaw thlaekhaih

¹ Angraeng mah Mosi khaeah, ² Aaron han, Hmaiim na thlaek naah, hmaiim sarihto paang-haih tung hmabang ah thlaek hanah thui paeh, tiah a naa. ³ To naah Aaron mah to tiah a sak; Angraeng mah Mosi khaeah thuih ih lok baktih toengah, anih mah hmaiim tung hmabang ah hmaiim to angqoisak boih. ⁴ Hmaiim tung loe, Angraeng mah Mosi khaeah patuek ih krang baktih toengah a sak; takung hoi tadong khoek to sui hoiah a sak.

Levi kaminawk ciimsakhaih

⁵ Angraeng mah Mosi khaeah, ⁶ Israel kaminawk salak hoi Levinawk to la ah loe, ciimsak ah. ⁷ Nihcae ciimsak hanah, hae tiah sah ah; ciimsakhaih tui to nihcae nuih bawh ah; nganmui to aat o nasoe loe, khukbuennawk doeh masuk o nasoe, to tiah ciimsak ah. ⁸ Saning kanawk maitaw tae maeto, cang hoi angbawnhaih sak ih baktiah, situi hoiah atok tangcae ih takaw dip hoi nawnto, zae angbawnhaih sak hanah, kalah saning kanawk maitaw tae maeto sin nasoe. ⁹ Levinawk to amkhuenghaih kahni im hmabang ah angzosak ah loe, Israel acaeng kaminawk to nawnto amkhuengsak boih ah; ¹⁰ Levinawk to Angraeng hmaa ah hoi ah; to naah Israel kaminawk mah nihcae nuih ban koeng o tih.

¹¹ Israel kaminawk mah tathlang o ih hmuen ah, Aaron mah Levinawk to Angraeng khaeah tathlang tih; to naah nihcae mah Angraeng ih tok to sah o tih. ¹² Levi kaminawk mah maitaw lunawk nuiah ban koeng o tih; Levi kaminawk zae angbawnhaih sak hanah maitaw maeto, hmai hoi angbawnhaih sak hanah kalah maitaw maeto Angraeng khaeah paek ah. ¹³ Levi kaminawk to Aaron hoi a caanawk hmaa ah angdoesak ah loe, nihcae to tathlang ih hmuen ah Angraeng khaeah paek ah.

¹⁴ Hae tiah Levi kaminawk to Israel kaminawk salak hoi pahoe ah; Levinawk loe kai ih hmuen ah om o tih. ¹⁵ To tiah Levinawk ciimsak hanah na tathlang pacoengah ni, nihcae loe amkhuenghaih ahmuen ah toksak han caeh o vop tih. ¹⁶ Nihcae loe Israel kaminawk thungah kai khaeah takpum angpaek boih kami ah oh o; zok thung hoi tacawt kami boih, Israel kaminawk ih calu boih zuengah nihcae to ka lak boeh. ¹⁷ Kami maw, moi maw, Israel kaminawk ih calu boih loe kai ih ni; Izip prae ih calu to ka tamit boih naah, nihcae to kaimah hanah ka pahoe boeh. ¹⁸ Israel kaminawk thung ih calu boih zuengah, Levinawk to ka lak boeh. ¹⁹ Israel kaminawk hmuenciim ah caeh o naah, nathaih kasae a tongh o han ai ah, amkhuenghaih kahni im ah tok to sak o moe, Israel caanawk akrang-haih to a sak o hanah, Israel kaminawk thungah Levi kaminawk loe Aaron hoi a caanawk hanah tangqum ah ka paek boeh, tiah a naa.

²⁰ Levi kawng pongah, Angraeng mah Mosi khaeah thuih ih lok baktih toengah, Mosi, Aaron

hoi Israel acaengnawkw mah, Levinawkw nuiah sak o. ²¹ Levinawkw loe ciimcai o moe, khukbuenawkw to masuk o; Aaron mah nihcae han paek ih hmuen baktih toengah, Angraeng khaeah a paek moe, nihcae ciim hanah angbawnhaih to a sak pae. ²² Levi kawng pongah, Angraeng mah Mosi khaeah thuih ih lok baktih toengah, kaminawkw mah sak o; to pacoengah Levinawkw loe kahni im ah toksak hanah, Aaron hoi a caanawkw hma ah caeh o.

²³ To pacoengah Angraeng mah Mosi khaeah, ²⁴ Levi kaminawkw loe saning pumphae pangato akoep pacoengah ni, amkhuenghaih kahni im ah toksak han caeh o vop tih; hae loe Levinawkw mah sak han koi tok ah oh. ²⁵ Toe saning qui pangato akoep naah loe, kahni im thungah toksakhaih hoiah anghak o tih; toksah o mak ai boeh; ²⁶ Angmaceae nawkamyanawkw hoi nawnto toksah o tih; toe nihcae loe toksah o mak ai boeh. Hae tiah Levi kaminawkw mah sak han koi tok to sah paeh, tiah a naa.

9

Misong loihhaih

¹ Izip prae hoi tacawt o pacoeng, saning hnetto haih, khrah hmaloe koek naah, Sinai praezaek ah Angraeng mah Mosi khaeah, ² atue phak naah Israel kaminawkw misong loihaih ni to uumsak ah. ³ Sakhaih atawkw baktih, sakhaih daan baktih toengah, hae khrah hatlai palito, duembang phak naah loe, uumhaih poi to sah oh, tiah a naa. ⁴ To pongah Mosi mah Israel kaminawkw khaeah,

misong loihaih poih to sak o hanah a thuih pae. ⁵ To pongah khrah tangsuek, ni hatlai palito naah, Sinai praezaek ah misong loihaih poih to a sak o; Angraeng mah Mosi khaeah thuih ih lok baktih toengah, Israel kaminawk mah sak o. ⁶ Toe kadueh kami pongah kaciim ai thoemto kaminawk loe, misong loihaih poih to sah o thai ai pongah, Mosi hoi Aaron khaeah angzoh o moe, ⁷ Mosi khaeah, Kadueh kami pongah kaicae loe ka ciim o ai boeh; tipongah atue phak naah kalah Israel kaminawk baktih toengah, Angraeng khaeah hmuen tathlanghah nang sahsak ai loe? tiah a naa o. ⁸ Mosi mah nihcae khaeah, Nangcae kawng pongah Angraeng mah lok na paek ai karoek to, zing o raeh, tiah a naa. ⁹ To naah Angraeng mah Mosi khaeah, ¹⁰ Israel kaminawk khaeah, Nangcae hoi na caanawk loe kadueh kami pongah ciimcai ai ah na oh o moe, kholong kangthla ah na caeh o cadoeh, misong loihaih poih to na sah o thai tih. ¹¹ Khrah hnetto haih, ni hatlai palito, duembang ah sah oh; nihcae mah tuuca mo hoi aan kakhaa to taeh thuh ai ih takaw hoiah nawnto caak o han oh. ¹² Moi to khawnbang khoek to amlai o sak han om ai; ahuh to khaek ai ah, misong loihaih poih sakhaih atawk baktih toengah sak o han oh. ¹³ Toe amhnonghah om ai, kholong ah doeh caeh ai to mah, misong loihaih poih to sah ai kami loe, atue phak naah Angraeng khaeah hmuen tathlanghah sah ai pongah, anih to angmah ih kaminawk salak hoiah takhoe ving han oh; anih loe zaehaih atho

to hnu tih. ¹⁴ Nangcae khaeah kaom angvin mah Angraeng hanah misong loihaih ni to uum han koeh nahaeloe, sak zong ih misong loihaih baktih, poih sakhaih atawk baktih toengah a sak han oh; prae kami hoi angvin hanah poih sakhaih dan kangvan ah sah paeh, tiah a naa.

Tamai mah zaehhah

¹⁵ Kahni im sakhaih niah, hnukung ah kaom, kahni im to tamai mah khuk hmoek; duembang hoi akhawnbang khoeek to kahni im ranui ah hmai baktiah amtueng. ¹⁶ To tiah oh poe; athun ah tamai mah khuk moe, aqum ah hmai baktiah amtueng. ¹⁷ Tamai mah kahni im to caehtaak naah, Israel kaminawk kholong caeh o moe, tamai tabok naah, Israel kaminawk mah im to sak o. ¹⁸ Angraeng mah paek ih lok baktih toengah, Israel kaminawk kholong caeh o moe, Angraeng mah paek ih lok baktih toengah nihcae mah im to sak o; kahni im nuiah tamai oh nathung, nihcae loe angmacae ih kahni im ah anghak o. ¹⁹ Kahni im nuiah atue kasawk ah tamai oh naah, Israel kaminawk kholong caeh o ai, Angraeng mah paek ih lok to a zing o. ²⁰ Kahni im nuiah atue setta thung tamai tabok naah loe, Angraeng mah paek ih lok baktih toengah anghak o; to pacoengah Angraeng mah paek ih lok baktih toengah kholong caeh o let. ²¹ Duembang hoi akhawnbang khoeek to tamai tabok moe, akhawnbang ah tamai van bangah angkhong tahang naah, Israel kaminawk kholong caeh o; khodai ah doeh, khoving ah doeh, tamai angkhong tahang kruek, kholong a

caeh o. ²² Kahni im nuiah ni hnetto maw, to tih ai boeh loe khrah to maw, to tih ai boeh loe saningto maw, tamai mah khuk nahaeloe, Israel kaminawk loe tamai oh nathung kholong caeh o mak ai, anghak o tih; toe tamai van ah anghong tahang nahaeloe, nihcae mah kholong caeh amsak o tih. ²³ Angraeng mah paek ih lok baktih toengah, nihcae loe im ah anghak o moe, Angraeng mah paek ih lok baktih toengah, nihcae loe kholong caeh amsak o; Angraeng mah Mosi ban ah paek ih lok baktih toengah, Angraeng ih lok to tahngaih o.

10

Sum kanglung hoi sak ih mongkah hnet to

¹ Angraeng mah Mosi khaeah, ² kaminawk amkhueng o naah kawkhaih, ataihah ahmuen maeto pacoeng maeto bang angpuen naah patoh hanah, sum kanglung hoiah mongkah hnetto sah ah; ³ mongkah na ueng o hmaek naah, acaeng kaminawk boih angkhuenghah kahni im thok taengah, nang ih ahma ah amkhueng o boih tih. ⁴ Mongkah maeto khue ueng nahaeloe, ukkungnawk hoi Israel ukkung lu koeknawk to na hma ah amkhueng o tih. ⁵ Acoe paekhah mongkah to ueng naah, ni angyae bangah kaom kaminawk to hmabang ah caeh o tih. ⁶ Acoe paekhah mongkah vai hnetto ueng naah, aloih bang ataihah ahmuen ah kaom kaminawk to caeh o tih; acoe paekhah mongkah lok loe nihcae caeh han angmathaih lok ah om tih. ⁷ Kaminawk amkhueng o hanah, mongkah to

ueng ah; toe kanghmong acoe paekhaih to ueng hmah. ⁸ Aaron caanaww hoi qaimanaww mah mongkah to ueng o tih; hae loe na caanaww dung khoeek to sak han koi hmuen ah om tih. ⁹ Na prae thungah nangcae pacaekthlaek misanaww to tuk hanah na caeh o naah, acoe paekhaih lok hoi mongkah to nawnto ueng ah; to naah na Angraeng Sithaw mah nangcae to panoek ueloe, na misanaww ban thung hoiah pahlong tih. ¹⁰ Nangcae loe nawmhaih atue, poihsakhaih atue, khrah kangtha uumhaih atue ah na Angraeng Sithaw na panoek o thai hanah, angbawnhaih hoi angdaeh angbawnhaih sak naah mongkah to ueng oh; Kai loe na Angraeng Sithaw ah ka oh, tiah a naa.

Sinai mae hoi tacawthaih

¹¹ Saning hnet, khrah hnetto haih, ni pumphae to naah, hnukung ah kaom kahni im ranui ih tamai to van bangah angkhoeng tahang. ¹² To naah Israel kaminaww loe kholong caeh han Sinai praezaek hoiah anghawk o; to pacoeng ah Paran praezaek ah tamai to anghak let. ¹³ Angraeng mah Mosi khaeah paek ih lok baktih toengah, hae loe nihcae hmaloe koek kholong caehhaih ah oh. ¹⁴ Judah kaminaww loe angmacae angmathaih kahni to sin o moe, ataihaih ahmuen hoiah hmaloe koek ah caeh o; Amminadab capa Nashon loe nihcae ukkung ah oh. ¹⁵ Zuar capa Nathanel loe Issakar acaeng zaehoikung ah oh. ¹⁶ Helon capa Eliab loe Zebulun acaeng zaehoikung ah oh.

¹⁷ To pacoengah kahni im to phraek o, Gershon hoi Merari ih caanawkw mah aput o moe, a caeh o. ¹⁸ To pacoengah Reuben kaminawkw mah angmacae angmathaih kahni to sin o moe, ohhah ahmuen hoiah hmabang ah caeh o; Shedeur capa Elizur loe nihcae zaehoikung ah oh. ¹⁹ Zurshaddai capa Shelumiel loe Simeon acaeng zaehoikung ah oh. ²⁰ Deuel capa Eliasaph loe Gad acaeng zaehoikung ah oh.

²¹ To pacoengah Kohath acaegnawkw mah hmuenciim ih hmuenmaenawkw to aput o moe, hmabang ah caeh o; hmaloe caeh kaminawkw mah nihcae pha ai naah kahni im to sak o. ²² Ephraim kaminawkw loe angmacae angmathaih kahni to sin o moe, ataihah hmuen hoiah hmaloe koek ah caeh o; Ammihud capa Elishama loe nihcae zaehoikung ah oh. ²³ Pehdazur capa Gamaliel loe Manasseh acaeng zaehoikung ah oh. ²⁴ Gideoni capa Abidan loe Benjamin acaeng zaehoikung ah oh.

²⁵ Hnukkhuem koek ah, Dan kaminawkw loe angmacae angmathaih kahni to sin o moe, ataihah ahmuen hoiah hmabang ah caeh o; Ammishaddai capa Ahiezer loe nihcae zaehoikung ah oh. ²⁶ Okran capa Pagiell loe Asher acaeng zaehoikung ah oh. ²⁷ Enan capa Ahira loe Naphatali acaeng zaehoikung ah oh. ²⁸ Hae loe Israel kaminawkw kholong caeh naah, angmacae acaeng maeto pacoeng maeto caehhah dan ah oh.

²⁹ Angraeng mah, Mosi khaeah paek ih lok baktih toengah, Mosi mah Midian prae, Mosi ih amsae, Raguel capa Hobab khaeah, Angraeng

mah nangcae khaeah ka paek han, tiah lokkam ih prae thungah vaihi ka caeh o; kaicae hnukah bang ah, Angraeng mah Israel kaminawk ih khosak hoihaih kawng to thuih boeh pongah, nang to kang tahmen o han hmang, tiah a naa. ³⁰ Hobab mah anih khaeah, Ka caeh mak ai; ka prae hoi kaimah ih kaminawk khaeah ni ka caeh han, tiah a naa. ³¹ Toe Mosi mah, Kaicae hae na caehtaak hmah; kaicae loe praezaek ah ka tai o han vop, tito na panoek; nang loe kaicae ih mik ah na oh. ³² Kaicae hoi nawnto nang zoh nahaeloe, Angraeng mah kaicae khaeah paek ih kahoih hmuen, nang han doeh kang pazet o toeng han, tiah a naa.

³³ To pongah Angraeng ih mae hoiah anghawk o moe, ni thumto caehhaih kangthla ahmuen ah a caeh o; ni thumto kholong caeh nathung, Angraeng lokkamhaih thingkhong loe, nihcae ataihaih ahmuen to pakrong pae hanah, nihcae hmaa ah caeh. ³⁴ Khodai ah nihcae kholong caeh o naah, Angraeng ih tamai loe nihcae nuiah oh poe.

³⁵ Thingkhong hmabang ah caeh naah, Mosi mah, Aw Angraeng, Anghawk ah! Na misanawk loe amhet o phang nasoe loe, nang hnuma kaminawk to na hma ah cawn o nasoe, tiah a naa. ³⁶ Anghakhaih ahmuen to a phak o naah, Kroek laek ai Israel kaminawk khaeah, Aw Angraeng, amlaem let lai ah, tiah a naa.

11

Kaminawk laisaephaih

¹ 1 Kaminawk mah laisaep thui ih lok to Angraeng mah thaih naah, palungphui hmai baktiah amngaeh; to pongah Angraeng ih hmai mah nihcae salak to kangh moe, kangthla koek ohhah ahmuen taeng ih thoemto kaminawk to duek o. ² To naah kaminawk loe Mosi khaeah hangh o; Mosi mah Angraeng khaeah lawkthuih naah, hmai to duek let. ³ Angraeng ih hmai mah nihcae salak to kangh pongah, to ahmuen to Taberah, tiah kawc o.

Angraeng mah kuikoem paek

⁴ Israel kaminawk hoi nawnto kaom prae kalah kaminawk loe, zok amthlam o; Israel kaminawk doeh qah o moe, mi mah maw ka caak o hanah moi na paek tih? ⁵ Izip prae ah atho paek ai ah caak ih tanga moi, paye thaih, yaengkaem thaih, rasawn kathim hoi kanglung rasawn, kalah congca aannawc to ka poek o parai boeh; ⁶ toe vaihi loe ka hing o haih thazok sut boeh; hae ih manna khue ai ah loe, kalah tidoeh hnuk han koi om ai, tiah a thuih o.

⁷ Manna loe Coriander thingthai mu baktiah oh moe, arong loe bedellium thingthai mu hoiah anghmong. ⁸ Kaminawc loe caeh o moe, Manna akhuih o pacoengah, daengh o moe, long laom pongah takaw baktiah pahaih o; to loe situi hoiah haek ih takaw baktiah khraem. ⁹ Ataihah ahmuen ah aqum ih dantui krak naah, manna doeh dantui hoi nawnto krak toeng.

¹⁰ To naah kami boih angmacae ih thok taengah, angmacae imthung takoh boih hoi nawnto

qahhaih lok to Mosi mah thaih; Angraeng loe palungphui parai pongah, Mosi doeh poek nawm ai. ¹¹ To pongah Mosi mah Angraeng khaeah, Tipongah na tamna raihah nang paek loe? Tikhoe na hmaa ah mikcuk naakrak ah ka om ai to mah, hae kaminawk boih ih hmuenzit ka nuiah nam tik loe? ¹² Hae kaminawk loe kai mah zok ah ka pomh ih kaminawk maw, tikhoe nawkta tapenkung mah nawkta to tapom baktih toengah, hae kaminawk hae ka ban ah tapom moe, nihcae ampanawk khaeah paek hanah lok na kam ih, prae thungah caeh haih hanah nang thuih loe? ¹³ Hae kaminawk hanah naa ih moi maw ka la pae thai tih? Nihcae mah kai khaeah, Caak han moi na paek ah, tiah ang hnik o. ¹⁴ Hae kaminawk hae kaimah bueng ka hoi thai mak ai; hae hmuen loe kai hanah azit hmoek. ¹⁵ To tiah kai hae nang ohsak moe, na mikhnuk ah koeh koiah ka oh nahaeloe, vaihiah na hum halat ah! Amtanghah na hnusak hma ah, tiah a naa.

Kacohtanawk qui sarihto

¹⁶ Angraeng mah Mosi khaeah, Israel kacohtanawk qui sarihto hoi zaehoikungnawk, na panoek ih ukkungnawk to nangmah hoi nawnto amkhuenghah kahni im ah angdoet o thai hanah, kai khaeah angzo haih ah. ¹⁷ To ah nang hoi lokthuih hanah kang zoh tathuk han; na nuiah kaom pakhra to ka lak moe, nihcae nuiah ka suek han; hae kaminawk hae nangmah bueng na hoi mak ai, kaminawk ih hmuen kazit to nihcae mah na lawn o tih. ¹⁸ Kaminawk khaeah hae tiah thui paeh; khawnbang hanah ciimcai oh, moi to na caa o tih; nangcae mah,

Mi mah maw caak han moi na paek tih? Izip prae ah loe khosak kahoih ah ka oh o, tiah na qah o haih lok Angraeng mah thaih boeh pongah, Angraeng mah moi na paek o ueloe, na caa o tih boeh. ¹⁹ Nito, ni hnetto, ni pangato, ni hato, ni pumphae to khue na caa o mak ai; ²⁰ na hnah thung hoiah moi tacawt moe, na panuet o sut khoek to, khrato thung moi to na caa o poe tih; nangcae salakah kaom Angraeng to khet na patoek o moe, tih pongah maw Izip prae to ka caeh o taak? tiah anih hmaa ah na qah o pongah, khrah to thung moi to na caa o tuek tih, tiah a naa. ²¹ Toe Mosi mah loe, Kai hoi nawnto kholong caeh kami sang cumvai tarukto oh o; khrah to thung caak poe han ih moi to kang paek han, tiah na thuih. ²² Nihcae caak kakhawt ah maitaw hoi tuunawk to boh han maw? Tuipui ih tanganawk boih naeh cadoeh, nihcae caak han khawt tih maw? tiah a naa. ²³ Angraeng mah Mosi khaeah, Angraeng ih ban loe duem tet maw? Ka thuih ih lok baktih toengah nangcae khaeah oh maw, om ai, tito vaihi na hnu tih, tiah a naa.

²⁴ Mosi loe caeh moe, Angraeng mah thuih ih loknawk to kaminawk khaeah thuih pae; nihcae thung ih kacoeha qui sarihto a kawm moe, kahni im taengah ohsak. ²⁵ To naah Angraeng loe tamai hoiah anghum tathuk moe, anih khaeah lokthuih; anih nui ah kaom Pakhra to a lak moe, kacoeha qui sarihto nuiah a suok; nihcae nuiah Pakhra oh naah, nihcae loe boeng ai ah lok taphong o.

²⁶ Toe kami hnetto, Eldad hoi Medad loe

ataihaih ahmuen ah oh hoi poe; nihnik doeh kacoeha thungah athum hoi toeng, toe kahni im taengah caeh hoi ai; nihnik nuiah doeh Pakhra to oh pongah, atai hoi haih ahmuen ah lok taphong hoi toeng. ²⁷ Thendoeng maeto loe cawnh moe, Mosi khaeah, Eldad hoi Medad hnik doeh ataihaih im ah lok taphong hoi toeng, tiah a naa. ²⁸ Mosi ih tamna, thendoeng, Nun capa Joshua mah, Ka angraeng Mosi, nihnik to lokthuih anghaksak ah, tiah a naa. ²⁹ Toe Mosi mah anih khaeah, Ka nuiah uthaih palungthin na tawnh maw? Angraeng ih kaminawk loe tahmaa ah ni oh o boih, Angraeng mah nihcae nuiah angmah ih Muithla to suem tih, tiah a naa. ³⁰ To pacoengah Mosi hoi Israel kacoehtanawk loe a oh o haih im ah amlaem o let.

Sithaw mah kuikoem thak pae

³¹ To naah Angraeng khae hoiah takhi to songh moe, nihcae ataihaih im hae bang hoi ni to caehhaih loklam, ho bang hoiah doeh ni to caehhaih loklam karoek to, tuipei hoiah kuikoem to a sin pae; long hoi dong hnetto kathah ah angpopsak. ³² To naah kaminawk mah athun qui, aqum puek, kuikoem to akhuih o, khawnbang khoek to a lak o; tamsi koek akhui kami mah homer hato akhuih o; kuikoem to atai o haih im taeng boih ah tapop o. ³³ Toe kuikoem moi to caa o ai naah, Angraeng palungphuihaih kaminawk nuiah phak; to pongah nihcae khaeah kanung parai nathaih kasae to phaksak. ³⁴ Caak amoeh hmoek kaminawk to aphum o pongah, to ahmuen to Kibroth-Hattaavah, tiah kawkw

o. ³⁵ Kaminawk loe Kibroth-Hattavah ahmuen hoiah Hazeroth ahmuen ah caeh o moe, to ah atai o.

12

Miriam hoi Aaron mah Mosi ih lok aek hoi

¹ Mosi mah Ethiopia tanu to zu haih moe, Ethiopia nongpata to zu ah a lak pongah, Miriam hoi Aaron mah Mosi to kasae thuih hoi. ² Nihnik mah, Angraeng mah Mosi khae khue ah maw lokthuih? Aicae khaeah doeh lokthui ai maw? tiah a thuih hoi. To lok to Angraeng mah thaih. ³ (To naah Mosi loe long pum ah kaom kaminawk boih pongah doeh, poek panaemhaih tawn kami ah oh.) ⁴ Angraeng mah, Mosi, Aaron hoi Miriam khaeah, Nangcae long thumto amkhuenghaih im ah angzo oh, tiah a naa. To pongah nihcae loe caeh o. ⁵ To naah Angraeng loe tamai thung hoiah angzoh tathuk, kahni im thok taengah angdoet moe, Aaron hoi Miriam to kaw; nihnik loe hmabang ah tacawt hoi. ⁶ Anih mah, Ka lok hae tahngai hoih; Nangcae salakah Angraeng ih tahmaa to om nahaeloe, anih khaeah hnuksakhaih hoiah kam tueng moe, anih khaeah amang ah lok ka thuih pae. ⁷ Toe ka tamna Mosi loe to tiah om ai; anih loe ka imthung takoh boih ah oep thok koek kami ah oh. ⁸ Anih hoi lok ka thuih naah, mikhmai kangtong ah ni lok ka thuih han, thaih karai lok hoiah ka thui mak ai; anih mah Angraeng ih krang to hnu tih; tikhoe ka tamna Mosi ih lok aek hanah zithaih na tawn hoi ai loe? tiah a naa.

⁹ Angraeng palungphuihaih mah nihnik to kangh, to pacoengah anih mah caehtaak.
¹⁰ Tamai mah kahni im to caehtaak pacoengah, khenah, Miriam loe dantui kanglung baktiah ngansae man khrung; Aaron mah Miriam to khet naah, anih loe ngansae man kami ah a hnuk. ¹¹ To naah Aaron mah Mosi khaeah, Ka angraeng, amthuhaih hoiah ni hmuen hae ka sak hoi moeng boeh, tahmenhaih hoiah hae zaehaih hae kai hnik nuiah amtii hmah raeh, tiah a naa. ¹² Anih hae amno ih zok thung hoiah tacawt naah kakoep ai kami, takpum ahap kadueh kami baktiah omsak hmah, tiah a naa. ¹³ To pongah Mosi mah Angraeng khaeah, Aw Sithaw, tahmenhaih hoiah anih hae vaihi ngantuisak rae ah, tiah a hangh. ¹⁴ Angraeng mah Mosi khaeah, ampa mah Miriam ih mikhmai ah pathoih nahaeloe, anih loe ni sarihto thung azathaih hoiah om mak ai maw? Anih to na oh o haih ahmuen tasa bangah ni sarihto thung suem ah, to pacoengah a thungah akunsak let ah, tiah a naa. ¹⁵ To pongah Miriam to ataihaih im tasa bangah ni sarihto thung a suok o; Miriam a thungah akun o sak let ai karoek to, kaminawk loe kholong caeh o ai. ¹⁶ To pacoengah kaminawk loe, Hazeroth ahmuen ah angpuen o moe, Paran praezaek ah ohhaih ahmuen takhawh o.

13

Kanaan prae khet han kami patoehhaih

¹ Angraeng mah Mosi khaeah, ² kai mah Israel kaminawk khaeah paek ih Kanaan prae khet

hanah kami to patoeh ah; acaeng maeto thung hoi zaehoikung maeto patoeh ah, tiah a naa. ³ Angraeng mah paek ih lok baktih toengah, Mosi mah Paran praezaek hoiah nihcae to patoeh; nihcae loe Israel zaehoikung ah oh o boih. ⁴ To kaminawk ih ahmin loe, Reuben acaeng thung hoiah, Zakur capa Shammua. ⁵ Simeon acaeng thung hoiah, Hori capa Shaphat. ⁶ Judah acaeng thung hoiah, Jephunneh capa Kaleb. ⁷ Issakar acaeng thung hoiah, Joseph capa Igal. ⁸ Ephraim acaeng thung hoiah, Nun capa Oshea. ⁹ Benjamin acaeng thung hoiah, Raphu capa Palti. ¹⁰ Zebulun acaeng thung hoiah, Sodi capa Gaddiel. ¹¹ Joseph acaeng ah kaom, Mannaseh acaeng thung hoiah, Susi capa Gaddi. ¹² Dan acaeng thung hoiah, Gemalli capa Ammiel. ¹³ Asher acaeng thung hoiah, Mikhael capa Sethur. ¹⁴ Naphtali acaeng thung hoiah, Vophsi capa Nahbi. ¹⁵ Gad acaeng thung hoiah, Maki capa Geuel. ¹⁶ Hae kaminawk loe Mosi mah tamquta hoi prae khet han patoeh ih kami ah oh o. Mosi mah Nun capa Oshea to Jehoshua, tiah ahmin paek.

¹⁷ Kanaan prae khet hanah Mosi mah nihcae to patoeh naah, aloih bang hoiah caeh o tahang ah loe, mae ah daw o tahang poe ah, tiah a naa. ¹⁸ Prae loe kawbang maw oh; to ah kaom prae kaminawk loe thacak o maw, thacak o ai, kami pop o maw, pop o ai; ¹⁹ nihcae ohhah prae loe hoih maw, hoih ai; kawbaktih vangpui thungah maw oh o; buk thungah maw, to tih ai boeh loe sipae kaom vangpui thungah; ²⁰ long loe kawbang maw oh, long loe hoih maw, hoih

ai; thing pop maw, pop ai, tito khen oh; misahoih oh loe, prae thung ih thingthai doeh sin oh, tiah a naa. To nathuem ih atue loe misurthaih hmin tangsuekhaih atue ah oh.

²¹ To pongah nihcae loe Zin praezaek hoiah caeh o moe, Hammath vangpui taeng ih Rehob ahmuen karoek to prae to a khet o. ²² Aloih bang hoiah caeh o poe moe, Anak caanawk, Ahiman, Sheshai hoi Talmai ohhaih, Hebron vangpui to a phak o. Hebron vangpui loe Izip prae ih Zoan vangpui sah ai naah saning sarihto oh boeh. ²³ Eshkol ih vacong to phak o naah, misurthaih kangbom tanghang maeto pakhruk o moe, kami hnetto mah angzawn hoi; pomogranat thaih hoi thaiduet thaih doeh angzawn hoi. ²⁴ Israel kaminawk mah to ahmuen ah kanghmat misurthaih tanghang maeto pakhruk o pongah, to ahmuen to Eshkol vacong, tiah kaw k o.

Prae khen kaminawk amlaem o let

²⁵ Ni qui palito pacoengah prae khethaih ahmuen hoiah amlaem o let. ²⁶ Nihcae loe Mosi hoi Aaron ohhaih Paran praezaek ih Kadesh ah, Israel kaminawk khaeah angzoh o let; nihcae khaeah prae khethaih kawng to thuih pae o, kaminawk khaeah to prae thung ih thingthai to patuek o. ²⁷ Mosi khaeah, Nang patoeh ih prae thungah ka caeh o, to prae loe khoitui hoi tahnutui long tangak boeh; hae loe to prae thung hoi kang sin o ih thingthai ah oh. ²⁸ Toe to prae thungah kaom kaminawk loe thacak o parai moe, vangpuinawk doeh len parai, vangpuinawk loe sipae thung o boih; to ahmuen ah Anak ih caanawk to ka hnuk o. ²⁹ Amalek kaminawk loe

aloih bang prae ah oh o; Hit kaminawk, Jebus kaminawk hoi Amor kaminawk loe mae nuiah oh o; Kanaan kaminawk loe tuipei taeng hoi Jordan vapui taengah oh o, tiah a thuih pae o.

³⁰ Kaleb mah Mosi hmaa ah kaminawk to anghaisak moe, Caeh o si loe, to prae to la o si; a pazawk o thai tih hman, tiah a naa. ³¹ Toe anih hoi nawnto caeh kaminawk mah loe, To ih kaminawk to a pazawk o thai mak ai; nihcae loe aicae pongah thacak o kue, tiah a naa o. ³² Nihcae mah prae khethaih tamthang kasae to Israel kaminawk salakah haeh o; to kaminawk mah, Ka caeh moe, ka khet o ih prae loe, a thungah kaom kaminawk paaeh boih prae ah oh; to ah kaom ka hnuk o ih kaminawk boih loe len o phi. ³³ To ah kalen parai kami, Anak caanawk to ka hnuk o; nihcae loe kalen parai kami hoi anghum tathuk kami ah oh o; nihcae mikhnuk ah kaicae loe pakuh baktiah ni ka oh o; kaicae loe nihcae mikhnuk ah to tiah ka oh o, tiah a naa o.

14

Kaminawk laisaep o

¹ To aqum naah kaminawk loe tha hoi hangh o moe, qah o. ² Israel kaminawk boih mah Mosi hoi Aaron to laisaep o thuih, Izip prae ah maw, to tih ai boeh loe praezaek ah duek halat nahaeloe hoih han to mah! ³ Tikhoe aicae loe sunsen hoiah a duek o moe, aicae ih zu caanawk minawk mah lomh hanah, Angraeng mah hae prae ah caeh haih loe? Izip prae ah amlaem let

nahaeloe, hoikhang tih, tiah nihnik khaeah thuih pae o.

⁴To naah angmacae hoi angmacae zaehoikung to goi o si loe, Izip prae ah amlaem o let si, tiah a thuih o. ⁵Mosi hoi Aaron mah to ah amkhueng Israel kaminawk boih hma ah, long ah akuep pae hoi. ⁶Kanaan prae khet han kacaeh, Nun capa Joshua hoi Jephunneh capa Kaleb loe, angmah hnik ih kahni to angkhring hoi pacoengah, ⁷to ah amkhueng Israel kaminawk boih khaeah, a caeh o moe, a khet o ih prae loe hoih parai. ⁸Angraeng mah aicae nuiah palung tongh nahaeloe, tahnutui hoi khoitui longhaih prae thungah, aicae na caeh haih ueloe, hae prae hae aicae han na paek tih. ⁹Angraeng nuiah laisaep o hmah loe, to ih prae kaminawk to zii o hmah; nihcae loe a caak o han koi takaw ah ni oh o; nihcae loe angvaenghaih tawn o ai; Angraeng loe aicae hoi nawnto oh; nihcae to zii o hmah, tiah a naa hoi. ¹⁰Toe kaminawk mah nihnik to thlung hoiah vah han thuih o; to naah Angraeng lensawkhaih Israel kaminawk amkhuenghaih kahni imthung ah phak.

Mosi mah kaminawk han lawkthuihah

¹¹Angraeng mah Mosi khaeah, Hae kaminawk mah nasetto maw palung na phui o sak tih? Nihcae khaeah ka sak ih dawnrai hmuen to a hnuk o boeh; toe nasetto maw hae kaminawk mah kai tang ai ah om o vop tih? ¹²Nihcae nuiah kasae nathaih ka phaksak han, qawk doeh ka toepsak mak ai; toe nihcae pong kalen kue,

thacak kue acaeng ah nang to kang sak han, tiah a naa.

¹³ Mosi mah Angraeng khaeah, To tiah na-haeloe, Na thacakhaih hoiah hae kaminawk hae na zaehhoih, tiah Izip kaminawk mah panoek o tih boeh; ¹⁴ to naah nihcae mah hae prae ah kaom kaminawk khaeah hae tamthang hae thui pae o tih; Angraeng, nang loe hae kaminawk hoi nawnto na oh, Angraeng, nang to mikhmai kangtong ah a hnuk o boeh; nang ih tamai loe nihcae nuiah angdoet moe, nang loe nihcae hma ah na caeh; khodai ah nihcae to tamai hoiah na zaeh moe, khoving ah hmaithaw hoiah na caeh haih. ¹⁵ Hae kaminawk boih hae kami maeto baktiah vaihi na dueksak nahaeloe, nang ih tamthang thaih acaengnawk mah loe, ¹⁶ Angraeng mah to kaminawk khaeah prae to kang paek han, tiah lokkamhaih a sak pae; toe anih mah to prae thungah caeh haih thai ai pongah, praezaek ah a hum boih, tiah thui o tih. ¹⁷ Na thuih ih lok baktih toengah, vaihiah ka Angraeng thacakhaih to len nasoe, ¹⁸ Angraeng loe palungsawk, amlunghaih hoiah koi moe, zaehaih hoi sakpazaehaihaw to tahmen pae; toe zaehaih sah kami loe thuitaek ai ah om ai; anih loe ampanawk zaehaih pongah adung thum, adung pali karoek to a caanawk thuitaekkung ah oh. ¹⁹ Kalen parai na palungnathaih rang hoiah, Izip prae thung hoi kamtong vaihni ni khoek to hae kaminawk hae na tahmen baktih toengah, hae kaminawk zaehaih doeh tahmen raeh, tiah a naa.

14.13 EXO 32.11-14. **14.18** EXO 20.5,6; 34.6,7; Deu 5.9,10; 7.9,10.

²⁰ Angraeng mah, Nang hnik ih lok baktih toengah, kang tahmen boeh; ²¹ toe kai ka hing tangtang baktih toengah, longpum ah Angraeng lensawkhaih to koi tih. ²² Izip prae hoi praezaek ah ka sak ih lensawkhaih hoi dawnrai hmuennawkw hnu kaminawkw boih mah ka lok hae tahngai o ai, vai hato Kai ang tanoek o pongah, ²³ ampanawkw khaeah paek han tiah lokkam ih prae to mi mah doeh hnu o mak ai; kai palungphuisak kawbaktih kami mah doeh to prae to hnu o mak ai. ²⁴ Toe ka tamna Kaleb loe, kalah poekhah pakhra to tawnh moe, palungthin boih hoiah kai ang bang pongah, anih to a caehhah prae thungah ka hoih han; anih ih caanawkw mah prae to toep o tih. ²⁵ Amalek hoi Kanaan kaminawkw loe azawn ah khosak o; khawnbang ah amlaem oh loe, tuipei kathim bang hoiah praezaek ah caeh oh, tiah a naa.

Lokaek kaminawkw paduekhah

²⁶ Angraeng mah Mosi hoi Aaron khaeah, ²⁷ ka lok to aek moe, laisaep hae ih kasae kaminawkw hae nasetto maw ka paupep han vop? Israel kaminawkw mah kasae ang thuih o moe, kai laisaep thuihah lok to ka thaih boeh. ²⁸ Nihcae khaeah, Kai ka hing pongah, ka naa ah nang thuih o ih baktih toengah, ka sak han, tiah Angraeng mah thuih. ²⁹ Na kroek o ih nangmacae kaminawkw boih thungah, kai laisaep thuih, saning pumphae to hoi ranuih bang kaminawkw loe praezaek ah dueh o tih. ³⁰ Jephunneh capa Kaleb hoi Nun capa Joshua khue ai ah loe, ban ka

payangh moe, ohsak hanah lok ka kam ih prae thungah mi doeh akun o mak ai. ³¹ Misa mah lomh ving tih, tiah na thuih o ih na caanawk to kai mah ka zaeh han, nangcae mah na khet patoek o ih prae to nihcae mah panoek o tih. ³² Toe nangcae loe hae praezaek ah na dueh o ueloe, qok doeh pong sut tih. ³³ Nangcae loe oepthok ah kho na sah o ai pongah, praezaek ah nangcae ih qok to pong sut boih ai karoek to, na caanawk loe saning qui palito thung praezaek ah amhet o tih. ³⁴ Prae pakrong hanah ni qui palito akra baktih toengah, nito hae saningto ah suem oh, na sak o ih zaehaih atho baktih toengah, saning qui palito thung patang na khang o tih; to naah ka lok aekhaih atho to na panoek o tih, tiah a naa. ³⁵ Kai, Angraeng mah lokthuih boeh; kai ih lok aek hanah nawnto amkhueng, kahoih ai hae kaminawk nuiah, hae hmuen hae ka sak tangtang han; nihcae loe hae praezaek ah amro o ueloe, dueh o tih, tiah a naa.

³⁶ To pongah prae khet hanah Mosi mah patoeh ih kaminawk amlaem o pacoengah, a khet o ih prae loe hoih ai, tiah amkhueng kaminawk hmaa ah laisaep thuih kaminawk, ³⁷ kanaan prae loe hoih ai tiah thui kaminawk loe, Angraeng hmaa ah kasae nathaih mah phak thuih moe, duek o. ³⁸ Prae khet han kacaeh kaminawk boih thungah, Nun capa Joshua hoi Jephunneh capa Kaleb hnik khue ni hing hoi.

³⁹ To lok to Mosi mah Israel kaminawk khaeah thuih pae naah, kaminawk loe paroeai hangh o. ⁴⁰ Khawnbang khawnthaw ah angthawk o

moe, mae nuiah caeh o; khenah, a zae o boeh; toe Angraeng mah lokkam ih ahmuen ah caeh o si, tiah a thuih o. ⁴¹ Toe Mosi mah, Tipongah vaihi Angraeng mah paek ih lok to na tahngai o ai loe? Hae tiah na sak o nahaeloe na qoeng o thai mak ai. ⁴² Nangcae khaeah Angraeng om ai pongah, caeh o tahang hmah; na caeh o nahaeloe misanawk to na pazawk o mak ai. ⁴³ Amalek hoi Kanaan kaminawk loe, nangcae hma ah oh o boeh pongah, nangcae loe sumsen hoiah na dueh o tih; nangcae mah Angraeng to nang qoi o taak boeh pongah, nangcae khaeah Angraeng om mak ai boeh, tiah a naa. ⁴⁴ Toe Mosi hoi Angraeng ih thingkhong loe, ataihah ahmuen to caehtaak ai; toe nihcae loe palungthah o pongah, mae nuiah caeh o nganga. ⁴⁵ To naah to mae nuiah kaom, Amalek hoi Kanaan kaminawk anghum o tathuk moe, Israel kaminawk to tuk o, nihcae to pazawk o pacoengah, Hormah vangpui khoek to patom o.

15

Paek ih hmuen patomhhaih

¹ Angraeng mah Mosi khaeah, ² Israel kaminawk khaeah hae tiah thui paeh; nihcae khaeah, Kang paek ih prae thungah na kun o naah, ³ Angraeng khaeah hmai angbawnhah to sah oh; maitaw maw, to tih ai boeh loe tuu to Angraeng khaeah hmai angbawnhah ah paek oh; maitaw doeh, tuu doeh Angraeng khaeah hmuihoih hmuen ah maw, to tih ai boeh loe angbawnhah maw, to tiah ai boeh loe tathlang ih hmuen ah maw, to tih ai boeh loe lokkamhah sak han ih maw, to tih ai boeh loe aimah koehah

paek ih hmuen tathlanghah maw, poihsakhah ah tathlang ih hmuen ah maw sah oh: ⁴ mi kaw-baktih doeh Angraeng khaeah hmuen paekhaih sin kami loe, cang paekhaih sak naah situi hint palito thungah maeto hoi atok ih takaw dip ephah hatu thungah maeto paek han oh; ⁵ tuucaa hoi angbawnhah sah nahaeloe, naek han koi hmuen hoi misurtui hint palito thungah maeto paek han oh. ⁶ Tuu tae maeto hoi angbawnhah sah nahaeloe, cang ephah hatu thungah hnetto, situi hint thumto thungah hint maeto hoi atok ih takaw dip to paek han oh, ⁷ Angraeng khaeah hmuihoih ah hmuen tathlang nahaeloe, naek koi paek naah misurtui hint thumto thungah maeto paek han oh. ⁸ Angraeng khaeah maitaw tae hoi angbawnhah maw, to tih ai boeh loe hmuen paekhaih, to tih ai boeh loe lokkamhah sak han angbawnhah maw, to tih ai boeh loe angdaeh angbawnhah maw sak naah, ⁹ maitaw tae hoi nawnto situi hint ahap hoi atok tangcae ih takaw dip ephah hatu thungah thumto sin ah. ¹⁰ Naek hanah misurtui hint ahap to sin ah. To tiah hmai hoi sak ih angbawnhah loe Angraeng khaeah paek ih hmuihoih ah oh.

¹¹ Maitaw tae maeto, to tih ai boeh loe tuu tae maeto, to tih ai boeh loe tuucaa maeto, to tih ai boeh loe maeh caa maeto hoi angbawnhah sak naah to tiah sak han oh. ¹² Kapop maw, tamsi maw, sak na timhah nuiah pakoep ah loe, maeto boih hanah to tiah sah ah. ¹³ Prae thung tapen kaminawk boih mah, Angraeng khaeah hmuihoih sin han hmai hoi angbawnhah sak naah, to tiah sak han oh. ¹⁴ Nangcae salakah

kaom angvinnawkw maw, to tih ai boeh loe mi kawbaktih doeh, hmuihoih ah paek han Angraeng khaeah hmai hoi angbawnhah sak naah, nangcae mah sak ih baktih toengah a sak o toeng han oh. ¹⁵ Hing thung na caanawkw mah pazui o poe hanah paek ih atawkw loe, nangcae amkhueng kaminawkw hoi nangcae salakah kaom angvinnawkw hanah doeh maeto ah ni oh; nangcae Angraeng hmaa ah oh baktih toengah, angvin doeh om toeng tih. ¹⁶ Nangcae hoi nangcae salakah kaom angvinnawkw hanah, daan maeto hoi atawkw maeto ah omsak ah, tiah a naa.

¹⁷ Angraeng mah Mosi khaeah, ¹⁸ Israel kaminawkw khaeah hae tiah thui paeh; nihcae khaeah, Kang hoih o han ih prae thungah na kun o naah, ¹⁹ to prae thung ih takaw na caak o naah doeh, Angraeng khaeah hmuen tathlanghah to sah oh. ²⁰ Na daengh tangsuek ih takaw dip hoi sak ih takaw hoi na tit tangsuek ih cang to paek ah. ²¹ Na caanawkw mah hmaloe koek daengh ih takaw to Angraeng khaeah paek o han oh.

Sakpazae pongah angbawnhah

²² Angraeng mah Mosi khaeah paek ih lok na pazui o ai moe, ²³ Angraeng mah Mosi patohhah rang hoiah ang thuih ih lok to na pazui o ai nahaeloe, Angraeng mah Mosi khaeah thuih ih ni hoi kamtong angzo han koi caanawkw dung khoek to, ²⁴ amkhueng kaminawkw mah panoek ai ah, poek ai pui hoi zaehah sah moeng nahaeloe, rangpuinawkw mah Angraeng khaeah hmuihoih angbawnhah sak hanah, a sak o zong ih atawkw

baktih toengah, saning kanawwk maitaw caa to cang hoi nawnto paek o ueloe, zae angbawnhah sak hanah maeh caa to paek o tih. ²⁵ Qaima mah kaminawwk boih hanah zae angbawnhah to sah pae tih, to naah nihcae mah poek ai pui hoiah a sak o moeng ih zaehaih to tahmen pae tih; Angraeng khaeah hmai hoi angbawnhah, poek ai pui hoi sak ih zae angbawnhah sak hanah hmuen to sin o han oh. ²⁶ To tiah sah o nahaeloe, Israel kaminawwk hoi nihcae salakah kaom angvinnawwk boih mah, poek ai pui hoi sak o moeng ih zaehaih to loihsak tih.

²⁷ Toe kami maeto mah poek ai pui hoiah zaehaih sah moeng nahaeloe, zae angbawnhah ah saningto kaom, maeh tala maeto a sin han oh. ²⁸ Poek ai pui hoi Sithaw hmaa ah zaehaih sah kami hanah, qaima mah zae angbawnhah to sah pae tih; to naah anih zaehaih to loisak tih. ²⁹ Poek ai pui hoi zaehaih sak o naah, Israel kami hoi nihcae salakah kaom angvin hanah doeh, daan maeto khue tawnh han oh. ³⁰ Toe prae thung tapen Israel kami maw, to tih ai boeh loe angvin maw, zithaih tawn ai ah zaehaih to sah nganga nahaeloe, Angraeng khingyahaih tawn ai pongah, to kami to acaeng thung hoiah pahnawt han oh. ³¹ Anih loe Angraeng ih lok to patoek moe, anih ih lok to aek pongah, to kami to pahnawt sut han oh; anih loe sakpazaehaih atho to hnu tih, tiah a naa.

Sabbath zaa ai kami humhah

³² Israel kaminawwk praezaek ah oh o naah, Sabbath niah thing aek kami maeto a hnuk o.

³³ Thing aek kami hnukungnawkw mah anih to Mosi, Aaron hoi Israel kaminawkw boih hmaa ah hoih o. ³⁴ Thing aek kami to kawbang maw lokcaek han tito amtueng ai vop pongah, anih to imthung ah paung o. ³⁵ To naah Angraeng mah Mosi khaeah, To kami loe duek han oh; anih to ataihah tasa bangah kaminawkw boih mah thlung hoiah va o mat tih, tiah a naa. ³⁶ To pongah acaeng kaminawkw mah anih to ataihah imthung hoi tasa bangah zaeh o moe, Angraeng mah Mosi khaeah paek ih lok baktih toengah, duek khoek to thlung hoiah vah o.

Khukbuen pong ih apawkw

³⁷ Angraeng mah Mosi khaeah, ³⁸ Israel kaminawkw khaeah hae tiah thui paeh; angzo han koi caa nawktanawkw khoek to, khukbuen atom nuiah rong kahing hoi bangh hanah, apawkw to soi ah; ³⁹ to apawknawkw to na hnuk o naah, palung thung hoiah na poek o ih baktih toengah caeh moe, mik hoiah na hnuk o ih hmuen hnukah na patom pacoengah, na caeh o pazae han ai ah, Angraeng mah thuih ih loknawkw to pakuem o poe ah loe sah oh; ⁴⁰ to naah kang paek o ih loknawkw to pazui boih hanah na panoek o ueloe, na Sithaw khaeah ciimcai hanah kamhoe ah na om tih. ⁴¹ Kai loe na Sithaw ah oh hanah, Izip prae thung hoi nangcae zaehoikung, na Angraeng Sithaw ah ka oh; Kai loe na Angraeng Sithaw ah ka oh tiah, a thuih, tiah thui paeh, tiah a naa.

16

Korah, Dathan hoi Abiram

¹ Levi acaeng Kohath capa Izhar, Izhar capa Korah loe, Reuben acaeng Paleth capa On, On capa Eliab, Eliab capa hnik Dathan hoi Abiram cae to kawk moe, ² amkhueng kaminawk thungah minawk mah panoek ih kami, ahmin kamthang kami, amkhuenghah ukkung Israel kami cumvai hnet, qui pangato hoi nawnto Mosi to hmang o; ³ nihcae loe nawnto amkhueng o moe, Mosi hoi Aaron ih lok to aek o, nihnik khaeah, Kamtlai hmoek ah tok na sak hoi; amkhueng kaminawk loe ciimcai o; Angraeng loe, kami boih nuiah oh bae, tiah a naa o. ⁴ Nihcae ih lok Mosi mah thaih naah a mikhmai long ah akuap; ⁵ to pacoengah Mosi mah, Korah hoi a hnukbang kaminawk khaeah, Angraeng ih kami loe mi maw, mi maw ciimcai, angmah khaeah angzohsak han ih kami loe mi maw, tito khawnbang ah amtuengsak tih; a qoih ih kami doeh angmah taengah amtuengsak tih. ⁶ Nang, Korah hoi na hnukbang kaminawk boih hae hae sah oh; sabae to la o ah loe, ⁷ khawnbang ah Angraeng hmaa ah, sabae thungah hmuihoih hmai thlaekhaih to sah oh; to naah Angraeng mah qoih ih kami loe ciimcai kami ah om tih; nangcae Levi kaminawk loe kamtlai hmoek ah na sak o boeh, tiah a naa. ⁸ Mosi mah Korah khaeah, Nangcae Levi kaminawk, tahngai oh; ⁹ nangcae loe Angraeng ih kahni imthung ah toksak moe, kaminawk hma ah angdoet pacoengah, nihcae ih tok to sak hanah, nangcae to Israel Sithaw mah a

taengah kawkw boeh, Israel kaminawkw thung hoi pahoe ih hmuen loe, nangcae han tetta hmuen ah maw oh? ¹⁰ Nangmah hoi nam nawkamya Levi ih caanawkw boih, angmah hoi kanghnai ah suek boeh to mah, nangcae mah qaima ah oh han ih na pakrong o vop maw? ¹¹ To pongah nangmah hoi na hnukbang kaminawkw boih nawnto nam khueng o moe, Angraeng ih lok to na aek o; Aaron loe kawbaktih kami ah maw oh moe, na laisaep o thuih? tiah a naa.

¹² To pacoengah Mosi mah Eliab capa hnik Dathan hoi Abiram to kawkw; toe nihnik mah, Kang zo hoi mak ai, ¹³ nang mah ni praezaek ah kaicae dueksak hanah, tahnutui hoi khoitui longhaih prae thung hoiah nang tacawt haih, to hmuen loe tetta ah maw oh moe, vaihi kaicae nuiah angraeng ah oh han na koeh vop? ¹⁴ Toe tahnutui hoi khoitui longhaih prae ah kaicae nang caeh haih ai, lawk hoi misur takhanawkw doeh qawkw ah nang paek ai; hae kaminawkw ih mik to na taprok pae han maw? Kaihnik loe nang khaeah kang zo hoi mak ai, tiah a naa hoi.

¹⁵ To naah Mosi loe paroeai palungphui moe, Angraeng khaeah, nihnik mah paek ih hmuen to talawkw pae hmah; nihnik khae ih laa hrang maeto doeh ka la pae ai, nihcae han nganbawh kana doeh ka paek vai ai, tiah a naa. ¹⁶ Mosi mah Korah khaeah, Aaron, nangmah hoi na hnukbang kaminawkw boih, khawnbang ah Angraeng hmaa ah angphong oh; ¹⁷ kami boih mah hmuihoih thlaekhaih sabae to sin oh, a thungah hmuihoih to suem oh; nangcae boih mah hmuihoih thlaekhaih sabae cumvai hnet, qui pangato

Angraeng hmaa ah sin oh; nang hoi Aaron mah doeh hmuihoih sabae to sin hoi toeng ah, tiah a naa. ¹⁸ To pongah kami boih mah angmah ih hmuihoih sabae to sin o moe, hmuihoih to hmai hoiah thlaek o pacoengah, Mosi, Aaron hoi nawnto kaminawkw amkhuenghah kahni im thok taengah angdoet o boih. ¹⁹ Korah mah doeh Mosi hoi Aaron ohhah ahmuen maeto bang ih kaminawkw amkhuenghah thok taengah, angmah hnukbang kaminawkw to amkhuengsak toeng; to naah Angraeng lensawkhah kaminawkw boih khaeah amtueng.

²⁰ Angraeng mah Mosi hoi Aaron khaeah, ²¹ Atue setta thungah hae kaminawkw hae ka hum boih han boeh pongah, hae kaminawkw salak hoiah amhoe hoi ah, tiah a naa. ²² Toe Mosi hoi Aaron loe long ah akuep hoi moe, Aw Sithaw, kaminawkw boih ih pakhra ukkung Sithaw, kami maeto zaehah pongah, acaeng kaminawkw boih nuiah palung na phui han maw? tiah a naa hoi. ²³ To naah Angraeng mah Mosi khaeah, ²⁴ Korah, Dathan hoi Abiram ih kahni im hoi kamhoe ah oh hanah kaminawkw to lokthui paeh, tiah a naa.

²⁵ Mosi loe anghawkw moe, Israel kami ka-coehtanawkw hoi nawnto Dathan hoi Abiram khaeah caeh. ²⁶ Kaminawkw khaeah, Hae ah kaom kasae kaminawkw ih kahni im hoi kamhoe ah om oh; nihcae ih hmuen tita doeh sui o hmah; to tih ai nahaeloe nangcae doeh nihcae zaehah pongah nam ro o moeng tih, tiah a thuih pae. ²⁷ Kaminawkw loe Korah, Dathan hoi Abiram cae ih kahni imthung hoiah tacawt o boih boeh pongah, Korah, Dathan hoi Abiram

loe a zunawk, a capanawk, a caa nawktanawk hoi nawnto angmacae ohhaih im thok taengah angdoet o. ²⁸ To naah Mosi mah, Hae ah kaom hmuennawk loe kaimah koeh ah sak ih na ai ni; Angraeng mah sak han ang patoeh pongah ni ka sak. ²⁹ Kaminawk boih mah tong ih duekhaih hoi thuitaekhaih to hae kaminawk mah tong o nahaeloe, Angraeng mah kai hae patoeh ai, tito panoek oh. ³⁰ Toe Angraeng mah hmuen kangtha to sah moe, long to akah rak pacoengah, hae kaminawk hoi nihcae ih ampuinawk to paaeh moe, kahing ah tangqom thungah caeh o nahaeloe, hae kaminawk mah Angraeng to khet patoek o, tito na panoek o tih, tiah a naa.

³¹ To loknawk a thuih boih pacoengah, Nihcae ohhaih im tlim ih long to akah rak, ³² long loe pakha aangh moe, to kaminawk hoi nihcae ih innawk, Korah ih imthung takoh boih, a tawnh ih hmuenmaenawk boih to paaeh. ³³ To kaminawk, nihcae hoi angkom kaminawk loe, kahing ah long thungah caeh o tathuk; long mah nihcae to pakuep hmoek; to tiah nihcae loe acaeng kaminawk thung hoiah anghmat angtaa o. ³⁴ Nihcae hanghaih lok to thaih o naah, aicae doeh long mah paaeh toeng tih boeh, tiah a poek o pongah, a taengah kaom Israel kaminawk loe cawnh o boih. ³⁵ To naah Angraeng khae hoi hmai to angzoh moe, hmuioih thlaek kami cumvai hnet, qui pangatonawk to hmai mah kangh boih.

³⁶ Angraeng mah Mosi hoi Aaron khaeah, ³⁷ Aaron capa qaima Eleazar khaeah hmai kangqong hmuioih thlaekhaih sabae to la ah

loe, kangqong hmai to ataek ah; to hmuihoih-nawk loe kaciim hmuen ah oh. ³⁸ Angmacae hinghaih paduek hanah zaehaih sah kaminawk ih hmuihoih thlaekhaih sabae hoiah hmaicam to khuk hanah sum kangphaek daek to sah ah; to sabaenawk loe Angraeng khaeah paek ih hmuen ah oh pongah ciim; to hmuen loe Israel kaminawk tanoekhaih ah om tih, tiah thui paeh, tiah a naa. ³⁹ To pongah qaima Eleazar mah hmuihoih thlaekhaih sabaenawk to lak moe, hmaicam to khuk hanah sum kamling to kangphaek daek ah daengsak. ⁴⁰ Aaron ih caanawk na ai ah, kalah kami mah Angraeng hmaa ah hmuihoih thlaek hanah angzo nahaeloe, Korah hoi anih hnukbang kaminawk baktiah oh han om ai; to sabaenawk loe Israel kaminawk mah panoek poe han ih hmuen ah om tih, tiah Angraeng mah Mosi khaeah pae thuih ih lok baktih toengah Eleazar mah sak.

Kaminawk laisaephaih

⁴¹ Khawnbang ah loe amkhueng Israel acaeng kaminawk boih mah, Mosi hoi Aaron khaeah, Nanghnik mah Angraeng ih kaminawk to na hum hoi boih boeh, tiah laisaep o thuih. ⁴² Mosi hoi Aaron ih lok to aek hanah kaminawk nawnto amkhueng o, amkhuenghaih kahni im bangah angqoi o naah, khenah, tamai mah kahni im to khuk khoep moe, Angraeng lensawkhaih to amtueng. ⁴³ To pacoengah Mosi hoi Aaron loe amkhuenghaih kahni im hma bangah caeh hoi. ⁴⁴ To naah Angraeng mah Mosi khaeah, ⁴⁵ akra ai ah hae kaminawk hae ka tamit boih han boeh pongah, hae kaminawk salak hoiah kamhoe ah

om ah, tiah a naa. To naah nihnik loe long ah akuep hoi. ⁴⁶ Mosi mah Aaron khaeah, Hmuihoih thlaekhaih sabae to la ah, hmaicam nui ih hmai to la ah loe, sabae thungah suek pacoengah, kaminawk khaeah karangah caeh ah loe, zae angbawnhaih to sahsak ah; Angraeng khae hoi palungphuihaih phak boeh pongah, nathaih kasae to phak boeh, tiah a naa. ⁴⁷ Mosi mah thuih ih lok baktih toengah, Aaron loe kaminawk salakah cawnh moe, a sak; khenah, to naah kaminawk khaeah nathaih kasae oh amtong boeh; toe Aaron mah hmuihoih to thlaek moe, kaminawk han angbawnhaih to sak pae. ⁴⁸ Anih loe kahing hoi kadueh salakah angdoet; to naah kasae nathaih to dip. ⁴⁹ Toe Korah pongah kadueh kaminawk to thui ai, to nathaih kasae pongah kadueh kaminawk loe sangqum boihah sang hatlai pali, qui sarihto oh o. ⁵⁰ Kasae nathaih dip pacoengah, Aaron loe Mosi khaeah amkhuenghaih kahni im thok taengah amlaem let.

17

Aaron ih cunghet tadok

¹ Angraeng mah Mosi khaeah, ² Israel kaminawk khaeah hae hae thui paeh; ampanawk ih acaeng zaehoikungnawk khae hoi acaeng maeto naah cunghet maeto, acaeng hatlai hnetto khae hoiah cunghet hatlai hnetto la ah loe, cunghet pongah kami ih ahmin to tarik boih ah. ³ Levi ih cunghet pongah Aaron ih ahmin to tarik ah; acaeng zaehoikung maeto mah cunghet maeto tawnh boih han oh. ⁴ To cunghetnawk to lok

kang thuihaih ahmuen, kaminawkw amkhueng-haih kahni imthung ih hnukung hmaa ah suem ah. ⁵ Ka qoih kami ih cunghet loe tadok tacawt tih; to pacoengah loe Israel kaminawkw mah na nuih laisaephaih to ka dipsak han boeh, tiah a naa. ⁶ To pongah Mosi mah Israel kaminawkw khaeah lokthuih pae, zaehoikungnawkw boih mah anih han cunghet maeto paek o boih, acaeng zaehoikung maeto mah, cunghet maeto sin o, sangqum boih ah cunghet hatlai hnetto oh; Aaron ih cunghet doeh to ih cunghetnawkw thungah athum toeng. ⁷ Mosi mah to ih cunghetnawkw to hnukung kahni imthung ih Angraeng hmaa ah suek.

⁸ Khawnbang ah Mosi hnukung kahni imthung ah akun naah, khenah, Levi imthung takoh ah kaom Aaron ih cunghet loe tadok tacawt, aqam tacawt tahang moe, apawkw pawkw pacoengah, almond thaih to athaih. ⁹ To naah Mosi mah Angraeng hmaa ih cunghet to Israel kaminawkw hma sinh pae boih; nihcae mah khet o moe, angmacae ih cunghet to lak o boih. ¹⁰ Angraeng mah Mosi khaeah, Aaron ih cunghet to hnukung hmaa ah sin ah loe, to ah suem let ah, to cunghet loe lok tahngai ai kaminawkw acoe paekhaih angmathaih ah om tih; to naah ni nihcae mah ka nuih laisaep o haih to na boengsak tih, to tih ai nahaeloe nihcae loe dueh o moeng tih, tiah a naa. ¹¹ Angraeng mah thuih ih lok baktih toengah, Mosi mah sak boih.

¹² Israel kaminawkw mah Mosi khaeah, Khenah, aicae loe a duek o tangtang boeh; aicae loe

anghmat boeh, aicae loe anghmat o boih boeh!
¹³ Mi kawbaktih doeh Angraeng ih kahni im ah angzo kami loe dueh tih; aicae loe a dueh o boih tih boeh maw? tiah a naa o.

18

Qaima hoi Levinawk mah sak han ih taham

¹ Angraeng mah Aaron khaeah, Hmuenciim ah sak ih na zae haih pongah loe, nangmah hoi na caanawk, nam pa ih imthung takohnawk mah na zok o tih; qaima toksakhaih pongah zaehaih na sak nahaeloe, nangmah hoi na caanawk mah zok o tih. ² Nam pa acaeng, Levi acaengnawk thung ih nam nawkamyaw to nangcae hoi nawnto toksak han kaw ah; toe nangmah hoi na caanawk loe hnukung kahni imthung ah tok na sah o tih. ³ Levi caanawk loe angmacae ih tok hoi kahni imthung ah sak han koi toknawk boih to sah o tih; toe hmaicam hoi hmuenciim ih laom sabaenawk taengah caeh o mak ai; caeh o nahaeloe, nihcae doeh, nangcae doeh na dueh o boih tih. ⁴ Nihcae loe nangcae hoi nawnto toksah o ueloe, kaminawk amkhuenghah kahni im to khenzawn o tih; kahni imthung ah sak han koi toknawk boih to sah o tih; asaeng ai kalah kami loe na taengah anghnaih o han om ai. ⁵ Israel kaminawk nuiah palungphuihah phak let han ai ah, nangcae loe hmuenciim hoi hmaicam to khenzawn oh. ⁶ Khenah, Israel kaminawk salak hoiah nam nawkamyaw Levi kaminawk to ka qoih boeh, amkhuenghah kahni im ah tok a sak o hanah, Angraeng khaeah paek ih angbawnhah hmuen baktih toengah nangcae

hanah paek boeh. ⁷ To pongah nangmah hoi na caanawk loe, hmaicam hoi kahni payanghahih thungah kaom, qaima ih toknawk boih to sah oh; nangcae khaeah qaima toksakhahih to tangqum ah kang paek boeh; kasaeng ai nang khaeah angzo kami loe paduek han oh, tiah a naa.

Qaima hoi Levinawk han paek ih hmuenu

⁸ To pacoengah Angraeng mah Aaron khaeah, Khenah, Israel kaminawk mah kaciim ah kai khaeah paek o ih hmuennawk to nang han kang paek boih boeh; nangmah hoi na caanawk mah dungzan ah toep hanah taham ah kang paek boeh. ⁹ Hmai thungah pha ai, nihcae mah kai khaeah kaciim koek ah paek o ih hmuennawk boih, cang paekhahih, zae loisak han paek ih hmuennawk boih, sakpazaehahih loisak han paek ih hmuennawk boih loe, nangmah hoi na caanawk hanah kaciim koek ah om tih. ¹⁰ To hmuennawk to kaciim koek ahmuenu ah caa ah; nangcae han ciimcai hmuenu ah oh pongah, nongpa boih mah caak thahih. ¹¹ To pacoengah Israel kaminawk mah paek ih hmuennawk hoi tangqum ah paek ih hmuennawk boih to, nangmah hoi na capa hoi na canunawk mah dungzan ah toep hanah atawk baktiah paek ih, nangcae ih qawk ah om tih; na imthung takoh ah kaom kaciim kaminawk mah to hmuennawk to caa o tih. ¹² Nihcae mah Angraeng khaeah paek ih kathai tangsuek thingthai, kahoih koek situinawk, kahoih koek misurtuinawk hoi cang to, nangcae han kang paek boeh. ¹³ Nihcae mah Angraeng khaeah sin o ih, lawk thungah kathai tangsuek hmuennawk boih loe, nangcae

ih hmuen ah om tih; na imthung takoh ah kaom ciimcai kaminawkw mah to hmuennawkw to caa o tih. ¹⁴ Israel kaminawkw mah angbawnhah sak hanah Angraeng khaeah paek o ih hmuennawkw boih loe nangcae ih hmuen ah om tih. ¹⁵ Tapen tangsuek capa maw, to tih ai boeh loe kami maw, to tih ai boeh loe pacah ih moi maw, Angraeng khaeah paek ih hmuennawkw boih loe nangcae taham ah om tih; toe na calu hoi ciimcai ai tapen tangsuek moinawkw loe nangmacae mah akrang oh. ¹⁶ Akrang han koi caanawkw loe khrah to akoep naah, akrang han atho khaeh ih baktih, hmuenciim ih shekel tahhah baktih toengah, gerah pumphae to hoi kangvan shekel pangato hoiah akrang oh. ¹⁷ Toe tapen tangsuek maitaw tae maw, to tih ai boeh loe tapen tangsuek tuu tae maw, to tih ai boeh loe tapen tangsuek maeh tae loe na krang o mak ai; to moinawkw loe ciim o pongah, nihcae ih athii to hmaicam ah haeh ah, athawknawkw loe Angraeng khaeah hmuihoih ah paek hanah, hmai hoi angbawnhah to sah oh. ¹⁸ Angan, saok hoi bantang bang ih palaeng loe nangcae taham ah om tih. ¹⁹ Israel kaminawkw mah Angraeng khaeah paek ih kaciim hmuennawkw boih loe, nangmah hoi na capanawkw hoi na canunawkw mah dungzan ah toep hanah, atawkw baktiah kang paek boeh; hae loe nangmah hoi na caanawkw han Angraeng hmaa ah paloi hoiah sak ih dungzan lokmahhah ah om tih, tiah a naa. ²⁰ Angraeng mah Aaron khaeah, Nang loe nihcae ih prae thungah, qawktoep han ih ahmuen, nihcae salakah na tawnh ih hmuen

tidoeh om mak ai; kai loe Israel kaminaw
salakah, nangcae taham ah ka oh moe, nangcae
mah toep han koi qawk ah ka oh.

Levinaw han hatu thungah maeto paekhaih

²¹ Khenah, Levi kaminaw loe kaminaw
amkhuenghaih kahni imthung ah toksak o pon-
gah, nihcae mah qawktoep hanah Israel kam-
inaw ih hmuen hatu thungah maeto ka paek
boeh. ²² Vaihi hoi kamtung Israel kaminaw loe
amkhuenghaih kahni im taengah anghnai o mak
ai boeh; anghnai o nahaeloe angmacae zaehaih
atho to zok o ueloe, dueh o moeng tih. ²³ Levi
kaminaw khue mah ni amkhuenghaih kahni
imthung ih tok to sah o tih, nihcae mah kamsoem
ai hmuen to sah o nahaeloe, angmacae zaehaih
atho to zok o tih; hae loe angzo han koi na
caanaw khoe to dungzan ah pazui hanah paek
ih daan lok ah oh; nihcae loe Israel kaminaw
salakah toep han koi qawk tawn o mak ai.
²⁴ Toe Israel kaminaw mah Angraeng khaeah
paek o ih hatu thungah maeto loe, Levinaw
mah qawk ah toep o hanah ka paek boeh;
to pongah ni nihcae khaeah, Israel kaminaw
salakah qawktoep han tawn o mak ai, tiah ka
thuih, tiah a naa.

Levinaw ih hatu thungah maeto

²⁵ Angraeng mah Mosi khaeah, ²⁶ Levi kami-
naw khaeah, Nangcae mah qawktoep han kang
paek o ih Israel kaminaw khae ih hatu thungah
maeto na lak o naah, nangcae mah doeh hatu
thungah maeto Angraeng khaeah paek o patoeng

hanah thui paeh. ²⁷ Nangcae mah hae tiah na paek o ih hmuennawkw loe, cang atithaih ahmuen hoiah paek ih cang, misurtui pasawhhaih ahmuen hoiah paek ih misurtui baktiah poek pae tih. ²⁸ Nangcae mah doeh Israel kaminawkw khae hoi na hak o ih hatu thungah maeto to, Angraeng khaeah paek o toeng ah; to tiah Angraeng khaeah paek ih hmuen to qaima Aaron hanah paek oh. ²⁹ Nangcae khaeah paek ih hmuennawkw boih thungah, kahoih koek hoi kaciim koek hmuen to Angraeng han paek oh. ³⁰ To pongah Levi kaminawkw khaeah, Nangcae mah kahoih koek hmuen na paek o naah, na paek o ih hmuen to cang atithaih ahmuen, misurtui pasawhah ahmuen hoi paek ih hmuen baktiah poek pae tih, tiah thui paeh. ³¹ Kamtlai to loe nangmah hoi na imthung takoh boih mah kawbaktih ahmuen ah doeh na caak o thaih; to hmuen loe kaminawkw amkhuenghah kahni im ah toksakhah atho ah paek ih tangqum ah om tih. ³² Kahoih koek hmuen na paek o pacoengah, kamtlai na caak o ih hmuen nuiah zeahah om ai; Israel kaminawkw mah paek ih kaciim hmuennawkw to amhnong o sak hmah, to tih ai nahaeloe na dueh o moeng tih, tiah thui paeh, tiah a naa.

19

Amsaehhah tui

¹ Angraeng mah Mosi hoi Aaron khaeah,
² Angraeng mah thuih ih atawkw lok loe, Coek koi kaom ai, rong angdaek ai, vaito doeh laikok atokhah thing tahnong ah koeng vai ai, kathim maitaw tala to nang khaeah sin o hanah, Israel

kaminawk khaeah thui paeh, tiah a naa. ³ To maitaw tala to qaima Eleazar khaeah paek oh, anih mah ohhahim im tasa bangah hoi ueloe, kami maeto mah anih hmaa ah bop tih. ⁴ Qaima Eleazar mah maitaw tala athii to a banpazung tadong hoiah lak pacoengah, amkhuenghah kahni im hmaa ah vai sarihto haeh tih. ⁵ Kami maeto mah anih hmaa ah maitaw tala to hmai hoiah qoeng tih; ahin, angan, athii hoi aeknawk to hmai hoiah qoeng boih tih. ⁶ Qaima mah sidar thing, hmuihoih husop kung tadok hoi thlangqui kathim to la ueloe, hmai hoi qoeng ih maitaw tala nuiah va tih. ⁷ To pacoengah qaima mah a khukbuen to masuk ueloe, tui doeh amhluh tih; to pacoengah ni a ohhahim ah caeh vop tih; toe qaima loe duembang khoek to ciim mak ai vop. ⁸ Hmai qoeng kami doeh a khukbuen to masuk pacoengah, tui amhluk han oh; anih doeh duembang khoek to ciim mak ai vop. ⁹ Kaciim kami mah hmai hoi thlaek ih maitaw tala apoep to phrom ueloe, atai o hahim tasa bang ih hmuenciim maeto ah suem tih; to maiphu loe ciimcai ah amsaehhahim tui ah patoh han oh pongah, Israel acaengnawk mah pakuem o tih; to hmuen loe zae ciimhahim ah om tih. ¹⁰ Maitaw tala ih maiphu phrom kami loe a khukbuen to masuk han oh, anih loe duembang khoek to ciim mak ai; hae loe Israel kaminawk hoi nihcae salakah kaom angvin hanah dungzan ah paek ih zaehhoihhahim daan lok ah om tih.

¹¹ Kadueh qok sui kami loe, ni sarihto thung ciim mak ai. ¹² Ni thumto naah to ih maiphu

hoiah a takpum to amsae tih, anih loe ni sarihto naah ni ciim vop tih; toe anih mah ni thumto naah a takpum to kaciim ah amsae ai nahaeloe, ni sarihto khoeek to ciim mak ai boeh. ¹³ Kadueh qok to sui to mah a takpum tui hoiah amsae ai kami loe, Angraeng ih kahni im to amhnongsak; to kami loe Israel kaminawk thung hoiah pah-nawt han oh; kaciim ah amsaehhahih tui to a nuiah pathaek ai pongah, anih loe ciim ai; anih nuiah amhnonghahih to oh.

¹⁴ A ohhahim im ah kami dueh nahaeloe, sakhahim daan loe hae tiah oh; to kami ohhahim im ah akun kaminawk hoi imthung ah kaom kaminawk boih loe, ni sarihto thung ciim mak ai. ¹⁵ Kraeng ai ah kam-ong sut laom sabaenawk boih doeh ciim mak ai. ¹⁶ Sumsen hoi hum ih kami qok maw, to tih ai boeh loe kadueh qok maw, to tih ai boeh loe kami huh maw, to tih ai boeh loe taprong maw sui kami loe, ni sarihto thung ciim mak ai. ¹⁷ Kaciim ai kami ciimsak hanah hmai hoi thlaek ih maitaw tala ih apoep maiphu to la ah loe, kalong tui to laom thungah lawn pacoengah, ¹⁸ kaciim kami mah hmuihoih husop kung tadok to tui thungah nup ueloe, a ohhahim im maw, laom sabaenawk maw, im ah kaom kaminawk nuiah maw, kami huh sui kami nuiah maw, to tih ai boeh loe hum ih kami maw, to tih ai boeh loe kadueh kami maw, to tih ai boeh loe taprong sui kami nuiah maw pathaek tih. ¹⁹ Kaciim kami mah kaciim ai kami to ni thumto hoi ni sarihto niah pathaek tih; ni sarihto naah a takpum to ciimsak ueloe, a khukbuen to pasuk pacoengah, tui amhlu tih; duembang ah loe anih to ciim tih boeh.

²⁰ Toe ciim ai kami mah a takpum to ciimsak ai nahaeloe, Angraeng ih hmuenciim to amh-nongsak pongah, anih to amkhueng kaminawk salak hoi pahnawt han oh; kaciim ah pasaehhaih tui to anih nuih pathaek ai pongah, anih loe ciim ai. ²¹ Hae loe nihcae han dungzan ah paek ih zaehhoihhaih daan lok ah oh; kaciim tui pathaek kami doeh a khukbuen to pasuk han angaih; to tui sui kami doeh duembang khoek to ciim mak ai. ²² Kaciim ai kami mah sui ih hmuennawk boih loe, ciim mak ai; to hmuen sui kami doeh duembang khoek to ciim mak ai, tiah a naa.

20

Lungsong thung ih tui

¹ Israel rangpuinawk Zin praezaek phakhaih khrah to naah, Kadesh ahmuen ah oh o; Miriam loe to ahmuen ah duek moe, aphum o.

² To ahmuen ah kaminawk naek hanah tui om ai pongah, kaminawk mah Mosi hoi Aaron to zoeh hanah amkhueng o. ³ Kam nawkamyawk Angraeng hmaa ah duek o naah, kaicae doeh ka duek o nahaeloe hoih han tomah! ⁴ Tih hanah kaicae hoi ka pacah o ih moinawk dueksak hanah, Angraeng ih kaminawk hae praezaek ah na caeh hoi haih loe? ⁵ Tih hanah Izip prae thung hoiah nang tacawthaih moe, lawksak han kahoih ai, thaiduet thaih kaom ai, misurkung kaom ai, pomogranat thai doeh kaom ai, naek han tui doeh kaom ai, hae ahmuen kasae ah nang caeh haih loe? tiah kasae pakung o moe,

a zoeh o. ⁶ Mosi hoi Aaron loe amkhueng kaminawkw hmaa hoiah anghawkw hoi moe, kahni im thok taengah a caeh hoi pacoengah, long ah akuep hoi; to ah Angraeng lensawkhaih to nihnik khaeah amtueng pae. ⁷ Angraeng mah Mosi khaeah, ⁸ cunghet to la ah loe nam nawk Aaron hoi nawnto kaminawkw to amkhuengsak ah; nihcae hmaa ah kaom lungsong khaeah lok to thui ah; lungsong thung hoiah tui to tacawt tih, lungsong thung hoi tacawt tui to kaminawkw khaeah sin paeh loe, kaminawkw hoi moinawkw to naesak ah, tiah a naa. ⁹ Angraeng mah thuih ih lok baktih toengah, Mosi mah Angraeng hmaa ih cunghet to lak.

¹⁰ Mosi hoi Aaron mah kaminawkw to lungsong hmaa ah nawnto amkhuengsak; Mosi mah nihcae khaeah, Nangcae lok aek karah kaminawkw, vaihi tahngai oh; hae lungsong thung hoiah nangcae han tui kang tacawt hoi sak han, tiah a naa. ¹¹ To naah Mosi mah ban payangh moe, a cunghet hoiah lungsong to vai hnetto boh; to naah pop parai tui to tacawt, kaminawkw hoi a tawnh o ih moinawkw mah tui to naek o. ¹² Toe Angraeng mah Mosi hoi Aaron khaeah, Nanghnik loe, Israel kaminawkw hmaa ah Ka ciimcaihaih amtuengsak hanah kai nang tang hoi ai pongah, nihcae khaeah ka paek ih prae thungah hae kaminawkw hae na caeh hoi haih thai mak ai, tiah a naa. ¹³ Israel kaminawkw mah to ahmuen ah Angraeng ih lok aek o cadoeh, Angraeng mah nihcae khaeah a ciimcaihaih amtuengsak pongah, to ih tui to Meribah, tiah kawkw o.

Edom mah Israel pakaahaih

¹⁴ Mosi mah Kadesh ahmuen hoiah Edom siangpahrang khaeah laicaehnawk to patoeh moe, Nam nawk Israel mah, Kaicae nuiah angzo raihainawk to na panoek boih boeh. ¹⁵ Kaicae ampanawk loe Izip prae ah caeh o tathuk moe, to ah saning sawk parai ah khosak o; Izip kaminawk mah kaicae hoi kaicae ampanawk to pacaekthlaek o; ¹⁶ Toe Angraeng khaeah ka qah o naah, anih mah kaicae qahhaih lok to tahngaih pae, angmah ih van kami to patoeh moe, Izip prae thung hoiah loisak; khenah, kaicae loe vaihi nangcae ramri taeng, Kadesh ahmuen ah ka oh o. ¹⁷ Kaicae hae na prae thung hoiah na caehsak raeh; nangcae ih lawk ah maw, to tih ai boeh loe misur takha thungah maw ka caeh o mak ai; na tuipek tui doeh ka nae o mak ai; Siangpahrang ih Manglaih Lampui hoiah ni ka caeh o han; na prae ka poeng o ai karoek to, banqoi bantang kam khraeng o mak ai, tiah a naa o. ¹⁸ Toe Edom mah anih khaeah, Hae ahmuen hoiah angzo o hmah; nang zoh o nahaeloe, sunsen hoiah kang takroek o han, tiah a naa. ¹⁹ Israel kaminawk mah anih khaeah, Lampui hoiah ni ka caeh o han; kaicae mah maw, ka tawnh o ih moi mah maw, na tui to nae moeng nahaeloe, atho kang rong o han hman; tidoeh ka sah o mak ai, khok hoi khue ni ka caeh o han, tiah a naa. ²⁰ Toe nihcae mah, Hae ahmuen hoiah na caeh o mak ai, tiah a naa o let bae. Edom loe nihcae tuk hanah thacak pop parai kaminawk hoiah angzoh o. ²¹ Edom mah Israel caehhaih loklam to pahoe pae ai pongah, Israel kaminawk loe amlaem o

let.

Aaron duekhaih

²² Israel kaminawkw loe Kadesh ahmuen hoiah angqoi o boih moe, Hor mae ah caeh o. ²³ Edom prae ramri, Hor mae ah Angraeng mah Mosi hoi Aaron khaeah, ²⁴ Aaron loe angmah ih kaminawkw khaeah la tih boeh; Meribah ahmuen ih tui kawng pongah ka thuih ih lok to nang aek hoi pongah, Aaron loe Israel kaminawkw khaeah ka paek ih prae thungah akun mak ai. ²⁵ Aaron hoi a capa Eleazar to kawkw ah loe, Hor mae ah caeh haih ah; ²⁶ Aaron ih khukbuennawkw to khring paeh loe, a capa Eleazar to angkhuksak ah; Aaron loe angmah ih kaminawkw khaeah la ueloe, to ah dueh tih boeh, tiah a naa. ²⁷ Angraeng mah thuih ih lok baktih toengah, Mosi mah sak; nihcae loe rangpui kaminawkw mikhnuk ah Hor mae ah dawh o. ²⁸ Mosi mah Aaron ih khukbuennawkw to khring pae moe, a capa Eleazar to angkhuksak; Aaron loe mae nuih duek; to pacoengah Mosi hoi Eleazar loe mae nui hoiah anghum hoi tathuk. ²⁹ Aaron duek boeh, tito kaminawkw mah panoek o naah, Israel imthung takoh boih mah Aaron hanah ni qui thumto thung palungset o haih.

21

Arad duekhaih

¹ Prae aloih bang kaom, Kanaan siangpahrang Arad mah, Israel kaminawkw loe Atharim loklam bang hoiah angzo o tih, tiah a thaih naah,

Israel kaminawk to a tuk moe, thoemto Israel kaminawk to a naeh. ² To naah Israel mah Angraeng khaeah, Hae kaminawk hae ka ban ah nang paek nahaeloe, nihcae ih vangpuinawk to ka phraek pae boih han, tiah lokkamhaih sak. ³ To naah Israel lawkthuihaih to Angraeng mah tahngaih pae moe, Kanaan kaminawk to nihcae ban ah a paek; nihcae hoi nihcae ih vangpuinawk to Israel kaminawk mah phraek pae o boih; to pongah to ahmuen to Hormah, tiah kaw k o.

Sum kamling hoi sak ih pahui

⁴ Hor mae hoi tacawt o moe, tuiptui kathim bangah caehhaih loklam hoiah, Edom prae takui hanah a caeh o naah, loklam to set pongah kaminawk palungboeng o. ⁵ To naah kaminawk mah Sithaw hoi Mosi khaeah, Tipongah kaicae praezaek ah dueksak hanah Izip prae hoiah nang tacawt haih loe? Caak han takaw doeh om ai, tui doeh om ai; kakhraem ai hae takaw doeh ka panuet o boeh, tiah laisaep o thuih. ⁶ To naah Angraeng mah kasoetui thacak pahuinawk to kaminawk khaeah patoeh, pahui mah kaminawk to patuk pongah, Israel kaminawk loe paroeai duek o. ⁷ To pongah kaminawk loe Mosi khaeah angzoh o moe, Angraeng hoi nang kang laisaep o thuih pongah ka zae o boeh; Angraeng mah pahuinawk hae kaicae khae hoiah lak let hanah, lawk na thui paeh, tiah a naa o. To pongah Mosi mah kaminawk hanah lawkthuih pae. ⁸ Angraeng mah Mosi khaeah, Kasoetui

thacak pahui maeto sah ah loe, cungkui tadong ah bang ah; pahui mah patuk ih kami boih mah, pahui to khet naah, hing o tih, tiah a naa. ⁹ To pongah Mosi mah sum kamling hoiah pahui to sak moe, cungkui pongah a bangh; pahui mah patuk ih kami mah, sum kamling hoiah sak ih pahui to khet naah a hing.

Israel kaminawk kholong caehhaih

¹⁰ Israel kaminawk loe hmabang caeh o poe moe, Oboth ah anghak o. ¹¹ Oboth hoi amsak o let moe, ni angyae bang ih Moab pha ai naah kaom, Iye-Abarim ahmuen ah atai o. ¹² To ahmuen hoiah amsak o let bae moe, Zered azawn ah anghak o. ¹³ To ahmuen hoiah amsak o moe, Amor kaminawk ohhaih prae taeng ih praezaek ah kaom, Arnon vapui taeng ih ahmuen maeto bangah anghak o; Arnon vapui loe Moab hoi Amor prae salakah oh.

¹⁴ To pongah, Tuipui kathim hoi Arnon vacongnawk ah a sak ih hmuen kawng loe Angraeng ih misatukhaih cabu thungah oh, ¹⁵ Ar prae ah longh tathuk moe, Moab prae ramri taengah kaom vacong tui ah oh, tiah thuih ih lok to oh.

¹⁶ Arnon vapui hoi Beer tuipuek ah caeh o moe, to ih tuipuek ahmuen ah Angraeng mah Mosi khaeah, Kaminawk to nawnto amkhuengsak ah, nihcae to tui ka paek han, tiah a naa.

¹⁷ To naah Israel kaminawk mah hae laa hae sak o; Aw tuipuek nang, tacawt tahang ah; tacawt tahang hanah laa to sah o boih ah; ¹⁸ ukhaih kaalok sahkung mah thuih ih

lok baktih toengah, Angraeng ih caanawkw mah tuipek to takaeh o moe, kami zaehoikungnawkw mah doeh angmacae ih cunghet hoiah tuipek to takaeh o boeh, tiah laa to sak o. To praezaek ahmuen hoiah Mattanah ah a caeh o; ¹⁹ Mattanah ahmuen hoiah Nahaliel ah, Nahaliel hoiah Bamoth ah, ²⁰ Bamoth hoiah Moab prae thung ih azawn ah caeh o moe, Jeshimon vang-pui danhah Pisgah maesom nuiah a caeh o.

*Sihon saingpahrang Og pazawkhaih
(Deuteronomy 2.26-37)*

²¹ Israel kaminawkw mah Amor siangpahrang Sihon khaeah laicaehnawkw to patoeh moe, ²² na prae thung hoiah na caehsak raeh; na lawk thungah maw, to tih ai boeh loe na misur takha thungah maw, ka caeh o mak ai; na tuipek thung ih tui doeh ka nae o mak ai; na prae ka poeng o ai karoek to, Siangpahrang ih Manglaih Lampui hoiah ni ka caeh o han, tiah thuih pae o. ²³ Toe Sihon mah Israel kaminawkw to a prae thung hoiah caehsak ai; anih mah angmah ih misatuh kaminawkw to kok boih moe, Israel kaminawkw tuk hanah praezaek ah a caeh; Jahaz ahmuen ah caeh moe, Israel kaminawkw to a tuk. ²⁴ Toe Israel kaminawkw mah anih to sumsien hoiah takroek o moe, anih ih prae to Arnon hoi Jabbok karoek to, Ammon kaminawkw ohhah ahmuen karoek to lak pae o; Ammon kaminawkw ih ramri loe kacak ah pakaa o. ²⁵ Israel kaminawkw mah Amor kaminawkw ih vangpuinawkw to lak o boih moe, Heshbon hoi a taengah kaom avangnawkw doeh a lak pae o boih. ²⁶ Heshbon loe Armor kaminawkw ih siangpahrang, Sihon ohhah

vangpui ah oh; anih mah hmaloe ah kaom Moab siangpahrang to tuk moe, anih khae hoiah a prae to Arnon vapui khoeok to a lak pae.

²⁷ To pongah palungha lokthui kaminawkw mah, Heshbon vangpui ah angzo oh, Sihon ih vangpui hae sah o si; ²⁸ Sihon siangpahrang ohhah, Heshbon hoiah hmai to tacawt moe, Moab prae thungah kaom Ar vangpui hoi Arnon vapui taengah kaom, maesang ukkung siangpahrangnawkw to kangh boih boeh.

²⁹ Aw Moab prae, khosak na bingh! Aw Khe-mosh kaminawkw, nam ro o boih boeh! Kacawn a capa to misa mah naeh boeh moe, a canunawkw to Amor kaminawkw ih siangpahrang Sihon khaeah misong ah caehsak boeh.

³⁰ Kaicae mah Amor kaminawkw to ka tuk o pongah, Heshbon prae loe Dibon vangpui khoeok to amro boih boeh; Medeba taengah kaom, Nophah vangpui khoeok to nihcae to kam ro o sak boih boeh, tiah a thuih o.

³¹ To pongah Israel kaminawkw loe Amor kaminawkw ih prae thungah khosak o. ³² Mosi mah Jaazer vangpui to khet hanah kaminawkw to patoeh moe, a taengah kaom vangtanawkw to a lak o, to ah kaom Amor kaminawkw doeh a haek o.

*Siangpahrang Og pazawkhaih
(Deuteronomy 3.1-11)*

³³ To pacoengah nihcae loe amlaem o moe, Bashan bang caehhah loklam bangah caeh o tahang; to naah Bashan siangpahrang Og mah, angmah ih misatuh kaminawkw boih hoiah Edrei

ahmuen ah nihcae to tuk hanah a caeh o. ³⁴ To naah Angraeng mah Mosi khaeah, Anih to zii hmah; anih doeh, anih ih misatuh kaminawk boih hoi anih ih prae doeh, na ban ah kang paek boeh; to pongah Heshbon ah kaom, Amor kaminawk ih siangpahrang Sihon nuiah na sak ih hmuen baktih toengah, anih nuiah doeh sah ah, tiah a naa. ³⁵ To pongah anih to, a capanawk hoi a misatuh kaminawk boih hoiah nawnto, maeto doeh kahing ah loisak ai ah a hum bit; to pacoengah anih ih prae to lak pae o.

22

Balak mah Balaam to kaw

¹ To pacoengah Israel kaminawk loe Moab azawn ah caeh o moe, Moab prae azawn, Jordan vapui taeng, Jeriko vangpui maeto bangah atai o. ² Israel kaminawk mah Amor kami nuiah sak o ih hmuen to, Zippor capa Balak mah hnuk boih. ³ Israel kaminawk loe pop o parai pongah, Moab kaminawk mah nihcae to paroeai zit o. ⁴ Moab kaminawk mah Midian kacohtanawk khaeah, Maitaw tae mah palai hoiah taw ih qam takoih boih baktih toengah, haeah amkhueng kaminawk mah aicae taengah kaom hmuennawk to caa o boih tih boeh, tiah a naa o. To nathuem ah Zippor capa Balak to Moab siangpahrang ah oh. ⁵ Ammon prae thungah kalong vapui taengah kaom, Pethor vangpui ih kami, Beor capa Baalam to kawk hanah laicaehnawk to patoeh. Balak mah, Izip prae hoi angzo acaeng maeto loe, prae koimongah ka taengah atai o boeh. ⁶ To

22.5 NAM 31.8; 2 Pt 2.15,16; Jud 1.11.

pongah vaihi angzo ah, hae kaminawkw loe kai pongah thacak o, to pongah kai hanah nihcae to tangoeng paeh; to tiah na sak nahaeloe nihcae ka tuk naah, prae thung hoiah ka haek thai khoe doeh om tih; nang mah tahamhoihaih na paek ih kaminawkw loe tahamhoihaih a hnuk o moe, na tangoeng ih kaminawkw loe tangoeng ah oh o, tiah ka panoek, tiah a naa. ⁷ Moab hoi Midian kacohtanawkw loe tahmaa mah thuih ih lok to atho paek hanah, tangqum to sin o moe, a caeh o; Balaam khaeah a phak o naah, Balak mah thuih ih lok to anih khaeah thuih pae o. ⁸ Balaam mah nihcae khaeah, Vaiduem loe haeah cam o raeh; Angraeng mah paek ih lok to kang thuih o han hmang, tiah a naa. To pongah Moab ukkung angraengnawkw loe to ah Balaam hoi nawnto oh o. ⁹ Balaam khaeah Sithaw angzoh moe, Nang khaeah kaom kaminawkw loe kawbaktih kaminawkw maw? tiah a dueng. ¹⁰ Balaam mah Sithaw khaeah, Zippor capa, Moab siangpahrang Balak mah hae kaminawkw hae kai khaeah ang patoeh, ¹¹ khenah, Izip prae hoi angzo kaminawkw loe, prae koimongah oh o boeh; to pongah vaihi angzo ah loe, hae kaminawkw hae kai hanah tangoeng pae ah; to tih nahaeloe hae kaminawkw hae ka tuh pazawkw ueloe, ka haek thai khoe doeh om tih, tiah ang thuih o, tiah a naa. ¹² Toe Sithaw mah Balaam khaeah, Nihcae hnukah caeh hmah; to kaminawkw loe tahamhoih kami ah oh o pongah, tangoeng hmah, tiah a naa. ¹³ Balaam loe khawnbang khawnthaw ah anghawkw moe, Balak ih toksah angraengnawkw khaeah, Nang-macae prae ah amlaem o lai ah, Angraeng mah

nangcae hnukah na bangsak ai, tiah a naa. ¹⁴ To pongah Moab ukkung angraengnawwk loe Balak khaeah amlaem o let moe, anih khaeah, Balaam loe kaicae hnukah bang hanah angmak khruiek, tiah a naa o. ¹⁵ To naah Balak mah hmaloe ah patoeh ih ukkungnawwk pongah kapop, ahmin kamthang kue kalah ukkung angraengnawwk to laicaeh ah patoeh let. ¹⁶ Nihcae Balaam khaeah angzoh o moe, anih khaeah, Zippor capa Balak mah, Kai khae angzoh han ai ah, tih mah doeh pakaa hmah nasoe; ¹⁷ nang to kasang ah kang pakoe h moe, na thuih ih hmuen to kang sak pae boih han; to pongah angzo ah loe, hae kaminawwk hae kai hanah na tangoeng paeh, tiah a thuih, tiah a naa o. ¹⁸ Toe Balaam mah, Balak ih tamnanawwk khaeah, Balak mah sui, sum kanglung hoi koimongah kaom angmah ih siangpahrang im to na paek langlacadoeh, zetta ah maw, to tih ai boeh loe pop parai ah maw, ka Angraeng mah paek ih lok pong kamtlai ah tidoeh ka sah mak ai. ¹⁹ To pongah nangcae doeh, Vaiduem loe haeah cam o raeh; Angraeng mah timaw na thui vop tih, tito tahngai rae si, tiah a naa. ²⁰ To naduem ah Sithaw Balaam khaeah caeh moe, anih khaeah, Kai nang kawwk hanah kaminawwk angzo o nahaeloe, anghawwk ah loe, nihcae hoi nawnto caeh ah; toe kang thuih ih lok khue ni na sak han oh, tiah a naa.

Balaam ih hrang lok apaeh

²¹ Balaam loe khawnbang khawnthaw ah anghawwk, laa hrang nuiah anghnut moe, Moab ukkung angraengnawwk hoi nawnto a caeh.

²² Nihcae hoi nawnto a caeh pongah, Sithaw

palungphui; nihcae to pakaa hanah Angraeng ih van kami to loklam ah angdoet khoep. Balaam loe angmah ih laa hrang nuiah angthueng moe, a tamna hnetto hoi nawnto a caeh. ²³ Angraeng ih van kami loe a ban ah sumsen to sin moe, loklam ah angdoet khoep, tiah laa hrang mah hnuk naah, hrang loe loklam amkhraeng moe, lawk bangah caeh ving; to loklam ah a caeh let thai hanah, Balaam mah laa hrang to boh. ²⁴ Misur takha salak ih loklam ah a caeh naah, Angraeng ih van kami to angdoet moe, hae bangah doeh ho bangah doeh sipae thung pae khoep. ²⁵ Laa hrang mah Angraeng ih van kami to hnuk let naah, sipae to a daeng hmop moe, Balaam ih khok daeng pae ngawng; to naah Balaam mah hrang to boh let bae. ²⁶ To pacoengah Angraeng ih van kami loe hmabang ah caeh moe, banqoi bantang angqoi han kaom ai tamcaek loklam ah angdoet pae khoep. ²⁷ Laa hrang mah Angraeng ih van kami to hnuk let naah, Balaam tlim ah tabok pae; to naah Balaam palungphui moe, cunghet hoiah laa hrang to boh let. ²⁸ To naah Angraeng mah laa hrang ih pakha to paongh pae, hrang mah Balaam khaeah, Kawbang maw kang naa moe, kai vai thumto nang boh? tiah a naa. ²⁹ Balaam mah laa hrang khaeah, Kai hae tiah doeh nang sah ai; ka ban ah sumsen om nahaeloe, vaihi roe kang hum han boeh, tiah a naa. ³⁰ To naah laa hrang mah Balaam khaeah, Kai loe nang mah vaihni ni khoek to nang thueng ih, nangmah ih laa hrang ah na ai maw ka oh? Nang khaeah hae tiah ka oh vai maw? tiah Balaam hanah a naa. To naah anih mah, Hae

tiah na om vai ai, tiah a naa.

³¹ Angraeng mah Balaam ih mik to amtuengsak naah, a ban ah sumsen kasin, loklam tamcaek ah kangdoe khoep, Angraeng ih van kami to anih mah hnuk; to pongah anih loe akuiep tathuk moe, long ah tabok. ³² Angraeng ih van kami mah, Tipongah nangmah ih laa hrang to vai thumto na boh loe? Khenah, na caehhah loklam loe kai hoi buenglueng tamlet ah oh, to pongah nangpakaa hanah kang zoh; ³³ laa hrang mah kai ang hnuk pongah, kai khae hoi loklam vai thumto amkhraeng ving; kai khae hoi amkhraeng ai nahaeloe, vaihi roe nang to kang hum moe, nang ih laa hrang to ka hingsak lat han, tiah a naa. ³⁴ Balaam mah Angraeng ih van kami khaeah, Ka zae moeng boeh; kai pakaa hanah loklam ah nang doet, tito ka panoek ai; to pongah vaihi na koeh ai nahaeloe, kam laem let han, tiah a naa. ³⁵ Angraeng ih van kami mah Balaam khaeah, Kaminawk hoi nawnto caeh ah, toe kang thuih ih lok khue to ni na thuih han, tiah a naa. To pongah Balaam loe Balak ih toksah angraengnawk hoi nawnto caeh.

³⁶ Balaam angzoh boeh, tiah Balak mah thaih naah, anih dawt hanah, Moab prae ramri Arnon vapui taengah kaom vangpui maeto ah a caeh. ³⁷ Balak mah Balaam khaeah, Nang kaw kwan hoi vaihi hoi vaihi kami kang patoeh na ai maw, tikhoe hae tih khoe to na kra loe? Nang hae kasang ah kang paloep mak ai, tiah na poek maw? tiah a naa. ³⁸ Balaam mah Balak khaeah, Khenah, vaihi nang khaeah kang zoh boeh, lok ka thui thai tih maw? Sithaw mah ka pakha

thungah suek ih lok khue ni ka thuih han, tiah a naa. ³⁹ To pacoengah Balaam loe Balak hoi nawnto Kirjath-Huzoth ah caeh. ⁴⁰ Balak mah maitaw hoi tuunawk hoiah angbawnhahih to sak, to pacoengah Balaam hoi anih khaeah kaom ukkung angraengnawk hanah doeh a pat pae thoem.

⁴¹ Khawnbang ah loe Balak mah Balaam to kaw k moe, Israel kaminaw k patuek hanah, Baal sithaw ohhahih hmuensang ah a caeh haih.

23

Balaam mah patahhaih

¹ Balaam mah Balak khaeah, Kai han haeah hmaicam sarihto sah ah loe, maitaw tae sarihto hoi tuu tae sarihto suem ah, tiah a naa. ² Balaam mah thuih ih lok baktih toengah Balak mah sak pae; Balak hoi Balaam mah hmaicam maeto nuiah, maitaw tae maeto, tuu tae maeto hoiah angbawnhahih a sak hoi. ³ Balaam mah, Balak khaeah, Na sak ih hmai angbawnhahih taengah om ah; kai loe ahmuen maeto ah ka caeh han; to ah kai tongh hanah Angraeng angzo khoe doeh om tih; anih mah ang hnuksak ih hmuen to kang thuih boih han hmang, tiah a naa. To pacoengah anih loe hmuensang ah caeh. ⁴ Sithaw mah Balaam to tongh, Balaam mah anih khaeah, Hmaicam sarihto ka sak moe, hmaicam maeto boih nuiah maitaw tae maeto hoi tuu tae maeto ka tathlang boeh, tiah a naa. ⁵ Angraeng mah Balaam ih pakha thungah lok to suek pae, Balak khaeah amlaem let ah loe, hae lok hae anih khaeah thui paeh, tiah a naa. ⁶ To pongah

anah Balak khaeah amlaem tathuk naah, khenah, Balak loe Moab ukkung angraengnawk boih hoi nawnto sak ih hmai angbawnhahih taengah angdoet.

⁷ To naah Balaam mah patahhaih lok to thuih pae; Moab siangpahrang Balak mah, angzo ah loe, kai hanah Jakob acaengnawk hae tangoeng pae ah; angzo ah loe, Israel kaminawk hae amrosak ah, tiah Aram prae ni angyae bangah kaom maesang hoiah kai hae ang caeh haih boeh, tiah a naa. ⁸ Sithaw mah tangoeng ai ih kami to kawbang maw ka tangoeng thaih ueloe, Angraeng mah amrosak ai ih kami to kawbang maw kam rosak thah tih? ⁹ Lungsong nui hoiah anih to ka hnuk moe, maesang hoiah anih to ka dan; khenah, to kaminawk loe angmacae khue om o tih, kalah kaminawk hoi angbaeh o mak ai. ¹⁰ Jakob acaeng ih maiphu loe mi mah maw kroek thah tih, Israel acaeng palito thung ih maeto mataeng doeh mi mah maw kroek thah tih? Kai loe katoeng kami baktiah dueh nasoe, ka boenghahih doeh nihcae boenghahih baktiah om nasoe, tiah a thuih pae.

¹¹ Balak mah Balaam khaeah, Kai khaeah timaw na sak? Ka misanawk tangoeng thuih han ih na ai maw kang kaw, khenah, tipongah nihcae to tahamhoihaih na paek lat loe? tiah a naa. ¹² Anih mah, Angraeng mah ka pakha thungah suek ih lok to acoehaih hoiah ka thui mak ai maw? tiah a naa.

Balaam vai hnetto lokthuihahih

¹³ Balak mah anih khaeah, Angzo ah, nihcae khet naah, nihcae boih kamtueng ai ahmuen,

nihcae ahap khue amtuenghah ahmuen kalah bangah caeh si; to ahmuen hoiah nihcae to kai han na tangoeng pae let ah, tiah a naa. ¹⁴ To pongah Zophim azawn hoiah Pisgah mae nuiah anih to caeh haih moe, to ah hmaicam sarihto sak pacoengah, hmaicam maeto nuiah maitaw tae maeto hoi tuu tae maeto angbawnhah ah a paek. ¹⁵ Balaam mah Balak khaeah, Angraeng tongh hanah ahmuen kalah ah ka caeh nathung, nang loe na sak ih angbawnhah ahmuen taengah om ah, tiah a naa. ¹⁶ Angraeng mah Balaam to tongh, anih ih pakha ah lok to a suek pae moe, Balak khaeah amlaem let ah loe, hae lok hae thui paeh, tiah a naa. ¹⁷ Balaam amlaem let naah loe, khenah, Moab ukkung angraengnawk hoi nawnto sak ih hmai angbawnhah taengah angdoe Balak to a hnuk. To naah Balak mah, Angraeng mah timaw ang thuih? tiah a dueng.

¹⁸ To naah anih mah patahhah lok to hae tiah a thuih pae; Balak, anghawk ah loe, tahngai ah; Zippor capa, ka lok hae tahngai ah; ¹⁹ Sithaw loe amsawnlok thui kami na ai ni; dawnpakhuemhah tawn kami ih capa doeh na ai ni; anih loe a thuih ih lok baktiah sah ai ah oh vai maw? A lokkam ih baktiah koepsak ai ah oh vai maw? ²⁰ Khenah, Tahamhoihah paek hanah ang thuih ih lok to ka hnuk boeh; tahamhoihah ang paek boeh pongah, ka pakhrail thai mak ai boeh. ²¹ Anih mah Jakob zaehah to hnu ai, Israel acaeng nuiah doeh kahoih ai loklam amkhraenghah to hnu ai; anih ih Angraeng Sithaw loe anih hoi nawnto oh moe, nihcae salakah Siangpahrang hanghah lok to oh.

²² Sithaw mah nihcae to Izip prae thung hoiah tacawtsak boeh; Israel kaminawk loe kokno thacakhaih to tawnh o. ²³ Jakob tuk hanah lunggh aahhaih om ai, Israel tuk hanah tahmaa baktiah thuih coek ih lok doeh om ai. Jakob hoi Israel kawng pongah, Vaihi Sithaw mah timaw sak, tito khen oh, tiah thui o tih. ²⁴ Khenah, kaminawk loe kaipui baktiah anghawk o tih; saning kanawk kaipui baktiah tacawt o tih; a naeh ih moi to caa ai moe, a kaek ih moi thii to nae ai karoek to, omduem ai kaipui baktiah oh o, tiah a naa.

²⁵ To naah Balak mah Balaam khaeah, Nihcae to tangoeng thuih hmah loe, tahamhoihaih doeh paek hmah, tiah a naa. ²⁶ Toe Balaam mah, Balak khaeah, Angraeng mah thuih ih lok khue ni kang thuih han, tiah kang thuih boeh na ai maw? tiah a naa.

Balaam mah thuih ih vai thumto haih lok

²⁷ To pacoengah Balak mah Balaam khaeah, Angzo ah; kalah ahmuen bangah kang caeh haih han; to ahmuen hoiah nihcae nang tangoeng pae hanah, Angraeng ih palung tongh khoe doeh om tih, tiah a naa. ²⁸ Balak mah Balaam to kawmoe, Jeshimon vangpui bangah anggoi Peor mae nuiah a caeh haih. ²⁹ Balaam mah, Balak khaeah, Hae ahmuen ah kai han hmaicam sarihto sah ah loe, maitaw tae sarihto hoi tuu tae sarihto angbawnhah ah paek ah, tiah a naa. ³⁰ Balaam mah thuih ih lok baktih toengah Balak mah sak moe, hmaicam maeto boih nuiah maitaw tae maeto hoi tuu tae maeto a tathlang.

24

¹ Angraeng mah Israel kaminawk tahamhoihaih paek han koeh, tito Balaam mah panoek naah, hmacawnhahih hnuk hanah, canghniah caeh ih baktih toengah caeh ai ah, a mikhmai to praezaek bangah paqoi ving. ² Balaam mah khet naah, angmacae acaeng maeto pacoeng maeto nawnto amkhueng Israel kaminawk to a hnuk; to naah Sithaw ih Muithla a nuiah phak.

³ Anih mah taphong han ih patahhaih lok to lak moe, mik amtueng, Beor capa Balaam ih lok; ⁴ long ah amtimh pacoengah, mik kamtueng, thacak Angraeng hnuksakhaih hnukung, Sithaw mah thuih ih lok thaih kami mah thuih ih lok loe, ⁵ Aw Jakob, na ohhahih imnawk loe kawkruk maw hoih, Aw Israel, na kahni im loe kawkruk maw hoih! ⁶ Nang loe kawk parai azawnnawk, tuipei taengah kaom takhanawk, Angraeng mah thling ih thingnawk hoi tui taengah amprawk sidar thingnawk baktiah na oh o.

⁷ Anih loe a tui tabu thung hoiah tui to krai ueloe, anih ih aanmunawk loe kapop tui ahmuen ah krah o tih; anih ih siangpahrang loe Agag pongah len kue ueloe, a ukhahih prae doeh kasang ah pakoehhaih om tih. ⁸ Sithaw mah anih to Izip prae thung hoiah zaeh, anih loe kokno baktiah thacak; anih mah a misa ah kaom prae kaminawk to paeah ueloe, nihcae ih ahuhnawk to khaek pae tih; angmah ih kalii hoiah nihcae to kat tih. ⁹ Anih loe kaipui baktiah caeh moe, kalen kaipui baktiah tabok; anih to mi mah maw pathawk thai tih? Nang tahamhoihaih paek kami

loe, tahamhoihaih tongh ueloe, nang tangoeng kami loe tangoeng ah om tih, tiah a naa. ¹⁰ Balak mah Balaam to palungphui thuih, a ban tabaeng phang pacoengah, Balak mah Balaam khaeah, Ka misanawkw tangoeng hanah kang kawkw, toe khenah, nihcae to vai thumto tahamhoihaih na paek lat. ¹¹ To pongah vaihi na ohhah ahmuen ah cawn lai ah; nang hae kasang ah kang suek han, tiah poekhaih ka tawnh; toe khenah, to tiah oh han ai ah Angraeng mah pakaa ving boeh, tiah a naa. ¹² Balaam mah Balak khaeah, Nang patoeh ih laicaehnawkw khaeah, ¹³ Balak mah sui hoi sum kanglung koimongah suek ih angmah ih siangpahrang im to na paek langlacaoeh, Angraeng mah paek ih lok pong kamtlai ah, kasae hmuen ah maw, to tih ai boeh loe kahoih hmuen ah maw, ka poekhaih to ka thui cop mak ai; Angraeng mah thuih ih lok khue ni ka thuih han, tiah ka thuih boeh na ai maw? ¹⁴ Khenah, vaihi loe kaimah ih kaminawkw khaeah ka caeh han boeh; to pongah angzo ah; hae kaminawkw mah hmabang ah nang ih kaminawkw nuiah timaw sah o tih, tito kang thuih han, tiah a naa.

Balaam mah taphong ih vai palito haih lok

¹⁵ Anih mah taphong han ih patahhaih lok to lak moe, mik kamtueng, Beor capa Balaam mah thuih ih lok; ¹⁶ long ah amtimh pacoengah, mik kamtueng, thacak Angraeng hnuksakhaih hnukung, Kasang koek Sithaw palunghahaih panoekkung mah thuih ih lok loe, ¹⁷ anih to ka hnu tih, toe vaihi ka hnu mak ai vop; anih to ka khet han, toe atue loe anghnai ai vop; Jakob

acaeng thung hoiah cakaeh maeto tacawt ueloe, Israel thung hoiah angraeng cunghet maeto anghawk tahang tih; anih mah Moab prae taki taket khoeok to tuh ueloe, Sheth capanawk to amrosak boih tih. ¹⁸ Edom prae to la ueloe, Seir mae doeh anih ih misanawk mah la o tih; toe Israel loe misahoihaih hoiah thacak aep aep tih. ¹⁹ Jakob thung hoiah ukkung maeto tacawt ueloe, vangpui thungah anghmat kaminawk to hum tih, tiah a naa.

Balaam mah hnukkhuem koek thuih ih lok

²⁰ Balaam mah Amalek to khet moe, patahhaih lok to a thuih; acaeng kaminawk boih thungah Amalek loe hmaloe koek ah oh; toe anih loe hnukkhuem koek ah amro tih, tiah a naa.

²¹ To pacoengah Ken kaminawk to a khet moe, patahhaih lok to a thuih; na ohhaih ahmuen loe caak moe, tabu doeh lungsong nuiah na boh, ²² toe Ken kaminawk loe, Ashur ukkung mah tamna ah naeh ueloe, anghma angtaa o tih.

²³ To pacoengah taphong han ih patahhaih lok to lak moe, Ala, Sithaw mah hae hmuen sak naah mi maw hing thai tih? ²⁴ Kittim tui taeng hoiah palongpuinawk angzo o ueloe, nihcae mah Asshur hoi Eber to pazawk tih; toe angmacae doeh amro tih, tiah a naa.

²⁵ Balaam loe anghawk tahang moe, angmah im ah amlaem, to pacoengah Balak doeh angmah ih loklam ah caeh toeng.

25

Moab mah Israel alinghaih

¹ Israel kaminawk Shittim ah oh o naah, Moab canunawk hoiah nongpa nongpata zaehaih sak amtong o. ² To nongpatanawk mah angmacae sithaw angbawnhah ahmuen ah Israel kaminawk angzoh thai hanah pacae o; to kaminawk loe angbawnhah buh aan to caak o moe, to ih sithawnawk hma ah akuep o. ³ To tiah Israel kaminawk mah Peor ahmuen ah Baal to bok o pongah, Angraeng palungphuihah Israel kaminawk nuiah phak. ⁴ To naah Angraeng mah Mosi khaeah, Hae kami zaehoikungnawk to kaw k boih ah loe, zit kathok Angraeng palungphuihah Israel khae hoi dip thai hanah, nihcae to khodai ah Angraeng hmaa ah qui hoiah bang ah, tiah a naa. ⁵ To pongah Mosi mah Israel lokcaekkungnaw khaeah, Baal-Peor bokhah ahmuen ah caeh kaminawk boih to hum oh, tiah a naa.

⁶ Khenah, Israel kami maeto mah, Mosi hoi amkhuenghah kahni im thok taengah kaqah, kamkhueng angmah ih nawkamya Israel kaminaw k boih hma ah, Midian nongpata maeto angzoh haih. ⁷ Qaima Aaron capa Eleazar, Eleazar capa Phinehas mah anih to hnuk naah, anih mah tayae to ban ah sin, kamkhueng kaminawk salak hoiah angthawk moe, ⁸ to tiah zaehaih sah Israel kami ohhah kahni im khoe k to a pangh pacoengah, Israel kami hoi to nongpata to tayae hoiah zok ah takhawh hmaek. To naah Israel salak ih nathah kasae to dip. ⁹ Toe to ih kasae nathah pongah kami sing hnet, sang palito duek o.

¹⁰ Angraeng mah Mosi khaeah, ¹¹ Qaima Aaron

capa Eleazar, Eleazar capa Phinehas loe, kai pakoehhahih bangah palungthin thacak kami ah oh pongah, Israel kaminawk ka hum han ai ah, Israel nuihah palung ka phuihahih to anih mah dipsak boeh. ¹² To pongah, Khenah, anih khaeah angdaeh lokmaihahih to ka paek boeh; ¹³ anih loe Sithaw bokhahih bangah palungthin thacak moe, Israel kaminawk zae loih thai hanah, angbawn-hahih a sak pongah, angmah hoi a caanawk khoek to dungzan ah qaima toksak hanah lokmaihahih to hnu tih, tiah a thuih pae.

¹⁴ Midian nongpata hoi nawnto hum ih Israel kami ahmin loe, Simeon acaeng zaehoikung ah kaom, Salu ih capa Zimri. ¹⁵ Hum ih Midian nongpata ahmin loe, Midian imthung takoh lu koek ah kaom, Zur canu Gozbi.

¹⁶ Angraeng mah Mosi khaeah, ¹⁷ Midian kaminawk to na misa baktiah poek ah loe hum ah; ¹⁸ Peor sithaw to bok pongah, nathaih kasae phakhahih niah hum ih, Midian kaminawk zaehoikung ih canu, nihcae ih tanu ah kaom, Gozbi hoi Peor kawng pongah, nangcae to ang ling o boeh, tiah a naa.

26

Vai hnetto haih ahmin lakhahih

¹ Kasae nathaih phak pacoengah, Angraeng mah Mosi hoi qaima Aaron capa Eleazar khaeah, ² saning pumphae to pacoeng ranuih bang kaom, misa tuh thaih Israel acaeng thung ih kaminawk boih to ahmin la ah, tiah a naa. ³ To pongah

Mosi hoi qaima Eleazar mah, Moab azawn, Jordan vapui taeng, Jeriko vangpui ahmuen maeto bang ih kaminawk khaeah, ⁴ Angraeng mah Mosi khaeah paek ih lok baktih toengah, saning pumphao ranuih bang kami boih ahmin lak han oh, tiah a thuih pae hoi. Izip prae hoi angzo Israel kaminawk loe, ⁵ Israel ih calu, Reuben ih caanawk; Hanok ih acaeng loe, Hanok hoi tacawt kami ah oh; Pallu ih acaeng loe, Pallu hoi tacawt kami ah oh; ⁶ Hezron ih acaeng loe, Hezron hoi tacawt kami ah oh; Karmi ih acaeng loe, Karmi hoi tacawt kami ah oh o. ⁷ To kaminawk loe Reuben ih acaeng ah oh o moe, ahmin lak naah sangqum boih ah sing pali, sang thum, cumvai sarih, qui thumto oh o. ⁸ Pallu capa loe Eliab; ⁹ Eliab capanawk loe Nemuel, Dathan hoi Abiram; to ih Dathan hoi Abiram loe rangpui kaminawk salakah ahmin amthang hoi moe, Aaron hoi Mosi ih lok aek kami, Angraeng ih lok aek kami ah oh hoi pacoengah, Korah hnukbang kaminawk hoi amyok kami ah oh hoi. ¹⁰ Nihnik loe long mah pakha aangh moe, Korah hoi nawnto paaeh ving boeh, anih hnukbang kami cumvai hnet, qui pangato doeh hmai mah kangh moe duek o; nihcae loe acoehaih paekkung ah oh o. ¹¹ Toe Korah ih caanawk loe dueh o ai.

¹² Simeon imthung takoh hoi tacawt caanawk loe, Nemuel ih acaeng loe, Nemuel hoi tacawt kami ah oh o; Jamim hoi tacawt kami loe, Jamim ih acaeng ah oh o; Jachin ih acaeng loe, Jachin hoi tacawt kami ah oh o; ¹³ Zerah ih acaeng loe, Zerah hoi tacawt kami ah oh o; Shaul ih acaeng loe, Shaul hoi tacawt kami ah oh o. ¹⁴ Simeon

ih acaengnawkw loe, kami sang pumphae hnet, cumvai hnetto oh o. ¹⁵ Gad imthung takoh hoi tacawt caanawkw; Zephon ih acaeng loe, Zephon hoi tacawt kami ah oh o; Haggi ih acaeng loe, Haggi hoi tacawt kami ah oh o; Shuni ih acaeng loe, Shuni hoi tacawt kami ah oh o; ¹⁶ Ozni acaeng loe, Ozni hoi tacawt kami ah oh o; Eri ih acaeng loe, Eri hoi tacawt kami ah oh o; ¹⁷ Arodi ih acaeng loe, Arod hoi tacawt kami ah oh o; Areli acaeng loe, Areli hoi tacawt kami ah oh o. ¹⁸ Gad acaengnawkw loe, kami sang qui pali, cumvai pangato oh o.

¹⁹ Er hoi Onan loe, Judah ih capa ah oh hoi moe, Kanaan prae ah duek hoi ving boeh. ²⁰ Judah imthung takoh hoi tacawt caanawkw; Shelah ih acaeng loe, Shelah hoi tacawt kami ah oh; Pharez ih acaeng loe, Pharez hoi tacawt kami ah oh o; Zerah ih acaeng loe, Zerah hoi tacawt kami ah oh o. ²¹ Pharez ih caanawkw; Hezron ih acaeng loe, Hezron hoi tacawt kami ah oh; Hamul ih acaeng loe, Hamul hoi tacawt kami ah oh o. ²² Judah ih acaengnawkw loe kami sing sarih, sang taruk, cumvai pangato oh o.

²³ Issakar imthung takoh hoi tacawt caanawkw; Tola ih acaeng loe, Tola hoi tacawt kami ah oh o; Pua ih acaeng loe, Pua hoi tacawt kami ah oh o. ²⁴ Jashub ih acaeng loe, Jashub hoi tacawt kami ah oh, Shimron ih acaeng loe, Shimron hoi tacawt kami ah oh o. ²⁵ Issakar ih acaengnawkw loe, kami sing taruk, sang pali, cumvai thumto oh o. ²⁶ Jebulun imthung takoh hoi tacawt caanawkw; Sardi ih acaeng loe, Sered hoi tacawt kami ah oh o; Elon ih acaeng loe, Elon hoi tacawt kami ah oh

o; Jahleel ih acaeng loe, Jahleel hoi tacawt kami ah oh o. ²⁷ Jebulun acaengnawk loe, kami sing taruk, cumvai pangato oh o.

²⁸ Joseph imthung takoh hoi tacawt caanawk loe, Manasseh hoi Ephraim hae ni. ²⁹ Manasseh acaengnawk; Makir ih acaeng loe, Makir hoi tacawt kami ah oh o; Makir loe Gilead ih ampa ah oh; Gilead ih acaeng loe, Gilead hoi tacawt kami ah oh o; ³⁰ Gilead ih acaengnawk; Jeezer ih acaeng loe, Jeezer hoi tacawt kami ah oh o; Helek ih acaeng loe, Helek hoi tacawt kami ah oh o; ³¹ Asriel ih acaeng loe, Asriel hoi tacawt kami ah oh o; Shekem ih acaeng loe, Shekem hoi tacawt kami ah oh o; ³² Shemida ih acaeng loe, Shemida hoi tacawt kami ah oh o; Hepher ih acaeng loe, Hepher hoi tacawt kami ah oh o. ³³ Hepher ih capa Zelophehad loe, capa tawn ai; canunawk khue ni a tawnh; canunawk ih ahmin loe, Mahlah, Noah, Hoglah, Milkah hoi Tirzah. ³⁴ Hae kaminawk loe Manasseh ih acaeng ah oh o moe, kroek naah nihcae loe kami sing panga, sang hnet, cumvai sarihto oh o.

³⁵ Ephraim imthung takoh hoi tacawt caanawk; Shuthelah ih acaeng loe, Shuthelah hoi tacawt kami ah oh o; Beker ih acaeng loe, Beker hoi tacawt kami ah oh o; Tahan ih acaeng loe, Tahan hoi tacawt kami ah oh o. ³⁶ Shutheleh ih caanawk; Eran ih acaeng loe, Eran hoi tacawt kami ah oh o. ³⁷ Ephraim ih acaengnawk loe kroek naah, kami sing thum, sang hnet, cumvai pangato oh o. Joseph imthung takoh hoi tacawt acaengnawk loe to zetto oh o.

³⁸ Benjamin imthung takoh hoi tacawt caanawk; Bela ih acaeng loe, Bela hoi tacawt kami ah oh o; Ashbel ih acaeng loe, Ashbel hoi tacawt kami ah oh o; Ahiram ih acaeng loe, Ahiram hoi tacawt kami ah oh o; ³⁹ Shupham ih acaeng loe, Shupham hoi tacawt kami ah oh o; Hupham ih acaeng loe, Hupham hoi tacawt kami ah oh o. ⁴⁰ Ard hoi Naaman hoi tacawt Bela ih caanawk; Ard ih acaeng loe, Ard hoi tacawt kami ah oh o; Naaman hoi tacawt kami loe, Naaman ih acaeng ah oh o. ⁴¹ Benjamin ih acaengnawk loe kroek naah, kami sing pali, sang panga, cumvai tarukto oh o. ⁴² Dan imthung takoh hoi tacawt caanawk; Shuham hoi tacawt kami loe, Shuham ih acaeng ah oh o. Hae kaminawk loe Dan ih acaeng ah oh o. ⁴³ To tiah Shulam ih acaengnawk loe kroek naah, kami sing taruk, sang pali, cumvai palito oh o. ⁴⁴ Asher imthung takoh hoi tacawt caanawk; Jimna ih acaeng loe, Jimna hoi tacawt kami ah oh o; Jesui ih acaeng loe, Jesui hoi tacawt kami ah oh o; Beriah ih acaeng loe, Beriah hoi tacawt kami ah oh o. ⁴⁵ Beriah ih caanawk; Herber ih acaeng loe, Heber hoi tacawt kami ah oh o; Malkiel ih acaeng loe, Malkiel hoi tacawt kami ah oh o. ⁴⁶ Asher canu ih ahmin loe Sarah. ⁴⁷ Asher ih acaengnawk loe kroek naah, kami sing panga, sang thum, cumvai palito oh o. ⁴⁸ Naphtali imthung takoh hoi tacawt caanawk; Jahzeel ih acaeng loe, Jahzeel hoi tacawt kami ah oh o; Guni ih acaeng loe, Guni hoi tacawt kami ah oh o; ⁴⁹ Jezer ih acaeng loe, Jezer hoi tacawt kami ah oh o; Shillem ih acaeng loe, Shillem hoi tacawt

kaminawk ah oh o. ⁵⁰ Naphtali ih acaengnawk loe kroek naah, sing pali, sang panga, cumvai palito oh o. ⁵¹ Israel kaminawk loe kroek naah, kami sing qui taruk, sangto pacoeng, cumvai sarih, qui thumto oh o. ⁵² Angraeng mah Mosi khaeah, ⁵³ Angmacae ih ahmin baktih toengah, nihcae han prae to pazet paeh. ⁵⁴ Kami pop kue acaeng hanah qawk to pop kueah paek ah loe, kami tamsi kue hanah qawk to tamsi kueah paek ah; angmacae imthung takoh ih kami zetto qawk to paek han oh. ⁵⁵ Toe prae loe taham khethaih phoisa vah hoiah pazet ah; ampanawk ih acaeng hmin hoiah ni prae to toep o tih. ⁵⁶ Lawk loe kami pop hoi tamsi baktih toengah, taham khethaih phoisa vahhah hoiah pazet ah, tiah a naa.

⁵⁷ Levi imthung takoh hoi tacawt acaengnawk; Gershon ih acaeng loe, Gershon hoi tacawt kami ah oh o; Kohath ih acaeng loe, Kohath hoi tacawt kami ah oh o; Merari ih acaeng loe, Merari hoi tacawt kami ah oh o. ⁵⁸ Levi acaeng thungah loe, Libni ih acaeng, Hebron ih acaeng, Mahli ih acaeng, Mushi ih acaeng hoi Korah ih acaengnawk athum o. Kohath mah Amram to sak. ⁵⁹ Amram ih zu hmin loe Jokhebed; anih loe Levi ih canu ah oh moe, Izip prae ah oh naah Levi acaeng thung hoiah tacawt. Amram hoi anih mah Aaron, Mosi hoi nihnik ih tanuh Miriam to sak. ⁶⁰ Aaron ih capanawk loe, Nadab, Abihu, Eleazar hoi Ithamar. ⁶¹ Toe Nadab hoi Abihu loe, Angraeng hmaa ah paek

26.52 NAM 34.13; Josh 14.1,2. **26.60** NAM 3.2. **26.61** LEV 10.1,2; NAM 3.4.

koi ai hmai hoi angbawnhaih to sak hoi pongah duek hoi hmaek. ⁶² Levi acaeng thung hoiah nongpa khrah to pacoeng ranui bang kaom kami to kroek boih naah, sing hnet, sang thumto oh o. Nihcae loe Israel kaminawkw salakah qawktoep o ai pongah, Israel kaminawkw hoi nawnto ahmin kroek o hmaek ai.

⁶³ Hae loe Mosi hoi qaima Eleazar mah, Moab azawn, Jordan vapui taeng, Jeriko zaeh ah ah ahmin lak ih Israel kami ah oh o. ⁶⁴ Mosi hoi qaima Aaron mah Sinai praezaek ah Israel kaminawkw ih ahmin to kroek hoi naah, hae kaminawkw thung ih thoemto kaminawkw ih ahmin maeto doeh kroek hoi ai. ⁶⁵ Jephunneh capa Kaleb hoi Nun capa Joshua khue ai ah loe, maeto doeh anghmat o mak ai, praezaek ah dueh o tih, tiah Angraeng mah thuih boeh pongah, anih ih ahmin to kroek o ai boeh.

27

Zelophehad ih canunawkw

¹ Manasseh capa Makir, Makir capa Gilead, Gilead capa Hephher, Hephher capa Zelophehad, anih ih canunawkw loe, Joseph capa Manasseh acaeng ah oh o. Anih canunawkw ih ahmin loe Mahlah, Noah, Hogleh, Milkah hoi Tirzah.

² Nihcae loe amkhuenghahih kahni im thok taengah, Mosi hoi qaima Eleazar, zaehoikungnawkw hoi rangpui kaminawkw hmaa ah, angdoet o pacoengah, ³ kaicae ampa loe praezaek ah duek boeh; anih loe Angraeng ih lok aek kami, Korah hnukbang kaminawkw thungah athum ai; anih

loe a zaehaih pongah duek moe, capa tawn ai.
 4 To tiah capa tawn ai pongah, anih ih ahmin to canawkw thung hoiah tahmat han boeh maw? To pongah kam pa ih nawkamyawkw hoi nawnto qawkw na paek o thoem ah, tiah a naa o.

5 To pongah Mosi mah nihcae kawng to Angraeng khaeah thuih pae. 6 To naah Angraeng mah Mosi khaeah, 7 Zelophehad canunawkw mah thuih ih lok loe amsoem; ampa ih nawkamyawkw salakah nihcae han qawkw na paek han oh; ampa ih qawknawkw to nihcae han paek pae. 8 Israel kaminawkw thung ih, Kami maeto loe, capa tawn ai ah dueh nahaeloe, anih ih qawkw to a canu han paek ah. 9 Canu doeh tawn ai nahaeloe, anih ih qawkw to angmah ih nawkamyawkw khaeah paek ah. 10 Nawkamyawkw doeh tawn ai bae nahaeloe, anih ih qawkw to ampa ih nawkamyawkw khaeah paek ah. 11 Ampa loe nawkamyawkw tawn ai nahaeloe, acaeng thung kazoi koek kami to paek ah; anih mah qawkw to toep tih; hae loe Angraeng mah Mosi khaeah paek ih lok baktih toengah, Israel kaminawkw hanah kangaih zaehoihhaih atawkw ah om tih, tiah a naa.

Mosi lawnkung Joshua

12 Angraeng mah Mosi khaeah, Abarim mae nuiah daw tahang ah loe, Israel kaminawkw khaeah ka paek han ih prae to doeng ah. 13 To prae na hnuk pacoengah loe, nam ya Aaron lak baktih toengah, nang doeh nam panawkw khaeah la tih boeh. 14 Israel kaminawkw Zin praezaek,

Kadesh hmuén ih Meribah tuipuek taengah, laisaep o naah ciimcai ka hmin pakoeh ai ah, ka lok nang aek, tiah a naa. ¹⁵ Mosi mah Angraeng khaeah, ¹⁶ Angraeng, kaminawk boih ih Muithla ukkung Sithaw mah, hae kaminawk, ¹⁷ hma ah caeh thaih kami, akun thaih kami, zaehoi thaih kami, akunsak thaih kami to zaehoikung ah suem nasoe; to tiah nahaeloe Angraeng ih kaminawk loe toepkung om ai tuunawk baktiah om o mak ai, tiah a naa. ¹⁸ To pongah Angraeng mah Mosi khaeah, muithla katawn, Nun capa Joshua to kaw k loe, a nuiah na ban to koeng ah; ¹⁹ qaima Eleazar hoi kaminawk hmaa ah angdoesak ah loe, kaminawk hma ah tok to paek ah. ²⁰ Israel kaminawk mah a lok tahngaih o hanah, hmuén na sak thaihah thoemto anih han paek ah. ²¹ Anih to qaima Eleazar hma ah angdoesak ah loe, qaima mah Angraeng hmaa ah Urim to lokdueng pacoengah, anih han lok takroek pae tih. Anih mah thuih ih lok baktih toengah, anih hoi Israel kaminawk to tacawt o ueloe, anih mah thuih ih lok baktih toengah akun o tih, tiah a naa. ²² Angraeng mah thuih ih lok baktih toengah, Mosi mah sak; Joshua to kaw moe, qaima Eleazar hoi rangpui hma ah angdoetsak. ²³ To pacoengah anih nuiah ban koeng moe, Angraeng mah Mosi khaeah thuih ih lok baktih toengah, tok to a paek.

27.17 1 Siang 22.17; Ezek 34.5; Mathai 9.36; Mark 6.34. **27.18** EXO 24.13. **27.21** EXO 28.30; 1 Sam 14.41; 28.6. **27.23** Deu 31.23.

28

Ni thokkruek hmuen paekhaih

¹ Angraeng mah Mosi khaeah, ² Hae lok hae Israel kaminawk khaeah thui paeh; nihcae khaeah, Nangcae mah kai han paek ih hmuen, kai khaeah hmuihoih paek hanah hmai hoi sak ih angbawnhaih takaw to, atue phak naah na paek oh, tiah a thuih, tiah thui paeh. ³ Nihcae khaeah, Ni thokkruek, coek koi kaom ai saningto kaom, tuuca hnetto, Angraeng khaeah hmai angbawnhaih to sah ah. ⁴ Tuuca maeto akhawnbang ah paek oh loe, kalah tuuca maeto loe duembang ah paek ah; ⁵ olive situi hint palito thungah hint maeto hoi atok ih, takaw dip ephah hatu thungah maeto hoi nawnto paek ah. ⁶ Hae loe Sinai mae ah caksak ih, boeng ai ah Angraeng khaeah paek hanah, hmuihoih ah paek ih hmai angbawnhaih ah oh. ⁷ Tuuca maeto naah, naek han misurtui hint maeto to palito ah tapraek ah loe, to misurtui to naek koi tui hoiah sak ih angbawnhaih baktiah hmuenciim ih Angraeng hmaa ah krai ah. ⁸ Kalah tuuca maeto hoi angbawnhaih loe duembang ah sah ah; akhawn bangah na paek ih takaw dip hoi naek koi tui na paek ih baktih toengah, Sithaw khaeah hmuihoih ah paek ih hmai hoiah angbawnhaih to sah ah.

Sabbath niah hmuen paekhaih

⁹ Sabbath niah coek koi kaom ai, saningto kaom tuuca hnetto loe, naek koi paek ih hmuen hoi nawnto, situi hoi atok tangcae ih takaw dip ephah maeto thung hoi tapraek ih hatu thungah hnetto paek ah. ¹⁰ Hae loe hmai hoi

angbawnhaih, naek koi tui hoi angbawnhaih sak pacoengah, Sabbath ni kruek sak han koi hmuen ah oh.

Khrah kangtha poihsakhaih

¹¹ Khrah amtong tangsuek naah, coek koi kaom ai maitaw tae hnetto, tuu tae maeto hoi saningto kaom tuuca sarihto hoiah Angraeng khaeah hmai angbawnhaih to sah ah; ¹² Maitaw tae maeto naah situi hoi atok ih takaw dip ephah maeto thung hoi tapraek ih hato thungah thumto; tuu tae maeto naah situi hoi atok tangcae ih takaw dip ephah maeto thung hoi tapraek ih hato thungah hnetto hoi nawnto paek ah. ¹³ Tuuca maeto naah situi hoi atok tangcae ih takaw dip ephah maeto thung hoi tapraek ih hato thungah maeto paek ah; hae loe Angraeng khaeah hmuihoih ah paek ih hmai angbawnhaih ah oh. ¹⁴ Maitaw tae maeto naah naek koi hmuen ah misurtui hint ahap; tuu tae maeto naah misurtui hint maeto thung hoi tapraek ih thumto thungah maeto, tuuca maeto naah misurtui hint maeto thung hoi tapraek ih palito thungah maeto paek ah; hae loe saningto thung khrah kruek sak han ih angbawnhaih ah om tih. ¹⁵ Ni thokkruek boeng ai ah sak ih hmai angbawnhaih, naek han misurtui hoi angbawnhaih sak pacoengah, zae angbawnhaih sak hanah Angraeng khaeah maeh caa maeto paek han oh.

Taeh thuh ai ih takaw

¹⁶ Khrah tangsuek ni hatlai palito loe, Angraeng mak sak ih misong loihhaih niah oh.

17 To khrah ni hatlai pangato naah poi h to sak moe, ni sarihto thung taeh thuh ai ih takaw to caak han oh. 18 Hmaloe koek niah kaciim rangpui amkhuenghah to sah ah, na sak zong ih tok to sah hmah. 19 Angraeng khaeah hmai angbawnhah sak hanah, coek koi kaom ai saning kanawwk maitaw tae hnetto, tuu tae maeto hoi saningto kaom tuuca sarihto paek ah. 20 Maitaw tae maeto naah situi hoi atok tangcae ih takaw dip ephah maeto thung hoi tapraek ih hato thungah thumto; tuu tae maeto naah ephah maeto thung hoi tapraek ih hato thungah hnetto, 21 tuuca maeto naah ephah maeto thung hoi tapraek ih hato thungah maeto, to tiah tuuca sarihto han paek ah; 22 nangmacae zae angbawnhah sak hanah maeh tae maeto paek ah. 23 Ni thokkruek boeng ai ah hmai hoi angbawnhah sak pacoengah, to baktih angbawnhah doeh sah ah. 24 To tiah boeng ai ah hmai hoi sak ih angbawnhah hoi naek koi tui hoiah angbawnhah sak pacoengah, ni thokkruek Angraeng khaeah hmuihoih ah hmai hoi angbawnhah sak ih takaw to paek ah. 25 Ni sarihto naah loe kaciim rangpui amkhuenghah to sah ah, na sak toepsoep ih tok to sah hmah.

Thingthai tangsuek poihsakhah

26 Ni sarihto akoep pacoengah, hmaloe koek tacawt thingthai qumponawwk Angraeng khaeah sinhah ni, hmaloe koek thingthai qumpo paekhah niah, kaciim rangpui amkhuenghah to

28.17 EXO 12.14-20; 23.15; 34.18; Deu 16.3-8. 28.26 EXO 23.16; 34.22; Deu 16.9-12.

sah oh, na sak o toepsoep ih tok to sah hmah; ²⁷ toe saning kanawwk maitaw tae hnetto, tuu tae maeto hoi tuuca sarihto, Angraeng khaeah hmuihoih angbawnhah ah paek ah; ²⁸ maitaw tae maeto naah situi hoi atok tangcae takaw dip ephah maeto thung hoi tapraek ih hatu thungah thumto; tuu tae maeto naah takaw dip ephah maeto thung hoi tapraek ih hatu thungah hnetto, ²⁹ tuuca maeto naah takaw dip maeto thung hoi tapraek ih hatu thungah maeto paek ah, to tiah tuuca sarihto han paek ah. ³⁰ Nangmacae zae angbawnhah sak hanah, maeh caa maeto paek ah. ³¹ Boeng ai ah paek ih hmai angbawnhah, takaw hoi angbawnhah sak pacoengah, naek koiah paek ih hmuen hoi nawnto ah coek koi kaom ai moinawwk to paek ah.

29

Mongkah uenghah poihkung ah hmuen-paekhah

¹ Khrah sarihto haih, ni hmaloe koek ah kaciim rangpui amkhuenghah to sah ah, na sak zong ih tok to sah hmah; to loe nang han mongkah uenghah niah om tih. ² To naah Angraeng khaeah hmuihoih ah paek ih hmai angbawnhah sak hanah, coek koi kaom ai saning kanawwk maitaw tae maeto, tuu tae maeto hoi coek koi kaom ai saningto kaom tuuca sarihto paek ah. ³ Maitaw tae maeto naah situi hoi atok tangcae ih takaw dip ephah maeto thung hoi tapraek ih hatu thungah thumto; tuuca maeto naah takaw dip ephah maeto thung hoi tapraek ih hatu thungah

hnetto paek ah. ⁴ Tuuca maeto naah takaw dip ephah maeto thung hoi tapraek ih hato thungah maeto paek ah. ⁵ Nangmacae zae angbawnhah sak hanah, maeh caa maeto paek ah; ⁶ sak zong ih angmacae ih atawk baktih toengah, khrah kruek sak ih hmai hoi angbawnhah, takaw hoi angbawnhah, ni thokkruek sak ih hmai angbawnhah, takaw hoi angbawnhah, naek koi hmuen hoi sak ih angbawnhah sak pacoengah, Angraeng khaeah hmuihoih ah paek ih hmai hoi angbawnhah to sah ah.

Angbawnhah niah hmuen paekhah

⁷ Hae khrah sarihto haih, ni hato naah, kaciim rangpui amkhuenghah to sah ah; to naah nangmacae hoi nangmacae to poek kamtang ah om ah loe, na sak zong ih tok to sah hmah; ⁸ toe Angraeng khaeah hmuihoih angbawnhah sak hanah, coek koi kaom ai saning kanawk maitaw tae maeto, tuu tae maeto hoi saningto kaom tuuca sarihto paek ah. ⁹ Maitaw tae maeto naah situi hoi atok tangcae ih takaw dip ephah maeto thung hoi tapraek ih hato thungah thumto; tuu tae maeto naah takaw dip ephah maeto thung hoi tapraek ih hato thungah hnetto paek ah. ¹⁰ Tuuca maeto naah takaw dip ephah maeto thung hoi tapraek ih hato thungah maeto hoiah sah ah; to tiah tuuca sarihto hanah paek ah; ¹¹ zae angbawnhah, boeng ai ah sak ih angbawnhah, takaw angbawnhah hoi naek koi hmuen paekhah sak pacoengah, zae angbawnhah sak hanah maeh caa maeto paek ah.

Kahni im poiukung ah hmuenpaekhaih

¹² Khrah sarihto haih, ni pangato naah, kaciim rangpui amkhuenghaih to sah ah, na sak zong ih tok to sah o hmah; Angraeng khaeah to poiht to ni sarihto thung sah ah. ¹³ Angraeng khaeah hmuihoih ah paek ih hmai angbawnhaih sak hanah, saning kanawwk maitaw tae hatlai thumto, tuu tae hnetto hoi coek koi kaom ai saningto kaom tuucaah hatlai palito paek ah. ¹⁴ Maitaw tae hatlai thumto naah situi hoi atok tangcae takaw dip ephah maeto thung hoi tapraek ih hato thungah thumto; tuu tae maeto naah takaw dip ephah maeto thung hoi tapraek ih hato thungah hnetto, ¹⁵ tuucaah maeto naah takaw dip ephah maeto thung hoi tapraek ih hato thungah maeto paek ah; to tiah tuucaah hatlai palito han paek ah. ¹⁶ Boeng ai ah hmai angbawnhaih, cang hoi angbawnhaih, naek koi hmuen hoi angbawnhaih sak pacoengah, zae angbawnhaih sak hanah maeh caa maeto paek ah. ¹⁷ Ni hnetto haih naah saning kanawwk maitaw tae hatlai hnetto, tuu tae hnetto hoi coek koi kaom ai saningto kaom tuucaah hatlai palito paek ah. ¹⁸ Angmacae mah sak o zong ih atawwk baktih, kami pop hoi tamsi baktiah, maitaw tae, tuu tae hoi tuucaanawwk hoi nawnto ah, cang hoi angbawnhaih, naek koi hmuen hoi angbawnhaih to sah ah. ¹⁹ Boeng ai ah sak ih hmai angbawnhaih, cang hoi angbawnhaih, naek koi hmuen hoi angbawnhaih sak pacoengah, zae angbawnhaih hanah maeh caa maeto paek ah.

²⁰ Ni thumto naah maitaw tae hatlaito, tuu tae hnetto hoi coek koi kaom ai saningto kaom tuucaahatlai palito paek ah. ²¹ A sak o zong ih atawk baktih, kami pop hoi tamsi baktiah, maitaw tae, tuu tae hoi tuucaanawkw hoi nawnto ah, cang hoi angbawnhah, naek koi hmuen hoi sak ih angbawnhah to sah ah. ²² Boeng ai ah hmai hoi sak ih angbawnhah, cang hoi sak ih angbawnhah, naek koi hmuen hoi sak ih angbawnhah sak pacoengah, zae angbawnhah sak hanah maeh caa maeto paek ah.

²³ Ni palito naah maitaw caa hato, tuu tae hnetto hoi coek koi kaom ai saningto kaom tuucaahatlai palito paek ah. ²⁴ A sak o zong ih atawk baktih, kami pop hoi tamsi baktiah, maitaw tae, tuu tae hoi tuucaanawkw hoi nawnto paek ih cang hoi sak ih angbawnhah, naek koi hmuen hoi sak ih angbawnhah to sah ah. ²⁵ Boeng ai ah hmai hoi sak ih angbawnhah, cang hoi sak ih angbawnhah, naek koi hmuen hoi sak ih angbawnhah sak pacoengah, zae angbawnhah sak hanah maeh caa maeto paek ah.

²⁶ Ni pangato naah maitaw tae takawtto, tuu tae hnetto hoi coek koi kaom ai saningto kaom tuucaahatlai palito paek ah; ²⁷ a sak o zong ih atawk baktih, kami pop hoi tamsi baktiah, maitaw tae, tuu tae hoi tuucaanawkw hoi nawnto ah, cang hoi sak ih angbawnhah, naek koi hmuen hoi sak ih angbawnhah to sah ah. ²⁸ Boeng ai ah hmai hoi sak ih angbawnhah, cang hoi sak ih angbawnhah, naek koi hmuen hoi sak ih angbawnhah sak pacoengah, zae

angbawnhah sak hanah maeh caa maeto paek ah.

²⁹ Ni tarukto naah maitaw tae tazetto, tuu tae hnetto hoi coek koi kaom ai saningto kaom tuuca hatlai palito paek ah. ³⁰ A sak o zong ih atawk baktih, kami pop hoi tamsi baktiah, maitaw tae, tuu tae hoi tuucaanawk hoi nawnto ah, cang hoi sak ih angbawnhah, naek koi hmuen hoi sak ih angbawnhah to sah ah. ³¹ Boeng ai ah hmai hoi sak ih angbawnhah, cang hoi sak ih angbawnhah, naek koi hmuen hoi sak ih angbawnhah sak pacoengah, zae angbawnhah sak hanah maeh caa maeto paek ah.

³² Ni sarihto naah, maitaw tae sarihto, tuu tae hnetto hoi coek koi kaom ai saningto kaom tuuca hatlai palito paek ah. ³³ A sak o zong ih atawk baktih, kami pop hoi tamsi baktiah, maitaw tae, tuu tae hoi tuucaanawk hoi nawnto ah, cang hoi sak ih angbawnhah, naek koi hmuen hoi sak ih angbawnhah to sah ah. ³⁴ Boeng ai ah hmai hoi sak ih angbawnhah, cang hoi sak ih angbawnhah, naek koi hmuen hoi sak ih angbawnhah sak pacoengah, zae angbawnhah sak hanah maeh caa maeto paek ah.

³⁵ Ni tazetto naah, rangpui amkhuenghah sah oh, na sak o zong ih tok to sah o hmah; ³⁶ toe Angraeng khaeah hmuihoih ah paek ih hmai hoi sak ih angbawnhah sak hanah, maitaw tae maeto, tuu tae maeto hoi coek koi kaom ai saningto kaom tuuca sarihto paek ah. ³⁷ A sak o zong ih atawk baktih, kami pop hoi tamsi baktiah, maitaw tae, tuu tae hoi tuucaanawk hoi nawnto ah, cang hoi sak ih angbawnhah, naek

koi hmuen hoi sak ih angbawnhahih to sah ah.
³⁸ Boeng ai ah hmai hoi sak ih angbawnhahih, cang hoi sak ih angbawnhahih, naek koi hmuen hoi sak ih angbawnhahih sak pacoengah, zae angbawnhahih sak hanah maeh caa maeto paek ah.

³⁹ Lokkamhahih sak hanah hmuen tathlanghahih, palung anghawk baktiah hmuen paekhahih, hmai hoi sak ih angbawnhahih, cang hoi sak ih angbawnhahih, naek koi hmuen hoi sak ih angbawnhahih pacoengah, angdaeh angbawnhahihnawk to atue phak naah sah ah, tiah a naa.

⁴⁰ Angraeng mah thuih pae boih ih lok baktih toengah, Mosi mah Israel kaminawk khaeah thuih pae.

30

Lokkamhahih daan

¹ Angraeng mah thuih ih lok to Mosi mah Israel zaehoikungnawk khaeah hae tiah thuih pae. ² Kami maeto mah Angraeng khaeah lokkamhahih a sak, to tih ai boeh loe palung thung hoiah hmuen maeto sak han thuih nahaeloe, a thuih ih lok to amkhrai han om ai; ³ nongpata maeto loe nawkta vop, ampa im ah oh nathuem ah, Angraeng khaeah lokkamhahih sak moe, a poekhahih baktiah hmuen maeto sak hanah am-sak; ⁴ anih ih lokkamhahih hoiah sak han atim ih lok to ampa mah kawbangah doeh naa ai, omtaak duem nahaeloe, hmuen maeto sak han lokkamhahih hoiah a thuih ih lok to cak tih boeh.

⁵ Toe anih lokkamhaih to ampa mah kaang pae khruék nahaeloe, sak han lokkamhaih to cak mak ai; ampa mah kaang pongah, Angraeng mah anih to tahmen tih. ⁶ Nongpata loe sava tawnh moe, a lokkamhaih baktiah maw, to tih ai boeh loe hmuen maeto ka sak han, tiah pahni hoiah thuih naah, ⁷ a sava mah thaih, toe a thaih niah kawbangah doeh naa ai, omtaak duem nahaeloe, a sak ih lokkamhaih hoi a thuih ih lok to caksak han oh. ⁸ Toe a sava mah thaih na niah sak han ai ah pakaa pae khruék nahaeloe, anih lokkamhaih maw, pahni hoiah thuih ih lok maw loe azom ah ni om tih; Angraeng mah doeh anih to tahmen tih. ⁹ Lamhmaih nongpata hoi sava mah pakhrak ih nongpata mah lokkamhaih sah nahaeloe, a lokkamhaih to caksak han oh. ¹⁰ Sava tawn nongpata mah lokkamhaih to sak han ih maw, to tih ai boeh loe hmuen maeto sak han lokkamhaih sak naah, ¹¹ a sava mah thaih, toe pakaa ai, kawbangah doeh naa ai, omtaak duem nahaeloe, hmuen maeto sak han lokkamhaih hoiah a thuih ih lok to cak tih. ¹² Toe sava mah to lok to thaih na niah a lok to aek pae nahaeloe, pahni hoiah thuih ih lokkamhaih hoiah sak han thuih ih lok to cak mak ai; a sava mah phraek boeh pongah, Angraeng mah doeh anih to tahmen tih. ¹³ A poekhaih amtang hanah a sak ih lokkamhaih boih, hmuen maeto sak han thuih ih lok boih loe, a sava mah caksak thaih baktiah, a phraek thaih. ¹⁴ Toe a sava mah to hmuen kawng pongah, nito pacoeng nito tidoeh thui ai ah omtaak duem nahaeloe, to nongpata mah lokkamhaih hoiah sak han thuih ih loknawk boih loe cak tih; a sava mah thaih, toe anih to kawbangah doeh naa ai

pongah, a thuih ih lok to cak tih. ¹⁵ Toe sava mah thaih pacoengah hnukkhuem ah phraek han thui nahaeloe, a zu zaehaih to sava nuih krah tih, tiah a naa.

¹⁶ Hae loe Angraeng mah Mosi khaeah thuih pae ih, zu sava salak, ampa hoi ampa im ah kaom a canu tangla salakah khosakhaih atawk ah oh.

31

Midian kami humhaih

¹ Angraeng mah Mosi khaeah, ² Israel kaminawkw nuih sak ih zaehaih baktih toengah, Midian kaminawkw khaeah sah pathok ah; to pacoengah loe nangmah ih kaminawkw khaeah la tih boeh, tiah a naa. ³ To pongah Mosi mah kaminawkw khaeah, Midian kaminawkw nuih Angraeng ih lu to lak moe, Midian kaminawkw to tuk hanah, nangcae thung ih thoemto kaminawkw maiphaw maica hoi amthoep oh. ⁴ Israel acaeng thung hoi acaeng maeto mah kami sang to misatuk hanah patoeh oh, tiah a naa. ⁵ To pongah Israel acaeng maeto boih thung hoiah patoeh ih kami sang hatlai hnetto loe misatuk hanah anghawk o. ⁶ Mosi mah to kaminawkw to misatuk hanah acaeng maeto thung hoiah kami sangto patoeh; nihcae hoi nawnto mongkah ueng Eleazar capa qaima Phinehas to hmuenciim thung ih maiphaw maicanawkw hoiah nawnto patoeh. ⁷ Angraeng mah Mosi khaeah thuih ih lok baktih toengah, nihcae mah Midian kaminawkw to tuk o moe, nongpanawkw to hum o boih. ⁸ A hum o ih kaminawkw thungah Evi, Rekem, Zur, Hur hoi Reba, Midian siangpahrang pangato

athum o; nihcae mah Beor capa Balaam doeh sunsen hoiah hum o. ⁹ Israel kaminawkw mah Midian nongpatanawkw hoi nawktanawkw, nihcae ih hmuennaenawkw, maitawnawkw hoi tuunawkw to lomh pae o boih. ¹⁰ Midian kaminawkw ohhah vangpuinawkw to hmai hoiah thlaek pae o boih; a ohhah kahoih imnawkw doeh thlaek pae o boih. ¹¹ A naeh o ih kaminawkw, a lak o ih hmuennawkw hoi pacah ih moinawkw doeh lak pae o boih. ¹² Misong ah naeh o ih kaminawkw hoi a lak pae o ih hmuennawkw boih loe, Moab azawn ih Jordan vapui taeng, Jeriko vangpui zaeh ah kaom, Mosi, qaïma Eleazar hoi Israel kaminawkw khæeah a sinh pae o.

Kami hum kaminawkw ciimsakhaih

¹³ Mosi, qaïma Eleazar hoi acaeng zaehoikung boih loe, nihcae tongh hanah ataihah ahmuena tasa bangah caeh o. ¹⁴ To naah Mosi loe misatukhah ahmuena hoiah amlaem misatuh angraengnawkw, kami sangto ukkungnawkw hoi kami cumvaito ukkungnawkw nuiah palungphui. ¹⁵ Mosi mah nihcae khæeah, Nongpatanawkw na pathlung h o boih maw? tiah a dueng. ¹⁶ Khenah, hæ nongpatanawkw loe Balaam ih lok to tahngaih o moe, Peor kawng pongah Israel kaminawkw to Angraeng khæ hoi loklam amkhraengs o sak boeh; to pongah Angraeng ih kaminawkw salakah kasæ nathaih to oh. ¹⁷ Vaihi nawktanawkw salak ih nongpa to hum o boih ah; nongpa hoi nawnto iip nongpatanawkw doeh hum o boih ah. ¹⁸ Toe nongpa panoek vai ai tanglanawkw loe nangmacæ han suem oh. ¹⁹ Nangcæ thungah

mi kawbaktih doeh kami hum kami, to tih ai boeh loe hum ih kami gok sui kami to ataihah im tasa bangah ni sarihto thung suem oh; ni thumto hoi ni sarihto naah nangmacae hoi na naeh o ih kaminawkw boih ciimcaihah to sah oh. ²⁰ Nangmacae ih khukbuen, moihin hoi sak ih hmuennawkw, maeh mui, thing hoi sak ih hmuennawkw to ciimcai o sak ah, tiah a naa.

²¹ To pacoengah qaima Eleazar mah misatuk han kacaeh misatuh kaminawkw khaeah, Angraeng mah Mosi khaeah paek ih atawkw loe hae tiah oh; ²² sui, sum kanglung, sum kamling, sum, camphaeh ngan hoiah kimah, ²³ hmai kakaang thaih hmuennawkw boih loe hmai hoiah goeng ah, to tiah nahaeloe ciim tih; ciimsakhah tui hoiah doeh pasae oh; hmai khaan thai ai hmuennawkw loe tui hoiah pasae oh. ²⁴ Ni sarihto naah khukbuennawkw to masuk oh, to tiah nahaeloe na ciim o tih; to pacoengah loe ataihah imthung ah nang zo o thai tih boeh, tiah a naa.

Lak ih hmuen amzethah

²⁵ Angraeng mah Mosi khaeah, ²⁶ kaminawkw mah lak o ih hmuenmaenawkw to nangmah hoi qaima Eleazar hoi acaeng zaehoikung mah la oh loe, ²⁷ to hmuennawkw to ahmuen hnetto ah tapraek ah; misatuk han caeh misatuh kaminawkw hoi amkhueng kaminawkw han tapraek paeh. ²⁸ Misatuk han kacaeh misatuh kaminawkw loe kami doeh, maitaw doeh, laa hrang doeh, tuu doeh, cumvai pangato thungah maeto, Angraeng khaeah paek han oh; ²⁹ nihcae mah hak ih tamut ahap to la ah loe, Angraeng taham to qaima Eleazar khaeah paek ah. ³⁰ Israel acaeng ahap

khæe hoiah, kami doeh, maitaw doeh, laa hrang doeh, tuu doeh, maeh doeh, kalah moinawk doeh, qui pangato thungah maeto la ah loe, to hmuennawk to Angraeng ih kahni im khenzawnkung Levinawk khæeah paek ah, tiah a naa. ³¹ To pongah Angraeng mah Mosi khæeah thuih ih lok baktih toengah, Mosi hoi qaima Eleazar mah sak hoi. ³² Misatuh kaminawk mah lak o ih kanghmat tuunawk loe sang cumvai taruk, sang qui sarikh, sang pangato oh. ³³ Maitaw sing sarikh, sang hnetto, ³⁴ laa hrang sing taruk, sangto, ³⁵ nongpa hoi iip vai ai nongpata sing thum, sang hnetto oh o. ³⁶ Misatuk naah kacaeh kaminawk ih taham ahap loe, tuu sing qui thum, sing thum, sang sarikh, cumvai pangato, ³⁷ Angraeng khæeah tathlang han ih hmuen loe cumvai taruk, qui sarikh, pangato oh. ³⁸ Maitaw sing thum, sang tarukto oh; to thung hoiah qui sarikh, hnetto loe Angraeng khæeah paek han ih taham ah oh. ³⁹ Laa hrang sing thum, cumvai pangato oh; to thung hoiah Angraeng ih taham loe qui taruk, maeto; ⁴⁰ kami loe singto pacoeng, sang tarukto oh; to thung hoiah Angraeng ih taham loe qui thum, hnetto. ⁴¹ Angraeng mah Mosi khæeah thuih ih lok baktih toengah, Mosi mah Angraeng ih taham to qaima Eleazar khæeah paek.

⁴² Mosi mah misatuh kaminawk khæe hoiah lak moe, Israel kaminawk mah hak han koi ahap, ⁴³ rangpuinawk mah hak han koi ahap loe, tuu sang cumvai thum, sing thum, sang sarikh, cumvai pangato; ⁴⁴ maitaw sing thum, sang tarukto, ⁴⁵ laa hrang sing thum, cumvai pangato hoi, ⁴⁶ kami singto pacoeng, sang tarukto

oh. ⁴⁷ Angraeng mah thuih ih lok baktih toengah, Israel rangpui mah hak han koi taham ahap thung hoiah, Mosi mah kami maw, moi maw qui pangato thungah maeto lak moe, Angraeng ih kahni im khenzawnkung Levi kaminawk khaeah paek.

⁴⁸ To pacoengah misatuh sangto ukkungnawk hoi misatuh cumvaito ukkungnawk Mosi khaeah caeh o moe, ⁴⁹ anih khaeah, Na tammanawk mah misatuh kaminawk thung ih kami ka kroek o naah, maeto doeh anghmaa ai. ⁵⁰ To pongah Angraeng khaeah paek hanah sui hoiah sak ih hmuennawk, bungmunawk, ban lakoknawk, bantuennawk, naa tangkraengnawk, hnah ah bangh koi hmuennawk to Angraeng hmaa ah angbawnhahih ah sak han ih kang sin o, tiah a naa o. ⁵¹ Mosi hoi qaima Eleazar mah nihcae ih suinawk to talawk pae hoi; ban tok sah kop kaminawk mah sak ih suinawk to talawk pae hoi. ⁵² Mosi hoi qaima Eleazar mah misatuh kami sangto ukkungnawk hoi misatuh kami cumvaito ukkungnawk khae hoiah talawk ih Angraeng ih taham suinawk loe sangqum ah shekel sang hatlai taruk, cumvai sarih, qui pangato oh. ⁵³ Misatuh kami maeto mah angmah hanah hmuennawk maeto lak o boih. ⁵⁴ Mosi hoi qaima Eleazar mah misatuh kami sangto hoi misatuh kami cumvaito ukkungnawk khae hoiah talawk hoi ih suinawk to Israel kaminawk mah panoek poe hanah amkhuenghahih kahni im ah Angraeng hmaa ah a sin hoi.

32

Jordan vapui zaeh ih acaengnawk

¹ Reuben hoi Gad kaminawk mah Jazer hoi Gilead prae to hnuk o naah, kahoih parai maitaw pacahhah ahmuen doeh a hnuk o; ² to pongah Reuben hoi Gad kaminawk angzoh o moe, Mosi, qaima Eleazar hoi Israel rangpui zaehoikungnawk khaeah lokthuih o, ³ Ataroth, Dibon, Jazer, Nimrah, Heshbon, Elealeh, Shebam, Nebo, Beon hoi, ⁴ Israel kaminawk hmaa ah Angraeng mah tuk pae ih prae loe, moi pacah han hoih parai, na tamna kaicae loe pacah ih moi paroeai ka tawnh o; ⁵ nangcae mikcuk naakrak ah ka oh o nahaeloe, hae praenawk hae na tamnanawk hanah qawk ah na paek ah, kaicae hae Jordan vapui angkatsak hmah, tiah a naa o.

⁶ Mosi mah Gad hoi Reuben kaminawk khaeah, Nam nawkamyawk loe misatuk naah caeh o, toe nangcae loe haeah nang hnut o sut han maw? ⁷ Tipongah Angraeng mah nihcae khaeah paek ih prae thungah caeh hanah, Israel kaminawk tha na set o sak loe? ⁸ Prae khet hanah nam panawk to Kadesh-Bernea hoi ka patoeh naah to tiah a oh o. ⁹ Eskol azawn to phak o moe, prae to a hnuk o naah, Angraeng mah nihcae khaeah paek ih prae thungah akun hanah, Israel kaminawk to palungboeng o sak. ¹⁰ To niah Angraeng palungphui o sak pongah, Anih mah lokkamhah sak naah, ¹¹ nihcae loe palungthin boih hoi ka hnukah bang o ai pongah, mi kawbaktih doeh Izip prae thung hoi tacawt saning pumphao hoi

ranuih bang kaom kaminawkw boih, Abraham, Issak hoi Jakob khaeah paek han lokkam ih prae to hnu o mak ai; ¹² palungthin boih hoi Angraeng hnukah kabang, Keniz acaeng Jephunneh capa Kaleb hoi Nun capa Joshua khue ni prae to hnu tih, tiah thuih. ¹³ To pongah Angraeng Sithaw hmaa ah kasae sah kaminawkw ih caanawkw amrosak boih ai karoek to, praezaek ah saning qui palito thung amhetsak. ¹⁴ Khenah, nangcae loe vaihi nam panawkw pongah na zae o kue, nam panawkw zuengah nang thawk o moe, Israel kaminawkw nuiah Angraeng palungphui aep han ih ni na sak o boeh. ¹⁵ Anih to nam khraeng o taak nahaeloe, Israel kaminawkw to praezaek ah amhetsak let tih, nangcae loe hae kaminawkw amrosakkung ah na om o tih, tiah a naa.

¹⁶ To pacoengah Reuben hoi Gad kaminawkw anih khaeah angzoh o moe, Hae ahmuen ah maitaw pacahhah innawkw hoi nawktanawkw ohhah vangpuinawkw to ka sak o han; ¹⁷ toe Israel kaminawkw angmacae ohhah ahmuen ah thaak boih ai karoek to, maiphaw ka sinh o moe, Israel caanawkw hma ah ka caeh o han; hae prae thungah kaom kaminawkw pongah, aicae ih caanawkw loe sipae thung ih vangpuinawkw thungah khosak o han oh. ¹⁸ Israel acaeng maeto boih mah qawktoep ai karoek to, im ah kam laem o mak ai. ¹⁹ Kaicae loe Jordan vapui zae ah nihcae hoi nawnto qawktoep han tidoeh om mak ai; Jordan vapui ni angyae bangah ni qawktoep han oh, tiah a naa o. ²⁰ To naah Mosi mah nihcae khaeah, Hae tiah oh pongah, maiphaw na sin o moe, Angraeng hmaa ah misatuk hanah

na caeh o, ²¹ Angraeng mah a misanawkw to a hmaa hoiah haek boih ai karoek to, Angraeng hmaa ah maiphaw sin hoi Jordan vapui nang kat o boih moe, ²² Angraeng hmaa ah prae na pazawkw o nahaeloe, nam laem o let thai tih, to pacoengah loe Angraeng hoi Israel kaminawkw hmaa ah zaehaih tidoeh na tawn o mak ai boeh; to naah hae prae loe Angraeng hmaa ah nangcae ih qawkw ah om tih. ²³ Toe na sah o ai nahaeloe, khenah, nangcae loe Angraeng hmaa ah zaehaih na tawnh o pongah, na zae o haih mah nangcae to patom tih. ²⁴ Na caa nawktanawkw hanah vangpuinawkw, tuunawkw hanah tuu imnawkw to sah pae oh; pakha hoi na thuih o ih lok baktih toengah sah oh, tiah a naa. ²⁵ Gad hoi Reuben kaminawkw mah Mosi khaeah, Na tamna kaicae loe ka angraeng mah thuih ih lok baktih toengah ka sak o han. ²⁶ Ka zu hoi ka caa nawktanawkw, maitawnawkw hoi tuunawkw loe Gilead prae ih vangpuinawkw thungah om o tih. ²⁷ Toe ka angraeng mah thuih ih lok baktih toengah, na tamna kaicae loe, maiphaw ka sinh o moe, misatuk hanah Angraeng hmaa ah Jordan vapui to kang kat o han, tiah a naa o.

²⁸ To kawng pongah Mosi mah, qaima Eleazar, Nun capa Joshua hoi Israel acaeng zaehoikung lu koeknawkw khaeah, lokthuih pae; ²⁹ nihcae khaeah, Gad hoi Reuben kaminawkw loe misatuk hanah Angraeng hmaa ah nangcae hoi nawnto Jordan vapui to angkat o boih moe, nangcae hmaa ah misa pazawkw o nahaeloe, to Gilead prae to nihcae han qawkw ah toep o sak ah: ³⁰ toe

nihcae mah maiphaw to sin o moe, nangcae hoi nawnto vapui angkat o ai nahaeloe, Kanaan prae ah ni nangcae salakah taham to tawn o tih, tiah a naa. ³¹ Gad hoi Reuben kaminawkw mah, Angraeng mah na tamnanawkw khaeah thuih ih lok baktih toengah, ka sak o han. ³² Jordan vapui hae bang zaeh ih prae to ka toep o hanah, maiphaw sin hoi Angraeng hmaa ah Kanaan prae thungah ka kun o han, tiah a naa o.

³³ Mosi mah Gad kaminawkw, Reuben kaminawkw hoi Joseph ih caa, ahap Manasseh acaengnawkw khaeah, Amor siangpahrang Sihon prae thung ih vangpuinawkw boih, Bashan siangpahrang Og prae thung ih vangpuinawkw to paek boih. ³⁴ Gad kaminawkw mah Dibon, Ataroth, Aroer, ³⁵ Atroth, Shophan, Jaazer, Jogbehah, ³⁶ Beth-Nimrah hoi Beth-Haran vangpuinawkw to sipae thung o moe, pacah ih tuunawkw han doeh im sak pae o. ³⁷ Reuben kaminawkw mah Heshbon, Elealeh hoi Kirjathaim, ³⁸ Nebo hoi Baal-Meon (to vangpui ahmin loe athlaeng o ving boeh), Shibmah vangpui to sak o; a sak o ih vangpuinawkw loe angmacae mah ni ahmin to sak o. ³⁹ Manasseh capa Makir ih caanawkw loe Gilead ah caeh o moe, vangpuinawkw to lak o pacoengah, Amor kaminawkw to haek o. ⁴⁰ To pongah Mosi mah Gilead to Manasseh capa Makir hanah paek; anih loe to ah khosak. ⁴¹ Manasseh capa Jair mah nihcae ohhah ahmuen to tuk moe, a lak pacoengah Havoth-Jair, tiah ahmin sak. ⁴² To pacoengah Nobah mah Kenath hoi a taengah kaom avangnawkw to tuk moe, a lak pacoengah, angmah ih ahmin to sak.

33

Israel kaminawk kholong caehhah

¹ Mosi hoi Aaron zaehhoihaih rang hoiah, Israel kaminawk Izip prae thung hoi tacawt o moe, kholong caehhah kawng, ² Angraeng mah thuih ih lok baktih toengah, Mosi mah kholong caehhah kawng tarik ih ca loe hae tiah oh. ³ Israel kaminawk loe khrah tangsuek, ni hatlai pangato naah, Ramese vangpui hoiah tacawt o; Israel kaminawk loe misong loihaih ni boeng pacoeng, akhawnbang ah Izip kaminawk mikhnuk ah amoekhah hoiah tacawt o. ⁴ To nathuem ah Izip kaminawk loe, Angraeng mah hum pae ih a calunawk ih qok to aphum o; nihcae ih sithawnawk doeh Angraeng mah lokcaek pae.

⁵ Israel kaminawk loe Ramese vangpui hoiah tacawt o moe, Sukkoth ahmuen ah atai o. ⁶ Sukkoth ahmuen hoiah tacawt o moe, praezaek ramri ah kaom Etham ahmuen ah atai o. ⁷ Etham ahmuen hoiah tacawt o moe, Baal-Zephon hma ah kaom, Pi-Hahiroth vangpui ah amlaem o let; to pacoengah Migdol vangpui hma ah atai o. ⁸ Pi-Hahiroth vangpui hoiah tacawt o moe, tuiptui um hoi praezaek ah caeh o poe; Etham praezaek ah ni thumto thung caeh o pacoengah, Marah ahmuen ah atai o. ⁹ Marah ahmuen hoiah tacawt o moe, Elim avang ah caeh o; Elim avang ah loe tuiptuek hatlai hnetto hoi ungsikung qui sarihto ohhah ahmuen ah atai o. ¹⁰ Elim hoiah tacawt o moe, tuiptui kathim taengah atai o. ¹¹ Tuiptui kathim hoiah tacawt o moe, Sin praezaek ah atai o. ¹² Sin praezaek hoiah tacawt o moe, Dophkah ah atai o. ¹³ Dophkah hoiah amsak o moe, Alush

ah atai o. ¹⁴ Alush hoiah amsak o moe, Rephidim ah atai o; to ahmuen ah loe kaminawk mah naek han koi tui to om ai. ¹⁵ Rephidim hoiah amsak o moe, Sinai praezaek ah atai o. ¹⁶ Sinai praezaek hoiah amsak o moe, Kibroth-Hattaavah ahmuen ah atai o. ¹⁷ Kibroth Hattaavah hoiah amsak o moe, Hazeroth ahmuen ah atai o. ¹⁸ Hazeroth hoiah amsak o moe, Rithmah ahmuen ah atai o. ¹⁹ Rithmah hoiah amsak o moe, Rimmon-Perez ah atai o. ²⁰ Rimmon-Perez hoiah amsak o moe, Libnah avang ah atai o. ²¹ Libnah avang hoiah amsak o moe, Rissah ahmuen ah atai o. ²² Rissah hoiah amsak o moe, Kehelathah ahmuen ah atai o. ²³ Kehelathah hoiah amsak o moe, Shepher mae ah atai o. ²⁴ Shepher mae hoiah amsak o moe, Haradah ahmuen ah atai o. ²⁵ Haradah hoiah amsak o moe, Makheloth ahmuen ah atai o. ²⁶ Makheloth hoiah amsak o moe, Tahath ahmuen ah atai o. ²⁷ Tahath hoiah amsak o moe, Terah ahmuen ah atai o. ²⁸ Terah hoiah amsak o moe, Mithkah ahmuen ah atai o. ²⁹ Mithkah hoiah amsak o moe, Hashmonah ahmuen ah atai o. ³⁰ Hashmonah hoiah amsak o moe, Moseroth ahmuen ah atai o. ³¹ Moseroth hoiah amsak o moe, Ben-Jaakan ahmuen ah atai o. ³² Bene-Jaakan hoiah amsak o moe, Hor-Haggidgad ahmuen ah atai o. ³³ Hor-Haggidgad hoiah amsak o moe, Jotbathah ahmuen ah atai o. ³⁴ Jotbathah hoiah amsak o moe, Abronah ahmuen ah atai o. ³⁵ Abronah hoiah amsak o moe, Ezion-Geber ahmuen ah atai o. ³⁶ Ezion-Geber hoiah amsak o moe, Zin praezaek ah kaom Kadesh ahmuen ah atai o. ³⁷ Kadesh hoiah amsak o moe, Edom ramri ah kaom, Hor mae

ah atai o. ³⁸ Angraeng mah paek ih lok baktih toengah, Israel kaminawk loe Izip prae thung hoiah tacawt o pacoeng, saning qui pali, khrah pangato haih, ni tangsuek naah, qaima Aaron loe Hor mae ah dawh tahang moe, to mae ah duek. ³⁹ Hor mae ah duek naah Aaron loe saning cumvai pumphaeo pacoeng, thumto oh boeh. ⁴⁰ Kanaan prae aloih bangah kaom siangpahrang Arad mah, Israel kaminawk angzoh o ti, tiah a thaih. ⁴¹ To pongah Israelnawk loe Hor mae hoiah amsak o moe, Zalmonah ahmuen ah atai o. ⁴² Zalmonah hoiah amsak o moe, Punon hmuen ah atai o. ⁴³ Punon hoiah amsak o moe, Oboth hmuen ah atai o. ⁴⁴ Oboth hoiah amsak o moe, Moab ramri ah kaom, Iye-Abarim hmuen ah atai o. ⁴⁵ Iye-Abarim hoiah amsak o moe, Dibon-Gad hmuen ah atai o. ⁴⁶ Dibon-Gad hoiah amsak o moe, Almon-Diblathaim ahmuen ah atai o. ⁴⁷ Almon-Diblathaim hoiah amsak o moe, Nebo hma ah kaom, Abarim mae taengah atai o. ⁴⁸ Abarim mae hoiah amsak o moe, Jeriko vangpui taeng, Jordan vapui yaeh ih Moab azawn ah atai o. ⁴⁹ Moab azawn hoiah Jordan vapui taeng, Beth-Jeshimon vangpui hoi Abel-Shittim vangpui khoek to atai o.

Kanaan prae pazawk han thuihaih

⁵⁰ Jeriko vangpui maeto bang, Jordan vapui taengah kaom, Moab azawn ah oh o naah, Angraeng mah Mosi khaeah, ⁵¹ Israel kaminawk khaeah hae tiah thui paeh; Jordan vapui to nang kat o moe, Kanaan prae thungah na kun o naah,

⁵² nangcae hma ah kaom prae kaminawk to haek oh; a sak o ih krangnawk hoi atui pakaw moe, pahlom ih krangnawk to phrae pae o ah loe, nihcae ih hmuensangnawk doeh phrae pae o boih ah. ⁵³ To prae to nangcae han kang paek boeh pongah, to prae kaminawk to haek oh loe, a thungah om oh. ⁵⁴ Prae loe imthung takoh maeto boih hanah, taham khethaih phoisa vahhaih hoiah pazet ah; kapop kue imthung takohnawk hanah kalen kue ah prae to paek ah loe, imthung takoh tamsi kue kaminawk hanah loe kathoeng kue prae to paek ah; taham khethaih phoisa vahhaih moe, amtimhaih ahmuen to nihcae mah toep han ih qawk ah om tih; acaeng maeto pacoeng maeto, to tiah qawk to toep o tih. ⁵⁵ Toe nangcae hma ah kaom prae kaminawk to na haek o ai nahaeloe, na pathlung o ih kaminawk loe nangcae ih miknuen ah om o ueloe, nangcae ih panak hanah soekhring ah om o tih; na oh o han koi prae thungah nihcae mah raihah na paek o tih. ⁵⁶ To naah nihcae nuiah sak han ka tim ih hmuen to nangcae nuiah ka sak lat han, tiah a thuih, tiah thui paeh, tiah a naa.

34

Kanaan ramrinawk

¹ Angraeng mah Mosi khaeah, ² Israel kaminawk khaeah hae tiah thui paeh; Kanaan prae na phak o naah, nangcae mah qawk ah na toep o han ih Kanaan prae loe hae tiah oh, ³ aloih bang ih ramri loe, Edom ramri hoi kangbet Zin

praezaek khoek to; topacoengah aloih bang ih na ramri loe Paloi tuipui ni angyae boenghaih ahmuen khoek to om tih; ⁴ aloih bang ih na ramri loe, aloih bang hoiah angkoih moe, Akkarabim tangkhamh bangah caeh tahang pacoengah, Zin praezaek bangah caeh poe; to ahmuen hoiah Kadesh-Barnea avang, Hazar-Addar avang, Azmon avang ah caeh poe; ⁵ Azmon ah amlaem let moe, Izip prae vapui to poeng pacoengah, tuipui ah boeng. ⁶ Kalen tuipui loe niduem bang ih na ramri ah om tih; to tiah niduem bang ih na ramri to om tih. ⁷ Aluek bang ih na ramri loe, kalen tuipui hoiah amtong moe, Hor mae karoek to caeh tih; ⁸ Hor mae hoiah Hammath akunhaih karoek to caeh tih; to pacoengah ramri loe to ahmuen hoiah Zedad karoek to caeh ueloe, ⁹ Ziphron avang ah caeh poe pacoengah, Hazar-Enan ah boeng tih; hae loe aluek bang ih na ramri ah om tih. ¹⁰ Ni angyae bang ih na ramri loe, Hazar-Enan hoi ah Shepham karoek to om tih. ¹¹ Shepham avang hoiah caeh tathuk poe ueloe, Ain avang ni angyae bangah kaom, Riblah avang to phak pacoengah, Kinnereth ni angyae bangah kaom, tuipui ah caeh tathuk tih. ¹² Ramri loe to ahmuen hoiah Jordan vapui ah caeh tathuk poe ueloe, paloi tuipui ah boeng tih: hae loe nangcae mah qawktoep han koi prae ahnuk ahma ramri ah om tih, tiah a thuih pae. ¹³ Mosi mah Israel kaminawk khaeah lokthuih pae; Angraeng mah thuih ih lok baktih toengah, Hae loe taham khethaih cung vah moe,

acaeng takawt to hoi ahap ah kaom acaengnawk khaeah, qawk ah paek han ih prae ah oh. ¹⁴ Reuben imthung takoh, Gad imthung takoh hoi ahap Manasseh acaeng ah kaom kaminawk loe qawktoep hanah hak o boeh. ¹⁵ Acaeng hnetto hoi acaeng ahap ah kaom kaminawk loe, Jeriko vapui taeng, Jordan vapui zaeh, ni angyae bang ih ahmuen to qawk ah a hak o boeh, tiah a naa.

Prae pazet hanah zaehoikungnawk qoihhaih

¹⁶ Angraeng mah Mosi khaeah, ¹⁷ na toep o han ih prae pazetkungnawk ih ahmin loe, qaïma Eleazar hoi Nun capa Joshua. ¹⁸ Qawktoep koi prae pazet hanah, acaeng maeto thung hoiah zaehoikung maeto qoi oh. ¹⁹ Nihcae ih ahminnawk loe, Judah acaeng thung hoiah Jephunneh capa Kaleb. ²⁰ Simeon acaeng thung hoiah Ammihud capa Shemuel. ²¹ Benjamin acaeng thung hoiah, Kislon capa Elidad. ²² Dan acaeng thung hoiah, Jogli capa Bukki. ²³ Joseph capa Manasseh acaeng thung hoiah, Ephod capa Haniel. ²⁴ Joseph capa Ephraim acaeng thung hoiah, Shiptan capa Kemuel. ²⁵ Zebulun acaeng thung hoiah, Parnak capa Elizaphan. ²⁶ Issakar acaeng thung hoiah, Azzan capa Paltiel. ²⁷ Asher acaeng thung hoiah Shelomi capa Ahihud. ²⁸ Naphtali acaeng thung hoiah, Ammihud capa Pedahel cae hae ni. ²⁹ Hae kaminawk loe Angraeng mah thuih ih Kanaan prae thungah, Israel kaminawk toep han ih prae pazetkung ah oh o.

35

Levi kaminawk ih vangpui

¹ Jeriko vangpui maeto bang, Jordan vapui taengah kaom, Moab azawn ah Angraeng mah Mosi khaeah, ² Israel kaminawk mah toep o ih prae thungah Levi kaminawk ohhahih vangpui hoi a taengah kaom ahmuennawk boih to paek ah. ³ Levi kaminawk loe to vangpuinawk thungah om o tih, vangpui taeng ih ahmuennawk loe maitaw, moinawk hoi a tawnh o ih hmuennawk suekhahih ahmuen ah om tih. ⁴ Levi kaminawk han paek ih vangpui taeng ih ahmuennawk loe, vangpui sipae hoi dong sangto kawksak han oh. ⁵ Vangpui tasa bang hoi aluek, aloih, ni angyae hoi niduem bang to dong sang hnetto kakawk ah tah ah; vangpui loe a um ah om tih; vangpui taeng ih ahmuen loe to tiah om tih. ⁶ Levi kaminawk han paek ih vangpui taruktonawk loe, kami hum moeng naah abuephaih vangpui ah patoh hanah sah paeh; to vangpuinawk pacoengah kalah vangpui qui pali, hnetto doeh thap paeh. ⁷ Levinawk na paek han ih vangpuinawk loe qui pali, tazetto om tih; vangpui taeng ih ahmuennawk hoi nawnto paek ah. ⁸ To vangpuinawk loe Israel kaminawk mah toep ih ahmuen thung hoiah tapraek paeh; ahmuen kapop ah tawn kami khae hoiah kapop ah la ah loe, ahmuen zetta tawn kami khae hoiah zetta ah la ah; kami boih qawktoep ih ahmuennawk thung hoiah Levinawk hanah paek oh, tiah a naa.

Abuephaih vangpuinawk

⁹ To pacoengah Angraeng mah Mosi khaeah,
¹⁰ Israel kaminawk khaeah hae tiah thui paeh;
Kanaan prae ah caeh hanah Jordan vapui to
nang kat o naah, ¹¹ poek ai pui hoi kami
hum moeng kami loe cawnh moe, abuep hanah
vangpui to qoi ah. ¹² To vangpuinawk loe,
poek ai pui hoi kami hum moeng kami, rangpui
hma ah lokcaek han angdoe ai karoek to, lu
la kami ih ban thung hoiah duek han ai ah,
abuephaih vangpui ah om tih. ¹³ To tiah na
paek ih vangpui taruktonawk loe na buephaih
vangpui ah om tih. ¹⁴ Abuep haih hanah Jordan
vapui hae bangah vangpui thumto, Kanaan prae
ah vangpui thumto sah paeh. ¹⁵ Hae vangpui
taruktonawk loe Israel kaminawk, angvinnawk
hoi nihcae salakah kaom kaminawk abuephaih
ah om tih; poek ai pui hoi kami hum moeng kami
loe to vangpui thungah cawnh han oh. ¹⁶ Kami
maeto mah sumboeng hoiah kami to bop maat
nahaeloe, anih loe kami humkung ah oh; kami
humkung loe paduek han oh. ¹⁷ Kami maeto
hum hanah, thlung hoiah va maat nahaeloe,
anih loe kami humkung ah oh; kami humkung
loe, paduek han oh. ¹⁸ Kami maeto mah a ban
ah sin ih thingboeng hoiah kami to bop maat
nahaeloe, anih loe kami humkung ah oh; kami
humkung loe paduek han oh. ¹⁹ Athii tho lu la
kami mah kami hum kami to hum tih; anih to
hnuk naah hum tih. ²⁰ Kami maeto loe hnukma
pongah kami to a thunh maw, to tih ai boeh loe
hum hanah angang moe, hmuen maeto hoiah
a vah maat maw; ²¹ to tih ai boeh loe hnukma

pongah ban hoiah a boh naah, kami to dueh ving nahaeloe, to tiah bop kami to paduek han oh. ²² Toe pacaenghaih om ai ah kami maeto mah poek ai pui hoiah nuih moeng maw, to tih ai boeh loe patoemhaih om ai ah hmuen maeto hoiah vah moeng maw, ²³ to tih ai boeh loe anih hoi misa ah om ai, hnukmahaih doeh om ai; to kami to hnu ai pongah thlung hoiah va maat moeng nahaeloe, anih hoi misa ah om ai, hum han pacaenghaih doeh om ai pongah, ²⁴ hae lokcaekhaih daan baktih toengah, athii tho lu la kami hoi kadueh kami salakah rangpui mah lokcaek tih; ²⁵ rangpui mah poek ai pui hoiah kami hum moeng kami to athii tho lu la kami ih ban thung hoiah la ueloe, cawnh moe abuep han koi vangpui thungah caehsak tih; anih loe to ahmuen ah kaciim situi hoi bawh ih kalen koek qaima dueh ai karoek to om tih. ²⁶ Toe kami hum kami loe abuephaih vangpui tasa bangah tacawt pongah, ²⁷ athii tho lu la kami mah anih to tasa bangah hnuk naah hum nahaeloe, kami hum pongah zaehaih tawn mak ai; ²⁸ kami hum kami loe kalen koek qaima dueh ai karoek to abuephaih vangpui thungah om tih; kalen koek qaima duek pacoengah ni a ohhaih ahmuen ah amlaem let thai vop tih. ²⁹ Hae loe na ohhaih ahmuen kruekah na caa nawktanawk dung khoek to na pazui o han ih lokcaekhaih daan ah om tih. ³⁰ Kami hum kami loe, kami hum tiah hnukung mah thuih ih lok baktih toengah, anih to paduek han oh; toe hnukung maeto khue om nahaeloe anih to paduek han om

ai. ³¹ Duek han kaom kami akranghaih phoisa to talawk hmah; anih loe paduek han roe oh. ³² Kalen koek qaima dueh ai naah, abuephaih vangpui thungah cawn kami mah a ohhaih prae thungah oh thai hanah, paek ih akranghaih phoisa to talawk han om ai. ³³ Na ohhaih prae to amhnongsak hmah; athii longhaih mah prae to amhnongsak boeh; athii palong kami maeto ih athii longhaih om ai ah loe, angbawnhaih hoiah prae thungah kalong athii to ciimsak thai mak ai. ³⁴ Kai, Angraeng loe Israel kaminawk salakah ka oh pongah, na oh o haih prae hoi Ka ohhaih prae to amhnong o sak hmah, tiah a naa.

36

Zelophehas canunawk ih qawk

¹ Joseph acaeng, Manasseh capa Makir, Makir capa Gilead imthung takoh lu koeknawk to angzoh o moe, Mosi, zaehoikungnawk hoi Israel imthung takoh lu koeknawk khaeah lokthuih o; ² nihcae mah, Kaicae ih angraeng Mosi mah taham khethaih cung to vah moe, Israel kaminawk Kanaan prae toepsak hanah, Angraeng mah lokpaek boeh; Angraeng mah kaicae angraeng khaeah kaicae ih amnawk Zelophehad ih canunawk hanah qawk paek han ih kawng doeh a thuih boeh. ³ Nihcae loe kalah Israel acaengnawk khaeah sava sah o nahaeloe, ampanawk mah toep o ih qawk thung hoiah nihcae ih qawk to la o ueloe, sava sakhaih acaeng kaminawk ih qawk ah om tih; to tiah kaicae ih qawk to la

o tih boeh. ⁴ Israel caanawkw ih Jubili to phak naah, nihcae ih qawkw loe nihcae sava sakhaiah acaengnawkw ih qawkw ah om tih, to tiah kam panawkw khae hoi hak ih acaeng qawkw to la o tih, tiah a naa o.

⁵ To naah Angraeng mah thuih ih lok baktih toengah, Mosi mah Israel kaminawkw khaeah, Joseph ih caanawkw mah thuih o ih lok loe amsoem. ⁶ Zelophehad ih canunawkw hanah Angraeng mah thuih ih lok loe hae tiah oh; nihcae loe a koeh o koek ih kami khaeah sava sah o nasoe; toe ampa ih acaengnawkw khae khue ah sava sak o han oh. ⁷ To pongah Israel acaeng thung ih qawkw doeh acaeng maeto hoi maeto khaeah paqoi han om ai; Israel kaminawkw boih ampanawkw khae hoiah toep o ih qawkw to pakuem o han oh. ⁸ Kawbaktih Israel acaeng thungah doeh qawkwtoep canunawkw loe, ampa ih acaeng thungah ni sava sak o han oh; to tiah Israel kaminawkw boih mah ampanawkw ih qawkw to toep o tih. ⁹ Qawkw ah toep ih hmuen to acaeng maeto hoi maeto khaeah paqoi o hmah; Israel acaeng boih mah angmacae ih qawkw to pakuem o han oh, tiah a thuih pae.

¹⁰ Angraeng mah Mosi khaeah thuih ih lok baktih toengah, Zelophehad canunawkw mah sak o. ¹¹ Zelophehad canu, Mahlah, Tirzah, Hoglah, Milkah hoi Noah cae loe, ampa amnawkw ih capanawkw khaeah sava sak o. ¹² Nihcae loe Joseph capa Manasseh ih caanawkw khaeah sava sak o, to tiah nihcae ih qawkw loe ampanawkw ih acaeng thungah oh poe.

¹³ Hae loe Jeriko vangpui zaeh, Jordan vapui

taengah kaom, Moab azawn ah, Angraeng mah
Mosi patohhahih rang hoiah Israel kaminawk
khaeah thuih ih lokpaekhaih hoi lokcaekhaih ah
oh.

Asang Khongca Bible (2019)
The Holy Bible in the Asang Khongca language of
Mynmar

Public Domain

Language: Asang Khongca (Chin, Eastern Khumi)

Dialect: Asaang Khongca

Published in Mynmar, which is not a signatory to international copyright treaties. Copyright may apply locally in Mynmar. Translator names withheld for security reasons.

2020-09-24

PDF generated using Haiola and XeLaTeX on 21 Feb 2024 from source files dated 13 Dec 2023

48776925-bad5-5701-8cb9-5ee5267a8fab